

WANTOK

NIUSPEPA BILONG YUMI OL PAPUA NIUGINI STRET!

32 pes

Namba 1,405

Wik stat long Fonde Me 31, 2001

70t

Pes 30

**Panim Bal
resis ...
winim
prais**

Pes 15-16

**Ol nius
long
ovasis**

Pes 2

**Pundari
laik klinim
opis**

Pes 3

**Smok ken
kilim
arapela**

Pes 28-32

**Ol spot
stori na
dro**

Damen singautim Gavman long givim marimari

VERONICA HATUTASI i
raitim

MAN husat i bin kirapim tru bruk pait insait long Bogenvil Damien Damen i putim strongpela singaut long Nesenel Gavman long givim amnesti o marimari long tripela PNG Difens Fos soldia husat i bin stap insait long Sandline hevi long 1997 na nau i stap long kalabus wantaim tu ol BRA memba husat i stap long ol kalabus long kantri.

Amnesti em pasin bilong pogivim na lusim tingting long hevi we wanpela i wokim na larim em i go fri.


Mista Damen i bin mekim singaut long dispela wik bihainim stap bilong em long Mosbi we em i bin kam long stap insait long stap wantaim ol arapela Bogenvil lida long ol toktok bilong stretim hevi long ailan.

Bogenvil Pipels Kongres Presiden Joseph Kabui na namba tu bilong em James Tanis i sapotim Mista Damen long dispela singaut.

Mista Damen i singaut long Nesenel Gavman long larim i go fri Kepten Bola Renagi, Kepten Belden Namah na Leftenen Linus Osaba husat kot i bin putim ol long kalabus long Julai las yia long ol i rong long go pas long Sandline hevi we i bin rausim ol paitman bilong Sandline long Saut Afrika i go bek long kantri bilong ol. Gavman bilong Chan/Haiveta i bin singautim Sandline i kam long PNG bilong traim pinisim dispela pait long Bogenvil.

Mista Damen em i wanpela ki o bikpela man long pait bilong Bogenvil long kisim independens na lukautim em yet. Nem bilong em i save pairap bikpela long Bogenvil olsem lida bilong "50 toea kago kalt grup" tasol em i laikim bai ol man i save olsem em tasol i namba wan man long kirapim bruk lus tingting na pait long Bogenvil.

Grup bilong em i bin stap isi na sanap strong long lukautim kastom na ol tumbuna bilip, lukautim bus



• Man i gat nem na pawa long Bogenvil, Damien Damen i sanap wantaim Vais President bilong Bogenvil Pipels Kongres, James Tanis, ausait long Gateway Hotel long Mosbi.
Foto: JOE IVAHARIA.

na graun, ol yangpela grup we Francis Ona i go pas long en i bin kirapim pait pasin long skruim wok we Mista Damen i bin statim pas-taim na kamapim Bogenvil hevi.

Mista Damen i tok em i no sinia etvaisa bilong Mista Ona. Long wankain taim tu, em i tok em i no poroman o birua bilong em tasol em i stap long namel. Na Mista Ona i stap aninit long ambrela bilong em na grup bilong em.

Kam bilong em long Mosbi em i bikpela samting na i apim ol wok bilong stretim Bogenvil, planti ol Bogenvil lida i tok.

Ol famili na pipel bilong Bogenvil i bin putim askim long Sir Mekere long lusim tripela soldia ya i go fri las yia bihainim disisen bilong kot, tasol em i no wokim samting.

Planti Bogenvil pipel i luksave long tripela man olsem bikos long samting we ol na ol arapela poroman bilong ol i mekim long rausim Sandline na operesen we ol i bin laik kamapim long ailan, ol i bin sevim laip bilong ol pipel.

Mista Damen i tok tru em i amamas long ol toktok we i sut long bihain taim bilong Bogenvil, em i

wari bikos sampela soldia husat i bin pait long sevim Bogenvil na BRA memba i stap yet long kalabus.

Na em i taim nau long gavman i pogivim ol na lusim ol i go fri.

"Em i rait taim nau long givim amnesti long tripela soldia husat i bin stap wantaim ol arapela wanwok long sevim laip bilong ol Bogenvil pipel, maski ol i brukim sampela lo tu taim ol i wokim dispela. Mi askim strong gavman long larim ol i go fri.

Long wankain taim tu, Presiden Kabui i tok long las mun tasol gavman i bin givim amnesti i go long ol soldia long Mari Bareks husat i bin stap insait long hevi bilong Difens amari. na taim em i wokim dispela, em i opim rot long ol lain i stap insait long wankain hevi em i mas larim ol i go fri.

Mista Kabui i tok aninit long Lincoln Agrimen, i gat hap we i tok Nesenel Gavman i mas givim amnesti long ol lain husat i bin kamapim trabel insait long Bogenvil hevi. Na gavman i mas bihainim dispela, Mista Kabui i tok.

CDC kisim planti toktok long senisim sampela lo

WANPELA loya long Goroka i tok Konstitusienel Developmen Komisn (CDC) i mas toksave long kabinet i ken sotim taim bilong ol memba long palamen long 5-pela krismas i kam daun long 3-pela krismas.

Brian Mui bilong Kot loyas i tokim siaman bilong CDC Yauwe Riyong olsem dispela senis i mas kamap long mekim ol memba wok gut.

Mista Mui i tok nau dispela 5 yia tem ol memba i gat i mekim ol sindaun gut long sit bilong ol na ol i save mekim kankain samting long laik bilong ol yet.

Em i tok taim ol memba i gat 3-pela yia tasol long palamen ol bai save olsem ileksen kam klostu na ol bai mekim wok gut na nesenel gavman bai ranim ekonomi gut. Na tu 85 pesen bilong pipel long kantri husat i no save rit na rait i ken kisim moa save taim gavman i mekim wok bilong em.

Mista Mui i tok 5 yia tem i orait tasol em i longpela taim tumas na ol memba i save les long mekim wok. 3 yia bai mekim ol wok strong long ol pipel i ken lukim olsem ol i wok na taim eleksen kamap bai ol memba i gat tingting olsem ol i mas kisim vot long go bek gen long palamen.

Em i tok CDC mas toktok wantaim kabinet long lusim pasin bilong vot i no gat bilip na kisim ol lida go long kot aninit long lidasip kod.

Deputi siaman bilong CDC husat i go wantim Mista Riyong long raun bilong CDC long ol hailans provins we i stat long Goroka i tok i kisim planti strongpela toktok long ol publik sevins na ol lida bilong Goroka yet taim tupela i givim ol toktok long kain wok CDC save mekim.

Mista Wama i tok sampela senis i bai kamap long we bilong

vot long kantri long 2002 nesenel ileksen na ol bai-ileksen long kot.

Em i tok ol 107 memba bilong palamen nau i makim 7 pesen long ol pipel i vot long elektoret bilong ol. Dispela i min olsem ol makim ol lain wanples tasol bilong ol na ol narapela i no save kisim gut sevis taim memba i go long palamen.

Mista Wama i tok sapos senis i kamap bai olgeta pipel i ken vot long wanpela man olgeta i laikim na senisim we bilong vot long nau.

Em i tok yet olsem CDC i givim kabinet sampela senis ol i laik mas kamap long ol boda insait long ol provins. Em i givim wanpela tok piksa olsem long sampela elektoret i gat 150 o 160 pipel i stap tasol lo i tok i mas gat mak long 40,000 pipel long wanpela ilektoret.

Mista Wama i tok taim ol i go long ol narapela provins long kantri ol pipel i tok gavman i mas rausim ol provinsal sit na kamapim ol open elektoret sit tasol em i tok lo bilong Provinsal na Lokal level gavman i no stret olgeta na i gat sampela asua i stap we ol i mas stretim.

Mista Riyong i tok ol LLG presiden na ol provinsal Gavana i kamap olsem ol liklik Praim Minista long provins bilong ol na i nogat gutpela senis i kamap long helpim ol pipel. Em i tok CDC bai mekim ol wok painmaut bilong em na pawa i stap long kabinet long mekim senis long ol lo.

Ol planti publik sevins i tok i no gat planti i gat bikpela we long senisim kantri tasol ol pipel i no luksave gut long wok bilong ol long niuspepa o redio na TV. Ol i tok Privatisation Komisn wok bilong ol em ol pipel i luk klia long wanem em i save kamap long niuspepa na redio.

PLIS RIPOOT

MOSBI:

* Wanpela sekuriti gat i kilim i dai wanpela raskol man husat i laik holim ap gat na kisim mani bilong Carpenters Hardware Store long Gordons industriel Senta. Mosbi plis bos Joseph Morehari i tok 4-pela raskol giaman luk olsem ol kastoma i kam insait long stoa na taim gat bilong stoa i kam insait wantaim mani bilong stoa ol raskol i pait wantaim gat na gat i sutim wanpela na 3-pela i ranawe. Plis i wok long painim ol yet.

* Plis i holimpas wanpela bikman bilong Foren Afeas Dipatmen long wanem em i bin brukim lo na lusim wanpela Pilipino meri i lusim kantri i go long ples bilong em. Ekting Darekta bilong Imajresen na Sitisensip Divisen Mista Luke Kulimbao i bin rong na givim paspot bilong Misis Grace Samonte na em o ranawe lusim kantri na go long ples bilong em. Meri i bin gat sas long go long kot taim ol plis i painimaut olsem em i stilim mani mak long K36,000 taim em wok wantaim wanpela kampani long PNG.

Mista Kulimbao bai go long kot long dispela wik.

DARU:

* Plis bilong Papua Niugini na Australia i holimpas wanpela meri husat i salim spak brus i go long Australia. Meri nem bilong em Rosa Maupa, 38 krismas bilong Daru ailari na em i gat 6-pela pikinini. Misis Maupa i go long Daru Nesenel Kot na kot i harim olsem em i salim 9 kilo spak brus na kisim K5,000 na 3-pela gan. Jas Penuel Mogish i salim em go long kalabus long 18-pela mun.

HAGEN:

* Wanpela pait we i kamap namel long ol plis na woda long Hagen bai i gat wok painimaut long em. Ol woda long Baisu haus kalabus i bin go brukim Hagen plis sel na rausim wanpela wanwok bilong ol husat ol plis i kisim na holimpas i stap long sel. Koreksenel Sevises Instityut Komisina Richard Sikani i tok wanpela wok painimaut bai kamap namel long dispela samting na lo i bai stretim husat i bin mekim asua. CIS Minista Henry Smith na Plis Komisina John Wakon i tok amamas long Mista Sikani long stopim dispela trabel long go bikipela.

Pundari laik stretim gut opis

YAKAM KELO i raitim

NUPELA Minista bilong Foren Afeas John Pundari i tokaut olsem em bai sanap strong long wok bilong stretim ol nem nogut bilong dipatmen na opim dua long wok klostu wantaim ol lain i makim wanwan kantri na gavman bilong ol hia long PNG.

Mista Pundari i mekim dispela toktok long Mande taim em i holim namba wan bung bilong em wantaim ol diplomatik misin o ol lain i makim maus bilong Gavman bilong ol hia long PNG.

Mista Pundari i tokaut olsem em i luksave olsem Gavman bilong ol dispela mausman i bikipela samting long Papua Niugini bikos ol i save oltaim

helpim PNG wantaim mani na ol arapela wok developmen na sevis i go long ol pipel na developmen bilong PNG. Olsem na long dispela as, Mista Pundari i skelim olsem em i bikipela samting long em i mas bungim ol dispela mausman na toktok wantaim ol.

Mista Pundari i tokaut olsem sampela bikipela samting em i laik kamapim em long stretim gut nem bilong Foren Afeas dipatmen olsem na sampela bikipela senis em i laik kamapim em long ol wokmanmeri i mas bilas gut na kamap gut long wok na mekim gut wok long taim na pinis stret long taim. Em i stapim tu olgeta opisa bilong Foren Afeas long noken dring bia, kaikai buai na smok insait long ples bilong wok.

Mista Pundari i tok em i laik lukim tu gutpela bekim na wok bung wantaim i kamap namel long ol arapela dipatmen long ol wok we lo bilong Foren Afeas i karamapim sampela wok bilong ol.

Wanpela bikipela hevi em taim Gavman wantaim ol pipel i save amamas long lukim ol gutpela helpim na sapot i kam long ol narapela kantri, ol Gavman opis yet i save slek tru long ino karimaut ol dispela wokna skelim i go daun long ol pipel. Olsem na dispela em wanpela bikipela hevi em i laik lukim gutpela senis i kamap long ol.

Long ol wok bilong paspot na visa, em i laik lukim gutpela wok i kamap long dispela na ol ovasis lain husat i kam long PNG i ken kisim gutpela sapot

we ol i ken kam mekim bisnis bilong kirapim kantri. Tasol dipatmen bai strong na rausim ol lain husat i kam hait long kantri na brukim lo bilong PNG, Minista Pundari i tok.

Em i tok ol lain i kam long mekim wok bisnis bai i ken kisim residens visa we ol i ken kam stap longpela taim long mekim wok bilong ol.

Mista Pundari i tokaut tu long planti arapela samting we em i laik lukim i kamap gut long dipatmen bilong Foren Afeas.

Mista Pundari i bin kisim dispela wok long las wik Fonde taim Gavman i mekim senis long ol Minista. Mista Pundari i bin Minista bilong Lens pastaim long em i kamap Foren Afeas Minista long las wik Fonde.

Nem bilong Makmop i kamap long Daru kot

IAN KAKARERE i raitim

NEM bilong saspended Westen provins Gavana Mista Nobert Makmop i bin kamap long kot bilong Daru ples balus teminel.

Daru eapot teminel em paia i bin kukim na Nesenel Kot siting long Daru i harim olsem Mista Makmop i bin go pas long dispela samting.

Man sanap long kot Billy Malawi, 27 krismas; bilong Daru Ailan i tokim Jas Penuel Mogish long wanpela leta olsem long stat bilong 1998 taim em i bin stap long Daru plis sel pikinini man bilong Mista Makmop nem bilong em Leslie i mekim promis long em olsem papa bilong em bai i givim wanpela dingi, autobod moto na K5,000 mani sapos em i kukim Daru eapot teminel haus.

Daru ples balus i bin paia long Novemba 1998.

Mista Malawi i tok taim Daru teminel i paia Mista Makmop i bin gat tingting long muvim hetkota bilong provins long Daru i go long Kiunga na tingting bilong em long strongim sait bilong em long politikis.

Jas Mogish i salim Malawi i go 5 yias long karabus na em i tokim plis long opim dispela kes gen long painimaut long ol toktok Malawi i bin mekim.

Jas Mogish i tok dispela samting em Malawi i no mekim em yet wan na ol narapela lain tu i helpim em.

Tasol Mista Makmop i toktok long radio NBC na radio Westen olsem em i no mekim ol dispela rong na ol lain birua bilong em long politikis i bin tokim Malawi long mekim ol dispela

toktok long bagarapim nem bilong em.

Ekting Westen provinsal administreta Mista Tau Ruma i tok Ok Tedi Maining Limited long Tax Credit Scheme bilong em i bin givim K500,000 long mekim nupela bilding long Daru ples balus na dispela wok bai stat long neks mun.

Long narapela stori dispela kot i harim, Jas Mogish i salim wanpela mama i gat 6-pela pikinini i go long kalabus long wan na hap yia long wanem em i senisim spak brus namel long Australia na Papua Niugini long kisim mani na gan.

Misis Rosa Maupa, krismas bilong em 38 bilong Daru Ailan kot i bin harim olsem em i bin karim 9 kilo spak brus na i bin kisim K5,000 na 3-pela gan.

Plis i bin holim em long Daru ples balus long Disemba 1998 taim ol plis bilong PNG na Australia i bin mekim wanpela operesen long boda long Torres Strait eria.

Jas Mogish i tok i mas gat strongpela mekim save long ol lain i save brukim lo long salim spak brus long wanem ol lo i stap i no strong tumas.

Dispela kain bisnis i kamap bikipela namel long tupela kantri.

Kontrolim graun na populesen long Is Nu Briten

SINIA publik seven Mista John Painap i tok strong long Is Nu Briten provinsal gavman long kamap wantaim ol polisi long givim moa graun long ol setelmen na painim we long kontrolim bikipela namba bilong populesen.

Mista Painap i tok provinsal gavman i no ken tok i no gat graun long provins long wanem planti graun i stap long Pomio na Baining eria.

Em i tok gavman i mas kamap wantaim lo we ol tumbuna papa bilong graun i ken lusim sampela graun i kam long helpim bikipela populesen long sindaun.

Mista Painap i tok namba bilong manmeri long Gesel Peninsula i winim ol narapela na i wok long go antap yet.

Em i mekim ol dispela toktok long wanpela distasta woksop long Kokopo na em i tok sapos i gat moa graun bilong gavman i stap bai i isi tru long kisim ol pipel long ples bagarap na salim ol i go long ples i gat graun.

Em i tok long bipo taim distasta i kamap ol lain i save bungbung long ol setelmen na nogat inap spes long ol i sindaun gut na i save kisim long taim tru long painim nupela graun long putim ol.

Narapela samting em i tok populesen bilong provins i go bikipela mak long 3.3 pesen na dispela i winim ol narapela provins.

Sapos gavman i no mekim sampela disisen bai i gat bikipela problem bihain taim.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief: Anna Solomon.	Papers distributed by air throughout PNG. Available by air mail subscription within Papua New Guinea and overseas
Acting Advertising Manager: Jocko Oberleutner Editor of Wantok: Yakam Kelo	Email address: word@global.net.pg

Advertising deadlines. Display bookings: Tuesday mid-day. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.



Olgeta toktok bilong Bogenvil i go het yet

VERONICA HATUTASI i raitim

OL TOKTOK bung long Bogenvil bai mas kamap wantaim wanpela agrimen tasol i gat ol sampela samting we ol i stretim yet.

Sapos ol i stretim ol samting, ol toktok bai pinis long dispela wik.

Ol samting we ol i no stretim gut yet em long plis fos, CIS, pablik sevis, humen raitis, intenesenel siping na sampela arapela moa.

Ol i stretim pinis ol samting long sait bilong difens.

Sentrel Bogenvil memba Sam Akoitai i tok toktok i wok long glasim tripela bikpela samting na em ol long gavman i gat moa pawa, independens o referendum bilong Bogenvil na rot bilong lusim ol samting bilong pait. Ol i mas kamap wantaim wanpela agrimen long ol samting ya na sainim long Arawa neks mun.

Mista Akoitai i tok em i amamas

long rot we ol toktok i go long en na kamap bilong wanpela bikman bilong Sentrel Bogenvil husat i stap klostu long Francis Ona em i bikpela samting long rot bilong stretim ol hevi long ailan.

"Em i bikpela samting tru long Mista Damen i kam long Mosbi na stap insait long ol toktok. Mi bilip olsem Mista Ona bai wokim wankain samting tu olsem Mista Damen i wokim na kam joinim mipela long rot bilong stretim hevi na sanapim bihain taim gavman

long Bogenvil," Mista Akoitai i tok.

Em i tok Mista Damen i wanpela bikpela lida long dispela pait bilong Bogenvil bikos long ol 1950 na 1960, em bin go pas long egensim bikpela maining kampani bilong Australia em CRA long kariamut ol wok eksploresen na koloniel gavman long givim tok orait long CRA i kirapim main.

Mista Damen i tok em bin lukim olsem em i rait taim nau na em i kam joinim ol yangpela lida bilong Bogenvil husat i wok hat na bihain-

im gutpela rot long stretim hevi na sanapim gavman bilong Bogenvil yet. Em i tok em bin wokim bikpela kaikai we long en, em bin kilim 26 pik. Na long dispela taim, em bin wokim disisen long lusim ples na kam long Mosbi.

Em i tok taim em i go bek, em bai wokim namba tu kaikai na tokim ol pipel bilong em wanem samting em i lukim long Mosbi, rot we ol Bogenvil toktok i go long en na tu long gavman bilong bihain taim bilong Bogenvil.

Telefon lain op long kotim ol mariwana lain

TELIKOM i sapotim wok bilong plis long pait egensim smok spak brus. Long aste Plis Komis John Wakon i tokaut olsem Telikom i opim pinis wanpela telefon lain we ol manmeri i ken ring fri long en i go long Boroko plis stesin na ripot long husat i wok long smok o salim spak brus (mariwana). Dispela telepon lain em 3257600 na em bai op 24 aua.

Mista Wakon i tok ol manmeri ken yusim dispela lain long ring na nogat man bai tokaut long ol.

Dispela em wanpela sapot we i kam insait long sapotim wok bilong plis insait long operesen bilong em egensim smok mariwana insait long kantri we dispela i wanpela bikpela hevi nau insait long kantri.

Korona ripot tok 4-pela dai long kerosin paia

BEN TAUMAI i raitim

KOT ol i kolim Korona Inkwes i go insait long bagarap ol manmeri i bin kisim long Madang taim kerosin i kukim ol i pinis nau na ol i ripot i kamaut klia.

Eksekutiv Dairekta bilong Konsuma Afeas Kaunsil (CAC) Dan Kakaraya i tok amamas long ripot bilong Korona we i soim foapela lain husat i bin dai bihainim bagarap ol i kisim long taim kerosin i kukim ol. Ol lain i bin laik laitim lap taim lap i pairap na kerosin i kalap nabaut long skin bilong ol na paia i kukim ol. Planti lain i kisim bikpela bagarap long skin na bodi bilong ol.

Mejstret husat i go pas long dispela kot o Korona Inkwes Cosmos Bidar i tokaut ol atoriti na ol lain i noken tingting long kisim wanpela moa wok painimaut gen bikos dispela bai kos bikpela mani moa. Na kot bai lukluk moa long ol wok painimaut na ripot we BP kampani i kamapim pinis.

Loya i makim BP kampani i tok kampani i wanbel long asua bilong em pinis na tokaut long stretim ol bagarap we i kamap.

Ol lain husat i bin dai em John Rogers, Lucy Ban Sarobigam, Florentia Yangi na Mackenzie Baip. Kot i bin tokaut tu olsem wanpela liklik bebi husat i bin dai long dispela taim bai nem bilong em i no inap stap wantaim nem bilong ol dispela lain i dai long kisim kompensesen bikos em stap yet insait long bel na i dai taim mama i karim em

Mista Kakaraya i tok Gavman i bai sapotim yet ol dispela lain i kisim bagarap we ol lain bilong givim yet sapot na helpim em haus sik, plis na provinsal disasta opis.

Tasol Mista Kakaraya i tok olgeta wok i no pinis yet bikos sait bilong kisim kompensesen i longpela rot yet. Olsem na em i lukluk long kisim wanpela Kwins Kaunsil (QC) loya long helpim ol pipel na wok klostu wantaim BP PNG loya Jeffrey

Shephard na tupela loya bilong Gavman Thomas Taian na Willie Kombiam na ol dokta long haus long sekim ol rekot na ripot bilong wanwan manmeri husat i bin kisim bagarap long kamap stret wantaim kompensesen we i stret long laik bilong ol lain i kisim bagarap ya. Sapos ol lain ya i no amamas long mak bilong kompensesen ol i kisim, bai kot i kamap.

Mista Kakaraya i askim ol manmeri olsem sapos ol i laik kisim praivet loya long helpim ol, em laik bilong ol yet. Tasol sapos ol i laikim Gavman i helpim ol yet, orait Gavman bai helpim ol yet.

Moa long 200 nem i bin kamap pinis long ol samting bilong ol we i bagarap long paia i kukim ol.

Mista Kakaraya i tok amamas i go long ol plisman long bikpela wok ol i mekim long taim bilong hevi na em i tok tenkyu tu i go long BP long olgeta helpim kampani i mekim long ol lain i kisim bagarap taim kerosin paia i kukim ol.

Smok lain i ken bagarapim narapela

YAKAM KELO i raitim

MAN o meri i smok i ken bagarapim bodi bilong arapela husat i no save smok na i sindaun klostu long ol, dispela em bikpela tok-save Helt Dipatmen i tokaut long bikpela Wol No Tobacco De tude.

Wol No Tobacco De long em tude, Fonde Me 31, 2001. Aninit long kempen bilong smok i birua long bodi na laip, Helt Dipatmen i tokaut strong long seken hen smok.

Seken Han Smok i ken kisim arapela manmeri. Dispela em het tok we kempen i sut long en.

Seketeri bilong Helt Dokta Puka Temu i tok Seken Han Smok em i olsem taim papa o mama i smok insait long ka o

insait long haus na ol pikinini i sindaun na pulim smok tupela i smokim igo long bodi bilong ol, dispela inap kilim ol pikinini long bihain taim.

Dokta Temu i tok smok i save kamapim kain kain sik long bodi na dispela i save kamap bihain long 20 krismas bihain.

Dokta Temu i tokaut olsem insait long wok painimaut bilong ol hia long PNG, rekot i soim olsem ol pikinini krismas bilong stat long 8 i go long 10 i save smok. Olsem na 20 krismas bihain, ol bai painim kain kain sik na hevi long bodi na ol inap dai.

Ripot i soim tu olsem planti yangpela i save smokim lus mutrus bikos em i isi long baim long lus na i no hat olsem long paket.

Dotka Temu i tok i no hat long smok. Taim yu stat long smok tupela o tripela de, yu bai kamap man o meri bilong smok olgeta.

Dokta Temu i tok i gat lo i stap we i tambuim smok long pablik ples o hap we ol pablik i save stap long en, tasol ol lain bilong karimaut dispela lo i no mekim wok bilong ol. Olsem na ol lain i save smok insait long bas, PMV na long pablik ples na bagarapim ol arapela lain husat i no save smok.

Helt Minista Tommy Tomscoll insait long ripot bilong em i tokaut tu long planti samting we i no gutpela long smok. Em i tokaut long ol meri i ken kisim bikpela bagarap long bodi taim ol i karim pikinini o pikinini tu i ken kisim bikpela sik sapos meri i meri bilong smok.



• ol pipel bilong Tapini long Goilala i bung na sekan long stapim trabel na kisim gavman sevis. Foto: DANIEL MONA.

Pawa bilong makim ol Gutpela Lida o Lida Nogut i stap long vot bilong yumi

BIKPELA wok bilong enrolim ol vota bai i stat ken nau long neks Mande Jun 4 na i go inap long mun Julai long Namatanai ilektoret bilong Niu Ailan na olgeta hap bilong Papua.

Bihain long namel bilong mun Jun i go inap long mun Julai bai vota enrolmen i stat long Bogenvil na Mamose.

Long Hailans bai enrolmen i stat long mun Julai na i go inap long mun Ogus.

Long ol dispela taim ol ileksen wokmanmeri bilong enrolmen bai i

go long ol wanwan haus long ol dispela hap na putim nem bilong ol vota insait long bikpela buk ol i kolim Komon Rol.

Ol wanwan vota i no inap long vot sapos nem bilong ol i no stap insait long dispela Komon Rol buk bilong vot.

Long 3-pela mun nau ol ileksen wokmanmeri i no enrolim ol vota bikos Gavman i no givim Iektorol Komisn mani long mekim dispela bikpela wok long olgeta hap bilong Papua Niugini.

Vota enrolmen bilong Manus, Wes

Niu Briten, Is Niu Briten, Sentrel Provins na Kavieng ilektoret long Niu Ailan Provins i bin pinis long las yia yet.


Bos bilong ileksen, Mista Reuben Kaiulo husat em i Iektorol Komisina, i bin laikim enrolmen long stat ken kwik taim tasol em i no nap long hariapim wok bikos ol wokmanmeri long olgeta hap bilong kantri i mas skul ken long mekim gut wok bilong enrolim ol vota na putim nem bilong ol insait long Komon Rol buk bilong vot.

Nau enrolmen bai stat ken bikos long Fonde Mei 3, Gavman i bin givim Iektorol Komisn K400,000 long go het na mekim dispela wok.


Mista Kaiulo i bin askim Gavman long givim Iektorol Komisn K600,000 long statim ken wok bilong vota enrolmen na em i wok long wetim Gavman nau long givim Iektorol Komisn liklik mo mani antap long K400,000 Komisn i kisim pinis.

• PNG Iektorol Komisn i spon-sorim dispela Ileksen Tok Save.





NIUGINI AILAN NIUS



Amamas namel long ol flawa!

• Tripela pikinini Siwai long Sautwes Bogenvil i laikim trupela gutpela sindaun i mas kamap. Ol Bogenvil lida nau i toktok wantaim Nesenel Gavman i stap long Gateway Hotel long Pot Mosbi.



Lamassa pipel stretim graun long sindaun

TONY SAPAN i raitim

PIPEL bilong Lamassa husat graun guria i bin bagarapim ol long Novemba las yia nau ol i lusim asples bilong ol na i wok long painim ples long sindaun na stap gut.

Tupela grup em Nu Ailan provinsal gavman i bin givim K6,000 long ol i ken baim graun na ol liklik lain tru em ol i wok long stretim toktok wantaim ol lain asples em Kamrai long ol i ken salim graun bilong ol na larim ol i kam stap.

Tasol i gat moa long 300 manmeri husat i bin stap long Lamassa gavman stesen em ol i no painim ples bilong ol i ken

stap yet. Ol i bin lusim planti kago samting taim graun guria na solwara i bruk kam na bagarapim haus na kisim ol samting i go.

I gat ripot i kam olsem toktok i wok long go yet namel long ol papa bilong ol graun na ol lain husat i kisim bagarap.

I bin gat wanpela graun em ol i laik baim long Lamassa stesen tasol ol papa bilong graun i no laik salim long wanem ol pret nogut ol pikinini i kam bihain bai i no laikim dispela.

Nau yet ol i wok long stretim ol toktok namel long ol yet na painim gut ol hap graun long baim na statim nupela sindaun.

Is Nu Briten gavman kisim singaut long lukautim ol mesin bilong sekim maunten paia

IS NU Briten Provinsel gavman i kisim strongpela singaut long mekim samting kwiktaitim long lukautim ol mesin we i save monitaim ol maunten paia long provins na rijen.

Dispela singaut i kam long Teknikel Speselis Etwaisa bilong AusAID long Obseveteri Trevor Daiziell long las wik bihain long sampela lain i bin bagarapim tupela long ol tripela mesin we ol i save sekim ol maunten paia long en long Is Nu Briten.

Ol ripot i tok ol dispela mesin i stap long Maunten Varzin na Duk ov Yok Ailan monitaim stesen we i save glasim ol wok bilong ol

maunten paia long NuGini Ailan rijen.

Ol bin bagarapim ol samting i stap long Maunten Varzin stesen las yia taim dispela long Duk ov Yok em ol i bagarapim i no long-taim i go pinis.

Nau dispela tasol long Watam Ailan stesen i stap gut. i tok long nau ya, Rabaul Volkenik obseveteri bai kisim ol ripot long ol maunten paia bai kamap long Matupit na Valken stesen. Dispela ol stesen i stap klostu long ol maunten paia.

Mista Daiziell taim em i toktok long Disasta Manesmen semina long Rabaul las wik i tok bagarapim ol mesin bilong monitaim ol maunten paia em bikpela na namba

wan hevi we obseveteri i wok long bungim.

Em i tok ol i kisim bek pinis planti long ol mesin we ol man nogut i stilim tasol ol i bagarapim na ol i no inap long yusim long kari-maut wok.

Presiden bilong Raluana Lokol Level Gavman presiden james Agi i sapotim wari bilong Mista Dalziell tasol em i tok obseveteri i bin feil long toksave long ol asples lida long ol eria we ol mesin i stap long en na ol i ken putim strongpela na gutpela was long en.

Mista Agi i tok i moabeta long obseveteri i toktok wantaim ol asples lida husat bai go pas long lukautim gut ol mesin samting.

Kavieng taun opim tripela nupela projek

TRIPLEA projek mak long K150,000 i bin kamap long Kavieng, Nu Ailan provins. Displea ol projek em nupela rot kolta long Kavieng taun i go long Kulangit viles, 24-awa pawa saplai long taun i go long viles na nupela elementri skul.

Wod faiv memba Emmanuel Tame i bin kamap wantaim dispela tingting na kisim sapot bilong Kavieng eben lokol level gavman na Nu Ailan provinsal gavman long mekim ol dispela projek.

Long taim bilong opim ol projek las wik Kavieng taun Meya Mista Rommy Tobo i tok em i hat wok long lukautim ol lokol level gavman na i no isi.

Em i tok em i lukluk go bek long las 4-pela yia em i stap Meya na em i tok i bin hat tasol em i traim bes long ol pipel i mas kisim sevis.

Mista Tobo i tok em i amamas long ol pipel i slip long ol setelmen na eben viles long Kavieng ol i bin yusim ol rot nogut, ino planti pawa, wara problem na ol helt sevis tu ino gutpela tasol ol i no komplem.

Taim ol pipel i kam wantaim em long ol wari bilong ol em i tok em i hat long wanem i no gat fand na risos long operet na ranim ol wok na kisim sevis i go long ol.

Em i tok i gat kainkain manmeri husat pasin bilong ol i narapela kain na skul bilong ol tu i bikpela tasol sapos dispela i no stopim em long mekim wok yet long taim em i bin stap Meya.

Mista Tobo i tok amamas long ol projek i kamap na em i bilip ol pipel i ken kisim bikpela helpim long dispela.

Rabaul bai holim histri piksa so

IS NU Briten provins bai hostim wanpela historikel piksa so we i gat long en ol piksa wantaim histri long Australia na PNG.

So ya i bin stat long las wik Tunde Me 22 na bai pinis long Jun 15.

Turisim Eksekutyutiv opisa Nelson Paulias i tok Hai Komisin bilong Australia na Nesenel na Musium At Galeri long Pot Mosbi i oge-naisim dispela piksa so we i gat histri long en long selebretim 100 yias aniveseri bilong indipendens bilong

Australia na 25 yias bilong PNG.

Taitel bilong piksa so em "Birth of Two Nations Exhibition" na em bai soim ol piksa i gat histri long en bilong tupela kantri. Turisim Biuro bilong is Nu Briten bai kodinetim dispela histri piksa so.

Mista Paulias i tok Air Niugini i sponsaim so ya long sait bilong trenspotim na karim ol piksa wantaim nogat kago fi long en long Mosbi na Australia i go long is Nu Briten provins.

Ol lida painim yet hap bilong putim sab depo

TONY SAPAN i raitim

PIPEL bilong Konoagil lokol level gavman long Nu Ailan i bin wet moa long tupela yia long ol i ken gat Kopra Maketing Bod (CMB) sab depot bilong ol yet.

Ol i wet yet na ol wod memba i wok long traim long painim long wanem hap tru ol bai mekim depo.

Nu Ailan provinsal gavman i bin givim K100,000 long 1997 long mekim dispela sab depot na taim ol i painimaut long dispela yia olsem mani i stap long wanpela tras akaunt ol i mas painim ples bilong depot i ken stap.

Nau em mani i stap na pipel na provinsal gavman i laikim olsem depot mas stap long wanpela ples namel. Ol i tok Lak na Kandas i gutpela ples long LLG eria tasol ol lida ino tokaut yet long wanem hap depot bai i stap.

Long Kandas, Karias eria, Kait o Lamassa eria i gat gutpela ples long mekim depot na long Lak eria, Weittin Valley na Silur gm ol i makim long putim depot.

Long Lamassa i gat gutpela haba na ol sip i save ron gut.

Weittin Valley ol tok em i no gutpela long wanem weda nogut i save kamap planti taim long hap na Silur tu i no gutpela long wanem long graun guria long Novemba las yia. Graun guria i save mekim graun i save bruk na kam karamapim rot na ol bikpela trak na 4 wil draiv tasol i save go.

Olsem na provinsal gavman i harim toktok bilong ol pipel tasol ol wod memba bilong ol i no hariapim wok.



Dispela em narapela problem tasol narapela em long prais bilong karim ol korpa i go long Rabaul long ship. Planti lain i no planim kopra long wanem ol i no laikim prais bilong ol long kisim kago i go long sip.

Ol lain husat i stap namel long Weilo na Rei wod 1 i go long 3 em ol i ken salim kakao na kopra i go long sip i go long Namatanai na Kavieng long salim.

Dispela helpim i kam long ol papa bilong Manmo plentesen husat i gat wanpela trak i stap long helpim ol.



SEPIK NIUS



Amanab Timba pemit mas stap long papagraun

FEIX RAMRAM i raitim

OL PAPAGRAUN bilong timba risos i singautim ol atoriti bilong Nesenel Fores Opis na opis bilong NPA insait long Wes Sepik long mekim olgeta samting long pawa bilong ol long lukim olsem pemit bilong Amanab timba risos, ol i kisim long nem bilong ol papagraun na i no long nem bilong ol developmen.

Ol papagraun i mekim dispela toktok wantaim pret long braiberi em ol i tok i wok long kamap bikpela insait long Papua Niugini.

Ol Amanab papagraun i tok wok braiberi i wok long go insait nau long sistem bilong gavman, bisnis na politisen na ol i givim strongpela tok i go long gavman olsem rot bilong stretim na bringim developmen i go insait. Long Amanab timba risos i mas kamap long stretpela pasin na i mas kam long fran dua.

"Korapsen i wok long ron wantaim spit i kam insait long Wes Sepik, bikos long ol risos. Na ol lain i stap antap bai i

mas strongpela lain long tok egensim braiberi pasin.

"Mipela ol papagraun bilong ol risos i lukim olsem ol lain bilong yumi yet olsem plis bai givim mipela bikpela hevi tru sapos mipela i egensim ol developa husat i no bihainim ol lo bilong bisnis long kantri, na tu olsem long paulim na yusim pipel long gutpela bilong ol ovasis lain.

Tupela papagraun bilong Wod 15 insait long Amanab LLG husat i askim mipela long noken autim nem bilong tupela i tok. Ol i mekim dispela ol toktok long gutpela bilong ol risos ona bilong Amanab timba risos. Tupela i tok "pret bilong mipela i bihainim planti piksa nogut long pasin plis i save mekim long ol trupela papagraun bilong Vanimo TRP eria.

"Taim ol forena i askim plis long stapim ol risos ona long tokaut long belhat bilong ol. Long samting ol i lukim i no stret o i no bihainim lo na ol agrimen i stap pinis. Olsem na mipela ol papagraun long Amanab timba risos i wet na lukluk i stap, sapos gavman bilong

yumi i soim piksa nogut long mipela ol papagraun. Mipela i redi long salim ol risos bilong mipela long husat mipela yet i laikim, maski PNG gavman i laikim o nogat," tupela komyuniti lida long Wd 15 long Amanab LLG i tokim Wantok.

Ol i go het na i tok moa olsem olgeta papagraun long Amanab i nogat laik long lukim ol timba kampani, bikpela tru bilong Esia i go insait long Amanab. Ol i laikim ol narapela timba kampani husat i gat gutpela nem na pasin bilong bihainim lo na nogat nem nogut long braiberi pasin.

"Olpela developa mipela papagraun long Amanab i laikim long kam bek na developim Amanab timba risos em Burnings Brothers bilong Westen Australia. Sapos dispela Australia timba kampani i no laikim askim bilong mipela ol papagraun bilong Amanab timba, orait narapela nupela kampani i ken kam insait tasol ol Esia kampani mipela i no laikim ol," tupela papagraun i tok.



• Ol bikman bilong Nuku i go long Aitape long toktok long rot.

Wokabaut somil helpim ol yangpela

MAK olsem 50 memba bilong Kosuno Soka Klap bai helpim ol wokabaut somil opereta long Bikus long karim ol diwai long bus i kam daun klostu long rot long ka i kam karim i go long Sen Anna Somil.

Papa bilong somil Felix Saliau bilong Lemieng i tok em bai peimi ol Kosuno klap long wok ol i mekim na ol i ken yusim dispela mani long baim ol samting bilong

ol long spot bilong ol.

Wanpela tim wantaim 6-pela man i wok long bus bilong Bikus klostu long Tadi stat long mun Desemba long las yia yet i kam.

Long dispela taim Felix i tok ol i bin kisim moa long 7-pela lod diwai i go long Sen Anna somil. Taim somil ibaim timba, ol i save yusim long wok bilong daiosis o ol i salim gen long pablik.

Misin senso opereta Peter i save katim ol diwai na ol i save

katim ol diwai i go daun long seksen na bungim ol gut aninit long so.

Dispela wok i bikpela wok na i mas gat bikpela taim long luksave na lainim gut wok ya baim yu ken kamapim gutpela mani na lukautim gut somil i wok gut yet. I gat tripela wokabaut somil istap long Lemieng eria. Felix i stap long Bikus. I gat somil long Kuruko na Lemieng.

Gavman lus tingting long Edwaki sab distrik

FOAPELA komyuniti bilong Telefomin Ilektoret long Edwaki Sab Distrik Wes Sepik i tokim Wantok olsem Nesenel Gavman na Provinsal Gavman, i lus tingting olgeta long Edwaki Sab Distrik, husat i bungim traipela hevi long i nogat sevis bilong helt, Agrikalsa, Edukesen na Woks olsem long rot na bris.

Ol lida bilong dispela hap i tokaut long wanpela pas i go long Wantok olsem, i gat planti arapela hevi tu i stap we ol gavman bilong bipo na nau i nogat tru wanpela luksave. Na dispela i mekim ol pipel i bruk lusim Telefomin distrik na joinim Lumi distrik.

Pipel bilong Yilui, Tava, Yakalitem na Abrau i tokaut long tingting bilong ol olsem, planti krismas ol i karim hevi pinis taim gavman i nogat luksave long ol.

Na long bekim dispela "dinau" Gavana i gat long pipel bilong Edwaki Sab Distrik, pipel bai i no inap vot insait long Telefomin Ilektoret long 2002 Nesenel Ilekseen.

"Ol lain bilong karim aut wok bilong Nesenel Senses i kisim toktok bilong mipela Edwaki pipel pinis.

Olsem na ol i mas makim olgeta samting na lukim olsem Edwaki pipel i wok insait long Aitape long Ilektoret na i no Telefomin Ilektoret.

Opis bilong Ilektoret Komisen tu i mas luksave long hevi bilong mipela na mekim olgeta samting.

Long lukim Edwaki pipel i vot long Aitape long Lumi Ilektoret long 2002 Nesenel Ilektoret.

Mausman bilong Wod 14, Kaunsila Mark Kailou long aps bilong em i tok planti taim pipel i askim Nesenel Gavman tru long memba bilong Telefomin long kisim sampela helpim mani. Long kamapim sampela kain sevis insait long komyuniti, tasol olgeta dispela askim i pundaun long ol ai pas lain.

Mark Kailou i go het na i tok: "Mipela 4-pela Wod Kaunsila i sapatim pipel bilong Edwaki sab distrik long bruk lusim Telefomin long taim bilong 2002 Nesenel Ilekseen. Wanem ol sevis mipela i wok long kisim nau i kam long Lumi distrik.

Taim memba bilong Telefomin na tu Sandaun Provinsal Gavman i nogat wanpela luksave olsem piipel bilong Edwaki i sitisen bilong Papua Niugini, bikpela tru i pipel bilong Telefomin Ilektoret insait long Wes Sepik provins.

Sapos ol atoriti i no lukim olsem ol senis i kamap long oraitim pipel bilong Edwaki i vot i go insait long Aitape/Lumi Ilektoret.

Kaunsila Kailou long pas bilong em tu i tok, kastom bilong ol i pipel bilong Edwaki i no wankain long pipel bilong Telefomin "tokples bilong Edwaki tu i no wankain long tokples bilong ol Min pipel."

Komyuniti lida ya i go het na i singautim tu provinsal atoriti bilong Wes Sepik long mekim sampela samting hariap olsem pipel bilong Edwaki inap vot long 2002 Nesenel Ilekseen insait long Aitape/Lumi Ilektoret.



PRAIVETAISESEN KOMISIN

OL ASKIM NA BEKIM

Mani i kam long praivetaisesen bai i go we?

Mani gavman i kisim long praivetaisesen bai i go long bekim dinau bilong kantri na sapatim tu ol bikpela wok bilong kantri olsem edukesen, helt na ol rot na bris.

• Bai yumi stopim korapsen olsem wanem long taim bilong praivetaisesen?


Praivetaisesen Kmisin em i wanpela independen komisin husat i go pas long wok bilong praivetaisesen. I gat ol gutpela memba husat bai mekim stret wok bilong was long wok mani na bosim gut olgeta wok long taim bilong salim ol dispela bisnis han bilong gavman. I gat independent grup husat bai helpim long mekim olgeta dispela wok. Na i gat plen bilong bihain olsem bai olgeta wok i stret.



SAUTEN



RIJON



Mama Martha i amamas long soim tapa klos long Korea so

WANPELA mama bilong Colingwut Be eria insait long Tufi i amamas long promotim tapa klos long Korea na makim PNG insait long kalsereel festival long Jeju Ailan, Saut Korea.

Mada ya em Martha Duba bilong Uiaku Peris long Popondetta.

Misis Duba i gat eitpela pikinini na famili na man bilong em i givim gutpela sapot long em long go long dispela wokabaut i go long Korea.

"Mi bin kirap nogut tasol mi amamas long go long Korea na soim tapa klos long dispela festival.

"Tapa klos projek i bilong Madas Yunien insait long Uiaku Angliken peris na wanem mani we bai mi kamapim long salim ol samting i bilong sapotim Yunien.

" Mi amamas long makim Oro na

PNG long soim ol tapa klos bilong yumi.

"Bai mi salim ol hat, ol kep, ol hap klos insait long dispela festival long Korea.

" Em i namba wan taim bilong mi long lusim kantri tasol mi amamas long go wantaim grup na makim kantri," Misis Duba i tok.

Foapela narapela yangpela meri i stap long dispela grup we i gat 16-pela pipel long en.

Grup i bin lusim Mosbi long las Tunde Me 22 na ol bai kam bek long PNG long Jun17.

Wanpela yangpela sumatin meri Tufi em Connie Yogomin bai makim PNG na stap insait long Ailan Kwin resis we ol i holim tu long dispela kalsereel festival.



Oro kalsereel grup makim PNG long Korea festival

Veronica Hatutasi i raitim

WANPELA lain kalsereel grup bilong Tufi insait long Popondeta, Oro provins i bin lusim PNG long las wik Tunde Me 22 bilong stap insait long wanpela kalsereel festival long kantri Saut Korea.

Nem bilong festival em ol i kolim long "Wol Ailan Kalsereel Festival" we i kamap long Jeju Ailan stat long Me 17 inap long Jun 17.

Long wankain taim tu, wanpela yangpela meri Tufi i go insait long resis bilong Ailan Kalsereel Kwin resis we 30-pela ailan kantri i stap insait long en.

Meri ya em Connie Willie Yogomin husat i wanpela Gret 10 sumatin long Gordons Sekonderi skol long Mosbi.

Mis Yogomin em i memba bilong Kove Tiata grup na man i go pas long dispela wokabaut Rodney Kove i

tok em i bikpela samting long Mis Yogomin long makim kantri long dispela intenesenel festival.

Na em i amamas long skul i larim Mis Yogomin long makim PNG insait long wanpela intenesenel festival.

Planti long ol 16 pipel i go long dispela festival em ol yangpela na olgeta i kam long Tufi distrik.

Sikpela i bin lusim Mosbi tupela wik i go pinis wantaim Connie na 11-pela i bin go long las Trinde.

Pater Edison Kopada bilong Sen Thomas Angliken peris insait long Uiaku, Popondeta i makim maus bilong grup i tok em i amamas tru long gavman bilong Korea long helpim dispela 16-pela yangpela i go insait long festival na makim PNG na kalsa.

Pater Kopada i tok tupela grup namel long 16 pipel i makim Kove Tiata grup na ol bai karimaut na soim kalsa bilong PNG long ol danis na singsing we ol bai

wokim long ol ples we ol i makim long ol wan wan hap bilong Korea long en.

Namba tu grup em resis long Ailan Kwin we Connie bai stap insait long en.

Long wankain taim tu, narapela liklik grup bai soim na salim ol tapa klos bilong helpim tapa projek bilong ol rurel meri insait long Uiaku peris we Pater Kopada i lukautim.

Tupela pipel em Mada Martha Duba na Reuben Sakai bai lukautim dispela sait bilong promotim tapa projek insait long foapela wik bilong grup long Korea.

Pater Kopada i tok grup ya bai putim kamap ol pilai, danis na tapa klos so long ol bikpela siti long Korea insait long taim ol i stap long hap.

Kalsa na Turisim Ministri bilong Saut korea i bin helpim wokabaut, pe bilong balus, kaikai na stap bilong dispela 16-pela pipel long hotel insait long foapela wik stap bilong ol long Korea.

Em i kostim US17,000

(K55,016) long peim balus tiket long wan wan bilong ol man insait long grup.

Pater Kopada i tok ol i bin putim askim i go long gavman bilong Saut Korea long dispela helpim na ol i amamas long kisim gutpela ansa na helpim i kam long ol.

Em i tok ol i bin go long Gavana Sylvanus Siembo na Oro memba Simon Kaumi long helpim tasol ol i no kisim wanpela bekim na ol bin go long Korea embasi na nau askim bilong ol i kartim gutpela kaikai. Na grup i salim bikpela tok tenkyu bilong ol i go long gavman bilong Korea bilong helpim wokabaut bilong ol i go long kalsereel festival long Korea.

Pater Kopada i tok long planti bilong ol, em i nambawan taim long lusim kantri na go ausati na ol i amamas tru.

Em i tok grup i amamas long makim PNG long dispela bikpela festival long Jeju, Saut Korea.

• (L-r) Pater Edison Kopada, Martha Duba na Reuben Sakai i soim ol samting we ol i wokim wantaim tapa long putim kamap long Korea festival. Martha na Reuben bai bosim tapa klos so long festival. Tupela i bin redi long tekov long Korea taim Wantok i kisim piksa bilong ol long Jacksons Intanesenel ples balus long Mosbi.

Askim i go long gavman long skruim sevis long rurel Oro

BIKOS ol gavman sevis i no go gut long provins na ol pipel, Oro i save kisim nem olsem "kauboi kantri", Pater Edison Kopada i tok.

Pater Kopada husat i Angliken pris long Uiaku Peris insait long Popondeta i bin wokim dispela toktok long las wik taim wanpela kalsereel grup bilong Colingwut Be eria insait long Tufi, Oro provins i lusim kantri long go long wanpela kalsereel festival long Jeju, Saut Korea we gavman bilong Korea yet i helpim ol wantaim mani long go.

"Gavman i no lukluk tumas long kisim ol sevis i go long ol rurel eria na pipel.

"Gavman i wok long feil long kisim sevis i go long ol rurel pipel.

"Provinsel gavman i no kisim gutpela sevis i go long ol rurel pipel o long ol pipel i stap longwe long taun.

"Mi askim ol pipel long pre hat, tupela taim moa long makim ol gutpela memba long Nesenel lleksen we bai kamap neks yia na ol dispela lida i ken kamapim gutpela developmen.

"Oro i save kisim nem olsem kauboi kantri i no long narapela samting, tasol bikos ol pipel i no kisim gut sevis na ol kain bikhet pasin i kamap," Pater Kopada i tok.

Olsem na em i askim strong Nesenel na Provinsel Gavman long putim mani helpim na skruim i go long ol ples we bai sevim gut ol pipel long en.

Dispela Wik **FOODWORLD** *Spesols!*

AT GORDONS

Big Sister Cake Roll 250gr	K2.45	Medi Plus Soap 90gr	K1.13
Kelloggs Golden Wheats 375gr	K3.80	Gipo Det. Paste 200gr	K1.20
Anchor Milk Powder S/Pack 100gr	K1.40	Sunsilk Shampoo 100ml	K1.68
Bongo Snack Food 25gr	K0.35t	RD Tuna in Oil 380gr	K2.40
Arrow Delta Cream 60gr	K0.53t	Blue Globe Round 200gr	K1.69
Tartan Soap 8x75gr	K2.73	Heinz Tomato Sauce 300ml	K1.79


Supa Spesol Prais!

EXTENDED TRADING HOURS

Monday to Wednesday - 8.00am to 7.30pm
 Thursday / Friday - 8.00am to 8.00pm
 Saturday / Sunday - 8.00am to 7.00pm

Hamamas na baim kaikai long Boroko Foodworld Gordons!


Planti moa kaikai prais i go daun long en!
 Ph: 325 7566, 325 7310 Fax: 325 7096



HAILANS



NIUS



Porgera bungim pipel • Gavana bilong Sauten Hailans Anderson Agiru i sanap wantaim mausman bilong Porgera Maining long bung bilong kampani wantaim ol asples.

Pori distrik i kisim hevi long rot blok

FAY DUEGA i raitim

Ol pipel bilong Pori distrik long Tari Pori ilektoret long Sauten hailans provins i askim hepim bilong stretim ples balus bilong ol hariap. Dispela bai opim rot bilong ol long go kam long taun isi bikos rot nau i no gutpela long ol i ron long ka.

Ol pipel i save go long Tari distrik long baim ol samting long stua o salim ol samting bikos i gat ol stua long hap tasol rot i go long Tari i blok bikos ol raskol i save olgeta taim hensapim ol long rot olgeta de.

Wanpela bikman bilong Pori ples, Wala

Limbiya i raitim pas i kam long niuspepa long autim dispela wari bilong ol pipel.

Ples balus i gat wok i kamap long en stat long Mas 15 dispela yia tasol wok i go het yet na ol i helpim i mas kam long pinisim ples balus ya.

Mista Limbiya i tok Pori distrik i gat sab helt senta, top skul na misin stesin we CBC misin i bin kam sanapim long 1962. Tasol sab helt senta i pas pinis bikos i nogat rot bilong karim ol marasin i go long hap. Top ap skul bai klostu i pas bikos ol tisa i no gat rot long go long taun long baim ol samting long stua o sekim potnait pe bilong ol. Mipela i nogat rot long go aut long ples bilong mipela bikos tupela maunten i lokim mipela namel, em i tok.

Ol pipel i singaut long memba bilong ol long palamen olsem Tom Tomiape na ol arapela memba bilong provins long helpim ol. Em i askim ol wantok bilong ol long arapela provins long kisim dis-

pela wari bilong ol i go long ol gavman na arapela opis we i ken helpim ol.

Memba bilong Tari Pori Tom Tomiape i tokaut olsem i tru dispela hevi i stap na em i sori long ol dispela lain pipel. Tasol i gat bikpela pait i stap long hap na ol man nogut i wok long yusim dispela pait long kamapim hevi long ol gutpela manmeri.

Mista Tomiape i tok ol i save singautim plis long go tasol ol trabel lain i save lusim rot blok hap na ronawe i go pinis na taim ol plisman i go pinis, ol i kam bek gen na go het yet long trabel bilong ol long rot.

Mista Tomiape i tok i no ol Pori lain tasol i save bungim dispela hevi, olgeta lain i save ron long haiwe tu i save bungim ol birua bilong ol raskol i holim ol.

Em i tok em i yusim pinis K28,000 bilong Distrik Sapot Grent long pasim waia raunim sab helt senta long Pori na pulim pawa i go long ol 9-pela haus long hap.

Pipel baim kompensesen i go long Dick Hogan

OL pipel bilong Banz long mid Waghi komyniti long Westen Hailans provins i baim kompensesen i go long Dick Hogan long Waghi Mek Plentesen long las

wik Sarere Me 26, 2001.

Ol i mekim dispela kompensesen igo long Dick Hogan bikos sampela lain husat i tok ol i makim ol pipel long hevi

bilong graun na Waghi Mek kopi plentesen i bin go paitim Mista Hogan na bagarapim ol samting haus bilong em long dispela yia. Ol i peim K10,000 na 12-

pela pik i go long Mista Hogan.

Morgan Mombil, siaman bilong Not na Saut Waghi Foma Tredisenel Lenona Asosiesen (Mal Daam) i tokaut long taim bilong baim kom-

pensesen olsem Mista Hogan em wanpela biknem man long sait bilong kopi bisnis na em i wanpela mid Waghi lida we nogat man inap long paitim o bagarapim sindaun bilong em.



Pravetaisesen Komisin

Husat bai papa long sea

- Long lukim olsem ol manmeri bilong Papua Niugini stret i gat sea insait long ol pablik bisnis bilong gavman nau, gavman bai givim diskaun sea long olgeta pravetaisesen bisnis bilong gavman long taim bilong salim. Gavman bai traim sanapim wanpela yunit tras we bai holim hap bilong olgeta sea em salim long pablik na larim ol pablik i ken baim hap liklik sea insait long ol bisnis long diskaun prais.
- Ol wokmanmeri bilong gavman bisnis nau bai i gat rait long baim sea insait long kampani ol wok taim ol dispela bisnis i kamap pravetaised.
- Pravetaisesen i no inap kamap gut sapos i nogat wanpela man o bisnis bilong ovasis i stap insait. Sapos ol ausait manmeri i laik baim ol bisnis bai yumi hapim prais i go antap na tu lukluk long kisim gutpela save bilong ronim bisnis na teknoloji ol dispela manmeri bai karim i kam insait wantaim invesmen bilong ol.



MADANG NUIS



Nupela kampani bilong baim gol kamap long Madang

WANPELA nupela kampani bilong baim gol i join wantaim ol bisnis komyuniti long mekim bisnis long baim gol long Madang taun.

Dispela kampani em hap bisnis bilong Wanaka Namba 5, wanpela bisnis i save stap long Hagen na papa bilong bisnis em George Leahy, em wanpela bilong ol Leahy famili.

Menesa bilong kampani Mista Lorens Meek i tok kampani i bin mekim bisnis long wanpela mun nau na planti

kastoma i kam long Wewak, Simbai long Madang, Ramu Wau na Bulolo.

Mista Meek i tok ol lain bilong Simbai i save go long Hagen long salim gol bilong ol na ol i bin askim kampani long sanapim wanpela opis long Madang olsem na dispela opis i kamap.

Mista Meek i save wok wantaim ANGCO, wanpela kopi kampani bipo na em i tok gol na kopi i wankain na ol i save wok wantaim namba tasol dispela

namba i wok long go daun yet.

Em i tok kampani i gat ol opis bilong baim gol long Pogera, Mt Kare, Simbai na Kainantu. Mt Kare opis i pas long wanem i bin gat wanpela bikpela stil pasin i kamap we ol raskol i kisim mani bilong kampani.

Em i tok kampani bai i wok long ol kastoma bilong em yet long wanem ol i save bringim ol naispela gol bilong salim na em i tok gol bilong Simbai i gut-

pela moa long gol bilong Mt Kare.

Mista Meek i tok Kumruf eria long Simbai em ol gol baia save go na i gat 89 pesen gol i stap na ol narapela em ol silva.

Wanpela gol baia, National Gold long Wewak i laik joinim bisnis wantaim Wanaka Namba 5 tasol em i tok ol i nogat laisens long baim na salim ol gol na Wanaka Namba 5 i gat olsem na ol i laik joinim ol.

CAC bai helpim ol lain kerosin i bin kukim long kisim kompensesen

PAUL NENGAI i raitim

KONSIUMA Afeas Kaunsil (CAC) i mekim wanpela plen long go long kot na traim long winim kompensesen mak long sampela milien kina bilong ol 63 lain kerosin lam i bin kukim ol.

CAC Darekta Mista Dan Kakaraya i tok kaunsil i laik makim ol lain husat i kisim bagarap na toktok wantaim BP long em i ken kamap wantaim wanpela gutpela kompensesen. BP em kampani husat i bin mekim rong na kerosin i bin kukim ol lain long Madang stat long dispela yia.

4-pela man i dai, 53 i kisim marasin long Modilon haus sik na 10-pela i go kisim marasin long ol narapela hap taim kerosin miks wantaim petrol i kukim ol.

Ol lain bilong BP na provinsal dista i raun long ol ples longwe long taun na toksave long ol lain i no ken yusim ol kerosin we i miks wantaim petrol em ol i baim long ol BP sevis stesen long mun Februari.

Ol wok painimaut long dai bilong 3-pela pikinini na wanpela meri husat i bin gat 23 krismas bai kamap long Madang klostu.

Mista Kakaraya i tok taim ol dispela wok painimaut i pinis bai ol loyia bai mekim toktok wantaim BP long kompensesen.

Em i tok CAC i stap long wanpela posisen we em i ken makim ol lain kisim bagarap na givim ol gutpela ansa long hevi i bin kamap long ol.

Em i tok ol lain husat i kisim bagarap i ken save olsem ol bai kisim gut kompensesen long olgeta bagarap ol i bin kisim.

Ol bikpela kampani husat i save saplaim fiul i mas putim sampela

mani long sait long ol ken lukaut gut long dispela kain hevi i no ken kamap gen.

BP i bin painimaut olsem ol wokman bilong BP yet i bin asua na dispela problem i kamap. Taim ol i laik rausim fiul long wanpela tenka i go long ol storis teng, ol i no bin wasim gut ol paip bipo long ol i yusim na dispela i bin miks petrol na fiul.

Kampani i bin hariap tru na salim 7-pela manmeri husat i kisim moa bagarap long paia i go long Australia na ol i kam bek pinis tasol wanpela i stap yet long haus sik long Brisbane. BP yet i mekim nupela haus bilong ol lain husat haus paia i bin kukim, givim ol lain ol kolos na ol samting bilong haus na givim ol marasin long ol haus sik i ken lukautim ol lain i go long haus sik long kisim marasin.


Sampela famili bai muv igo insait long ol nupela haus BP i bin mekim pinis long dispela mun tasol.

Mista Kakaraya i tok BP i bin givim bikpela sapot tru na dispela kampani i bin stap longpela taim tru long helpim long developim kantri.

Em i tok kaunsil bai kisim wanpela loya bilong Australia yet na bai em i mekim ol wok na ol lain husat bagarap bilong bodi bilong ol i no pinis hariap em kompensesen bai helpim ol long kisim gut ol marasin long helpim bodi bilong ol.

Praim Minista Sir Mekere Morauta i save pinis long dispela na wanpela ripot bai go long Nesenel Eksekutiv Kaunsil.

Modilon haus sik sief eksekutiv Mista Jon Levi i tok em i amamas na tok tenkyu long BP long ol helpim em i givim long ol lain husat i kisim bagarap.



Ol turis save laikim Madang tumas! • Kas tru long dispela baga turis ya i no isi long paitim kundu dram.

Beng i mekim plen long helpim ol kastoma

PATRICIA La POINTE na NIDRA KEWERE i raitim

BANK South Pacific (BSP) long Madang i gat bikpela plen bilong ol kastoma bilong em long Madang.

Nupela rilesensip menesa Mista Pita Balen i tok dispela haus nau we beng sanap bai ol i opim na putim Otometik Teling Masin (ATM) bilong wanem ol namba bilong ol kastoma i go antap tru.

Mista Balen i tok em i gat plan-ti plen long mekim wok long gutpela bisnis senta olsem Madang.

Em i tok Madang i groa na i wet long sampela bikpela senis i kamap na kain kampani olsem Ramu Nikol i givim BSP bikpela sea maket.

Mista Balen i tok BSP long Madang i bin mekim gutpela bisnis taim em i stat long 1995 na ol sampela kastoma bilong em Madang Butchery, Ela Enterprises na Biabi Enterprise long Karkar husat i save mekim bisnis long kakao na kopra.

Ol narapela em Lutheran Shipping na Divine Word University.

Mista Balen i tok resis long mekim bisnis em bikpela tingting

bilong olgeta bisnis na bisnis mas wok long resis.

Mista Balen i kisim ples bilong Mista Ken Dunn husat i bin stap long Madang long 2 na hap yia olgeta.

Mista Balen i bilong Melbon, Australia na em i bin kam long PNG long 1990 na i muv i go long Madang long mun Februari long dispela yia.

Taim em i stap long Australia em i bin wok wantaim Australia National Bank husat i bin gat 87 pesen sea long BSP na bihain em i salim long 1993.

Ol volentia helpim kantri kamap strong

WOL Red Cross dei long Madang i kamap long amamasim wok bilong ol volentia na ol dona ejensi.

Petron bilong Papua Niugini Red Cross Sosaiti (PNGRCS) Sir Silas Atopare i tok ol volentia ol beksait bun bilong sosaiti. Em i tok sapos ol volentia i no stap bai ol pipel i no inap stap gut.

Red Cross i wanpela non gavman ogenaiesen.

Sir Silas i tok ol wok bilong Red Cross long wol na long kantri i kamap long wok volentia tasol. Ol volentia em ol lain husat i no tingting long kisim pei long wok ol i mekim tasol ol i mekim long helpim ol lain manmeri husat i gat hevi long laip bilong ol.

Em i tok long dispela yia long Wol Red Cross

dei ol i no bung long amamas tasol long dispela bikpela na olpela ogenaiesen tasol ol i laik tingim na amamas long olgeta volentia insait long wol.

Ol volentia long PNG i kisim ol gutpela trening long ol i ken helpim ol manmeri long husat i nogat strong long helpim ol yet long laip bilong ol.

Sampela kain wok bilong ol em helpim ol manmeri lek han o bodi i nogut, givim blut na karimaut ol HIV/AIDS aweanes program.

Sir Silas i mekim bikpela tok tenkyu long olgeta volentia long helpim bilong ol long komyuniti.

Eking Darekta bilong wanpela NGO grup Misis Mary Kamang husat i stap long witnessim dispela selebre-



sen i tok tu olsem olgeta NGO insait long kantri i save mekim gut wok bilong ol taim ol i save kisim ol fan long narapela hap na gavman i no save helpim.

Em i tok ol NGO i save wok bung wantaim Red Cross long ol wok aweanes bilong HIV/AIDS na ol narapela helt wok tu.

Misis Kamang i tok ol NGO i wok long kamap bikpela long kantri na ol i save ranim ol program bilong ol yet na sampela taim gavman i save givim kontrak long ol i ken bringim ol sevis i go gut long ol pipel na komyuniti insait long kantri.

Em i tok ol i save kisim fanding bilong ol long kainkain we na dispela ol i yusim long mekim ol wok gut.

Lae Nius



Morobe provins bai planim rais klostu

GABRIEL PAITA i raitim

I LUK olsem Morobe provins bai klostu tru stat long planim rais insait long Papua Niugini.

Dispela toktok i bin kam long Gavana bilong Morobe Luther Wenge taim em i bin sainim wanpela pepa wantaim wanpela bikpela kampani bilong

Tailen long Mosbi.

Nem bilong dispela kampani em Siam Pasifik Entapraisas na em i bung wantaim Morobe provinsol gavman long kamapim wanpela kampani ol i kolim olsem Gutpela Rais. Long kamapim Gutpela Rais, Morobe provincial gavaman i putim 1.8 milien kina na Siam Pasifik Entapraisas i putim narapela 8 milien kina i go insait.

Gavana Wenge i tok as tingting bilong dispela nupela kampani em long halivim ol manmeri long planim rais. Em i tok Gutpela Rais

bai givim ol samting olsem masin, ol sid na ol saveman long planim na lukautim rais. Gavana Wenge i tok olsem 5000 manmeri

long planim rais. Taim ol i lukim olsem i gat plani rais inap long salim long olgeta hap long Papua Niugini, olrait ol bai stapim rais long

Pasifik Entapraisas Dokta Kupusami i tok olsem 75 pesen bilong ol manmeri long Tailen save wok long planim na salim rais na em i gat bilip olsem Papua Niugini i ken wokim wankain samting. Dokta Kupusami i tok tu olsem Siam Pasifik

Entapraisas i bin mekim sampela wok painimaut long ol kain graun i stap long Morobe na ol i gat bikpela bilip olsem rais inap long groa long Morobe. Em i tok tu olsem kampani bilong em bai karim 2000 sid bilong rais i kam na bai givim i go long ol manmeri husat i laik planim rais.

Gavana Wenge i tok olsem em i gat bilip long ol manmeri Morobe olsem ol i ken planim rais long wanem long ples olsem Mape, ol manmeri i bin planim rais olsem 100 yia taim ol waitman i bin givim ol rais sid.

Toktok long planim rais long Morobe

provins i no nupela samting.

Trukai Indastris long Lae i bin wok longpela taim long train na planim rais tasol ol i no bin kamapim wanpela bikpela rais plentesen yet. Ol wokman bilong Trukai i tok olsem Trukai i bin givim sampela moni long Dipatmen blong Didiman na tu long Nesonol Agrikalsa Rises Institut, em ol lain husait i save wokim ol wok painimaut long wok didiman, long train na painum rot bilong planim rais long Papua Niugini. Ol i tok olsem ol dispela wok painimaut i bin sowim olsem graun, wara, binatang nogut na we bilong planim rais i bikpela hevi long PNG.

Ol i tok tu olsem sapos ol manmeri laik planim rais bilong salim, orait ol i bai lusim k4 long kamapim wan kilo rais. Ol i tok dispela em antap tumas long prais bilong rais long ol stoa.

Minista tok Gavman strong yet long Lae industri

TRED na Industri Minista Tukape Masani i tok Malabang Industri Developmen em wanpela gutpela samting long provins we Nesenel Gavman i lukluk long em.

Minista Masani i tokaut olsem taim Industri Developmen kamap long Malabang i gat moa long 500 meri i kisim wok mani na tu i gat planti liklik bisnis i wok long kamap we nesenel gavman i amamas tru.

Tasol em tok sori olsem nogat narapela bikpela industri developmen i kamap gen wankain olsem Intanesenel Fud Korporesen.

Em tokaut tu olsem Nesenel

Gavman i laik kirapim gen Korporesen sosaiti long kamapim gen wok bisnis bilong grup bipo bin stap.

Mista Masani i tok Nesenel Gavman i putim planti mani i stap long developim smol skel na mediam skel bisnis developmen tasol em nidim gutpela wok bung namel long Provinsal Gavman long kirapim ol pipel long mekim dispela wok.

Em tok Gavman i lukluk long helpim ol pipel stretim sidnaun bilong ol tasol i mas i gat wok bung namel long levul bilong ol Gavman yet long mekim dispela kamap.

bai stat long planim rais aninit long lukaut bilong Gutpela Rais. Ol manmeri bai planim rais long graun bilong ol yet bihain long ol saveman i sekim graun na tok orait long em.

Gutpela Rais bai statim wok bilong em bihain long tripela mun. Em bai kisim rais i kam long Tailen na karim i kam long Lae long salim na long seim taim kampani bai planim rais bilong em yet long Sibastin. Kampani bai halivim tu ol manmeri

Tailen na 'ol bai baim rais long ol manmeri bilong ples. Gavana Wenge i tok olsem 5000 manmeri bai stat planim rais.

Gavana Wenge i tok olsem ol i bin kisim Tailen i kam insait long wanem Tailen em save planim na salim moa rais long wol. Dispela min olsem Tailen i gat ol saveman, ol masin na tu ol narapela samting bilong planim na lukautim rais.


Sekretari bilong Siam

Masani laikim bisnis i opim dua long pipel

MINISTA bilong Tred na Industri tukape Masani i tok planti bisnis bin i go aut long Morobe bikos gavman polisi i no bin gutpela.

Mista Masani i tok sapos i gat planti bisnis na investmen long Morobe bai i gat mani i go daun long wanwan famili bikos i gat wokman.

Em toksave tu olsem em sans bilong Morobe bikos taim em holim minista bilong Tred na Industri, Morobe Provinsal



• Mista Masani.

Gavman mas kam klostu long bringim sevis i go daun long pipel.

Minista i tok nau yet hevi bilong mani bagarap long kantri i bagarapim planti famili na sapos bisnis na investmen kam bek long Morobe bai helpim tru ol pipel.

Em tok Morobe gavman mas wok klostu wantaim Nesenel Gavman long bringim sevis i go daun long pipel taim em kisim dispela ministri.

Lida i no soim gut rot long Morobe

DEPUTI eking Morobe Edministreta John Nicholas i tok Morobe Provinsal Gavman bin ron nogat gutpela politikel rot na tingting long las tripela yia i go pinis.

Em i mekim dispela yia i go pinis.

Em i mekim dispela toktok long opim Bush Kibung bilong Morobe Provinsal Gavman na tok nau yet i nogat gutpela was a tok stia i kam long Provinsal Levul i go daun long distrik levul we ol wokman i paul o mekim wok long laik.

Mista Nicholas i tok dispela Kibung em long luksave wanem samting Gavman bin mekim na tu painim popaia bilong gavman long givim gut-

pla sevis go long ol pipel.

Wanpela samting em lukim asua em long ol progrem i gat paul namel long sampela we i no gutpela long wanpela distrik o lokol gavman kaunsil eria tasol bikos em provinsal progrem i westim nating gavman mani.

Mista Nicholas i givim tok piksa olsem Makam distrik i no nidim fiseris bikos nogat wara o solwara tasol ol mas lukluk long arapela wok didiman tasol bikos Provinsal Gavman i gat Fiseris Progrem em ol putim natng Fiseris Divisen long Makam.

Em askim Morobe gavman long bringim ol polisi i ams i gat sans long bringim developmen i go long ol pipel.

Sen Mary's Gerehu Engliken Sios bai selebretim Pentikos

HELEN REI i raitim

OL ANGLIKEN Sios memba long Mosbi bai selebretim Pentekos long Sen Mary's Gerehu Peris long dispela Sarere Jun 2.

Visen 200 na ol arapela yia i kam bilong Angliken Sios long PNG em "Autim tok bilong Gospel".

Olsem na salens i go long olgeta Angliken Sios memba long sanap na wok bung wantaim long inapim dispela visen.

Pater Wilfred Sasingako husat i liesen opisa bilong sios i tok Mosbi daiosis i lukim dispela visen olsem em i bikpela samting, moa yet long Mosbi bilong skelim, ol wok bilong sios long daisis, gro bilong sios na ol wok misin.

"Insait long dispela bikpela visen bilong sios, i gat narapela na em long "Insait long dispela komyuniti long lav bilong God yumi bung wantaim Bisop bilong yumi".

Em i tok olsem hap bilong wanpela Holi, Katolik na Apostolik Sios, yumi stap insait long bilip bilong tising bilong Kraus na Holi Spirit i go aps long yumi insait long ol dispela wok na bilip.

Long las yia, daiosis i bin selenretim 200 Pentekos de wantaim Bisop Michael Hough long Sen Mary's sapel long Gerehu tu.

Ol preia long dispela de i bin sut long givim Tok Tenkyu long Bikpela na askim em long pogivim ol wanwan long ol pekato pasin na larim Holi Spirit bioong em i kam daun long ol na stiaim ol i go bek long Bikpela.

Ol bin pilim olsem long dispela em rot we ol na sios i bihainim long statim nupela milenium . Na ol i nap skruim dispela long bildim, riniuwim na strongim bilip long Bikpela na long wankain taim tu, yunaitim bodi bilong kraus long kamapim komon luksave long wok ekumenikel, tiolojikel na pastorel eria.

Em bin tok ol i laik lukim olsem sios i autim ol toktok, tingting na wari na painim sampela rot long ol hevi i karamapim politiks, sosel na ikonmik eria long kantri.

Tasol em i tok olsem ol arapela sios grup, plen- ing na visen long ol yia i kam na inapim ol gol em samting we em i mas lukluk long en long inapim as we em i stap long en.

"Sios aninit long lidasip bilong Jisas olsem piksa bilong em i mas bihainim ol tok bilong em," Pater Wilfred i tok.

Canosa laip skul holim Baibel kos

TUPELA wik Baibel kos i kamap nau long Canosa Skul bilong Laip long Bomana klostu tasol long Pot Mosbi.

Konprens bilong ol Katolik Bisop bilong PNG na Solomon Ailan i sponsaim dispela kos we i bin stat long Me 21 na bai pinis long Jun 1.

Samting olsem 47 pipel i kam long Mosbi Asdaiosis na Bereina i stap insait long kos. Ol dispela em ol lei Katolik pipel husat i bin sindaun long wanpela kos pastaim long Bomana na Boroko na ol i stap insait long sios na pastorel wok long ol wan wan peris na komyuniti bilong ol. Ol lain bilong Bereina i stap long Sivarai Namona na ol i sindaun long kos.

Ol kos kodineta em long Pater George Ryfa na Pater Victor Roche em tupela Divain Wod (SVD) pater na Sister



• Ol kos manmeri long Canosa skul ausait tasol long Mosbi. Foto: Fr Victor Roche SVD.

Joy Resmèros, wanpela FdCC Katolik Sister. Ol arapela husat i helpim em long Pater Alois Blasi (SVD) na Pater Roger Purcell em

wanpela Sacred Hat Pater.

Ol sampela samting we ol i wokim long kos em long ol Parabel stori, Disaipelsip,

Profet, revelesen, Ol Katolik bilip bihainim Baibel, ol meri long Baibel na ol arapela moa.

Bikpela as tingting

long dispela kos em long skruim save long Baibel na rot we ol Katolikna lei pipel i ken laikim na luksave moa long Baibel.

Sios lida askim WNB Gavman long putim pipel long gutpela ples

WANPELA Sios lida insait long Wes Nu Briten i no wanbel long tingting bilong Provinsel gavman long muvim ol pipel we i bungim hevi long Maunten Paia Ulavun i go long hap graun long Is lbana.

Na em i askim strong ol lida long provins long painim narapela hap we ol dispela pipel i ken stap long en.

Peris Pris bilong eria em Pater Bart Advent i tok em i no laikim dispela tingting long putim ol pipel long dispela hap bikos em i no seif.

Pater Advent i tok sapos Ulavun Maunten paia i pairap bai em i kamapim birua long hap graun we is lbana i stap

long en bikos em i stap eitpela kilomita longwe tasol long kreta na dispela i stap insait long Red Zon eria.

Pater Advent i strongim Provinsel gavman long bihainim ol etvais we ol save- man bilong maunten paia i givim na kamap wantaim ol gutpela plen bilong provins long helpim ol pipel taim dispela kain birua i kamap long nau na long bihain taim tu.

Pater Advent i tok dispela em namba tu yia na Mauten paia Ulavun i kamapim hevi long samting olsem 8,000 pipel. Ol i lusim ol ples bilong ol na go stap insait long ol kea senta long Rakanda, pandi, So na Kabaya taim ol arapela i go painim

ol wantok na hauslain bilong ol i stap long ol seif eria. Em i tok long ol kea senta ya, laip i no gutpela tumas bikos pipel i stap klostu tumas long wanpela arapela na dispela i ken kamapim hevi.

Em i tok long dispela hevi tu, eitpela praimer topap skul i pas na dispela i min olsem 2,000 sumatin bai i no inap long skul insait long sampela taim o yia.

Pater Advent taim em i singaut long ol provinsel lida long putim ol pipel long gutpela eria i tok Sae long boda bilong Is na Wes Nu Briten na Mevlu Plein long Saut baining long Is Nu Briten em ol gutpela eria long putim ol pipel wantaim hevi long en.

Kavieng Taun Kwaia Ministri kamap strong

TONY SAPAN i raitim

KWAIA Ministri bilong Yunaitet Sios Kavieng taun seket i kamap strong long skruim Gutnius long ol singsing bilong ol.

Ol bin fomim dispela ministri long 1999 tasol. Long olgeta Sande liteji, em i save kamap strong long putim kamap ol singsing bilong em.

Long wankain taim tu, ministri i mekim gutpela wok na grup i wok long kisim planti askim long pilaim ol gutpela musik long ol arapela sios na ol gavman bung.

Long Mas 16, grup ya i bin wokim ol singsing kwaia long odinesen bilong nupela Yunaitet Sios Minista

Reveren Robin Buluanis.

Long Epril 6 ol bin putim kamap ol kwaia singsing long opening bilong nupela Rasese Yunaitet Sios bilding long Namatanai na tu long opening bilong Ailans lidas Developmen Forum long Epril 25.

Bogenvil Afeas Minista Moi Avei i bin givim luksave long grup long ol naispela kwaia singsing

na nek bilong ol long dispela taim.

Planti long ol singsing kwaia em ol i kisim long ol lotu singsing buk na ol i karamapim ol singsing preis, wosip, ol singaut na ol gutpela wok bilong Bikpela.

Long ol spesel okesen, ol i save makim na putim kamap ol singsing we i gutpela long ol.



• Kwaia ministri i singsing long Niugini Ailan lidas Developmen Forum.

Yabim ELC/PNG holim glasim wok bung

EVANJELIKEL Luteran Sios bilong Yabim distrik insait long Morobe provins i bin holim tripela wik woksop long glasim ol wok bilong ol pasto bilong ol.

Dokta Ulrich Bregman i bin go pas long dispela woksop.

Em i tok sios i wok long bungim planti senis na ol pasto i mas save long wok namel long ol pipel.

Em i tok wok pasto i bilong autim tok na sakramen tasol ol i mas save tu long wok wantaim ol pipel na save long hevi bilong kongrikesen.

Long kos tu, ol pasto i bin lukluk long hevi bilong kaunseling, eksjesis, evanjelism, stiwoosip, sios etministresen na sindaun wantaim kongrikesen.

Dokta Brrgman i bin tok hevi long wok bilong autim Gutnius tude i narakain long bipo we i gat nau ol kain salens bilong graun we pasto i mas save em i karimaut ol wok.

Bung i we i bin stat long Bundura Konprens senta bin stat long las wik na bai pinis long neks wik.



Holi Spirit i kam daun

Bikpela dei bilong Pentikos i kam pinis, na ol manmeri i bilip long Jisas ol i bung wantaim long wanpela haus. Na wantu wanpela nois i kam long Heven, em i olsem krai bilong strongpela win, na i pulapim tru dispela haus ol i sindaun i stap long en. Na ol i lukim samting olsem paia i kamap; na i luk olsem planti tang bilong man. Na ol kamap, na ol dispela tang i go nabaut na i stap long olgeta bilong ol. Na Holi Spirit i pulap long olgeta dispela manmeri, na ol i stat long mekim tok in kain tok ples, Holi Spirit i mekim na ol inap mekim ol dispela toktok.

Aposel 2: 1-4

Ol yut i wokabaut long rot bilong em

Pas ol Bisop i salim long ol Yut bilong Papua Niugini na Solomon Ailan

Dia ol Katolik yut,

Mipela i salim dispela pas i go long yupela long wanem planti tingting na toktok long yupela i stap namel tru long miting bilong mipela long dispela yia. yupela i gat kainkain gutpela presen yupela i ken yusim long sios na long kantri wantaim. Yupela i pulap long laip na mipela i laik autim gen long yupela, Jisas i stap laip! Em i save laikim yupela tumas na em i save singautim yupela long wokabaut long rot bilong em.

Taim Jubili Yia i laik pinis, Pop Jon Pol 2 i kisim bikpela amamas long dispela lain bilong ol yut i bin bung long Rom. Em i tok olse; "Ol yut i olsem wanpela spesol presen Holi Spirit i givim long Sios." Em i singautim yupela ol yut long kisim save long Jisas em i husat tru na long wokabaut long rot bilong em tude.

Mipela i save yupela i painim kainkain traime long laip bilong yupela:

- Long kamap bikpela long dispela taim we olgeta samting i wok long senis senis hariap;
- Long harim tok bilong papamama na ol tisa bilong yupela;
- Long kisim save long wanem samting i gutpela long pasin bilong ples na long ol nupela samting na long wok long bihainim ol dispela gutpela samting;
- Long kisim save long wanem samting i no gutpela long pasin bilong ples na long ol nupela samting na long wok long abrusim ol dispela samting nogut;
- Long yusim ol presen bilong yu long skul o long o sampela gutpela wok;
- Long harim tok bilong ol bikpela manmeri na long kisim ol gutpela save bilong ol;
- Long tok "nogut" long yusim Golkap o bia o hombru o spak brus;
- Long helpim ol poro bilong yu long bihainim gutpela rot maski bihainim ol long mekim

pasin nogut;

- Long wet inap long taim yupela i marit long slip wantaim narapela long maritpasin;
 - Long abrusim ol raskol grup ol i save bagarapim sindaun bilong komyuniti, na i wok long stil na bagarapim ol arapela manmeri; na
 - Long tok "nogut" long ol kainkain lida i save givim promis long yupela tasol ol i no save bihainim ol promis, o ol i wok long yusim yupela long kisim samting bilong ol yet.
- Mipela i laik i tok klia olsem, Jisas em i mak na rot long abrusim na winim ol dispela traime:
- Jisas, yangpela man i helpim Josep long wok kamda;
 - Jisas, sumatin long Tempol long Jerusalem na papamama bilong em, tupela i no save long olgeta samting em i mekim tasol em i harim tok bilong tupela na kisim gutpela save long tupela;

• Jisas, yangpela man i harim tok na em i kamap bikpela na gutpela long ai bilong God na ai bilong olgeta manmeri;

• Jisas, yangpela man i kisim save isi isi long laik bilong God, papa bilong em, na long wok misin bilong em;

• Jisas man i kisim kainkain traime tasol em i no pundaun long sin;

• Jisas man i pre long olgeta taim na long olgeta ples;

• Jisas pren bilong ol sikmanmeri na sia-manmeri;

• Jisas man i helpim ol manmeri i karim hevi; na

• Jisas, man i bihainim laik bilong God Papa, inap long dai long diwai kros.

Mipela i laik strongim yupela long wokabaut long rot bilong em long pasin wantaim sios na bung wantaim ol bratasusa bilong yupela long pre na lotu.

Mipela i laik strongim yupela long wokabaut long rot bilong Jisas long bungim em long Buk Baibel na long bilip bilong Katolik Sios.

Mipela i laik strongim yupela long wokabaut long rot bilong em long kisim em long Komyuniti olgeta taim.

Mipela i laik strongim yupela long wokabaut long rot bilong em long bungim em long laik na manmeri bilong em long Sakramen bilong Korapsen.

Mipela i laik strongim yupela long wokabaut long rot bilong em long pogivim ol i mekim nogut long yupela.

Mipela i laik strongim yupela long wokabaut long rot bilong em long helpim ol sikmanmeri na ol lapun.

Mipela i laik strongim yupela long wokabaut long rot bilong em long soim we bilong bihainim gutpela pasin long ol poro bilong yupela na ol liklik bratasusa bilong yupela.


Dia ol yut, yupela i olsem hop bilong sios na bilong kantri. Mipela i laikim yupela tru olsem na mipela i salim dispela pas i kam long yupela. Mipela i save, wanem samting mipela i askim yupela long en em i hat. Yupela i mas save. I no yupela wanpis tasol i mas wokabaut long dispela rot. Planti gutpela manmeri i save wokabaut wantaim yupela. Sapos yupela i laik wokabaut long rot bilong Jias, pasin bilong yupela i mas narakain olsem Jisas i bin narakain. Harim singaut bilong Jisas na stap strong. Mipela i save, yupela inap, long wanem yupela i olsem wanpela spesol presen Holi Spirit i givim long Sios. Laikim tru God na laikim tru olgeta manmeri olsem Jisas i save laikim ol. Bihainim Jisas! Em i stap laip na em i laik bai yupela i wokabaut long rot bilong em.




• Ol sampela yut bilong Tabubil long Westen provins i raun long hap yet na mekim wok misin raun. Foto: PATRICK LEVO.

Mipela ol Bisop bilong yupela.
Epril 27, 2001.

WINNIM



I GAT GENSET,
AIS BOKIS NA
ESKI KULA
LONG WINIM



WEEK ONE
WINNERS
1st Draw 30/05/01

GENERATOR SET
LAKI NAMBA TICKET
5040285

CHEST FREEZER
LAKI NAMBA TICKET
5022824
5080156
5060458

ESKI KULAS
LAKI NAMBA TICKET
5000385
5020333
5060123
5100587
5120604
5141999
5001588
5002741
5021456
5042435
5061813
5081287
5082335
5101676
5102351
5121699
5122601
5142258
5143432
5023012
5062059



Flame
Strength & Energy

Stori bilong namba wan Bogenvil Revoluseneri Damien Damen

VERONICA HATUTASI i raitim

WANTOK i bin kisim stori bilong Damien Damen, man husat i gat nem olsem top pawaful bikman long Bogenvil.

Em i bin namba wan revoluseneri bilong Bogenvil husat i bin kirapim pait long lukautim kastom na ol bus, graun samting bilong ol asples lain yet long han bilong ol ausait lain olsem CRA maining kampani bilong Australia, PNG Gavman na Katolik Sios long Bogenvil, stat yet long ol yia long 1960.

Twenti foa krismas bihain, Francis Ona i bin bihainim Mista Damen long skruim dispela pait tasol long narapela rot bilong yusim ol samting bilong pait na tu strongim sait bilong mani wantaim K10 bilien kom-pensesen singaut.

Husat tru em Damien Damen na wanem as tru em i kirapim dispela singaut long holim strong long pasin kastam em ritim daunbilo long stori we Wantok i bin kisim long maus bilong bikman ya taim em i stap long Mosbi long dispela wik.

Mista Damen i bin kam long Mosbi long laik bilong em yet long harim na lukim na stap insait long ol Bogenvil lidas toktok i kamap nau long Mosbi.

Ol toktok i sut long tripela samting na dispela em long, kirapim gavman i gat moa pawa, skruim independens long Bogenvil na rot bilong rausim ol wepon o ol gan samting bilong pait long Bogenvil.

Mista Damen i tok em i no poroma o birua bilong Francis Ona tasol em i stap long namel na mekim wok bilong em.

Em i tok ol arapela lida, moa yet long Sentrel Bogenvil i save kisim strong na sapot bilong em taim ol i laik go het wantaim long ol bikpela disisen na wok bilong ol.

Em i gat planti sapota na em i pulim bikpela sapot long Sentrel Bogenvil na tu em i gat luksave long olgeta hap bilong ailan.

Em bin go pas long Napidakoe Navitu, wanpela grup long Sentrel Bogenvil we ol i bin statim long 1960's long egensim CRA, koloniel gavman bilong Australia na em bin wanpela long ol lain husat i bin sapotim strong PNG i kisim independens.

Long Me 20, Mista Damen i bin wokim bikpela kaikai long ples Irang bilong em long Panguna eria we i bin kilim 26 pik na wokim bikpela disisen long lusim ples long namba wan taim na kam joinim ol arapela Bogenvil lida long ol toktok bilong painim gutpela sindaun na gavman bilong bihain taim bilong ailan.

Planti long Bogenvil olsem mi i save harim nem bilong Mista Damen olsem lida

••• Francis Ona i stap aninit long ambrela bilong em

bilong "50 Toea Gavman" em wanpela kago kalt grup insait long Sentrel Bogenvil.

Mi bin save harim tu olsem em i wanpela strongpela sapota bilong Ona tasol bihain mi stori wantaim em, mi lukim olsem planti ol samting we mi harim long em i no wankain.

Na man ya i wanpela gutpela isipela man long toktok long em tasol em i gat gutpela na bikpela save long em we i stiaim em long kamap olsem lida bilong grup we i wari na i gat strongpela bilip long lukautim na strongim pasin kastom, bus, graun wara na ol samting we i stap ausait, insait na aninit long ol.

Mista Damen tu i dispela man husat i bosim ol "No Go Zone" eria long Sentrel Bogenvil.

Pastaim em i bin wanpela skul tisa long Deomori Katolik Misin antap long Panguna eria bipo long em i go insait long wok bilong pait long strongim pasin kastom, lukautim graun, bus na wara long en.

Em bin kirapim "Mekamui Kontoku Onoring" grup long 1964, nem we Francis Ona i skruim long pait aninit long en na kolim olsem gavman bilong Bogenvil insait long dispela pait long ailan we i bin go het moa long 12-pela krismas i go pinis. Olsem planti ripot i tok, mi no etvaise bilong Francis Ona na mi no sapotim em tasol mi stap long namel na Ona wantaim ol arapela lida i kisim strong na sapot long grup bilong mi.

Stori bilong Mista Damen i kam long maus bilong em yet i go olsem:

"Mama i bin karim mi long 1930 na mi gat 71 krismas. Mi bilong ples Irang na mi gat 10-pela pikinini na 40 tumbuna. Mi bin skul long Tsiroge Katolik Misin long Buka na kamap wanpela tisa. Long yia 1959, mi bin pinisim skul.

Long yia 1963, mi bin toktok wantaim Yunaitet Nesens lain long wari bilong mi long wari bilong mi. Misin (Katolik bikos em bin strongpela long Bogenvil) na Gavman i bin sanap long wanpela sait na Yunaitet Nesens i bin sanap long narapela sait. Faivpela samting we mi autim wari long ol em marasin, lotu, bisnis, gavman bilong ples yet na pasin kastam we i mas sanap strong. Planti pipel i bin egensim mi na sutim tok olsem mi wokim kago kalt. Tasol dispela i no tru bikos samting tru em mi laikim bai yumi mas sanap strong long pasin kastom. Na ol ausait lain i noken mas bagarapim ol tumbuna pasin, graun, bus na wara na ol bilip bilong yumi.

"Long taim Bogenvil provinsel gavman i stap, mi bin rejistaim grup bilong mi olsem Pravit Gavman tasol ol (provinsel) atoriti i givim nem "50 toea Kagoi kalt Muvmen". Tasol dispela i no tru. Mi bin laikim bai Bogenvil i sanap strong long pasin kastom.


Mi na ol planti sapota bilong mi i stap na hevi long Bogenvil i kamap tasol mi no go insait long en. Pait bilong mitupela i narakain liklik bikos taim Ona i pait long mani na bagarap we main i kamapim long bus graun samting. Tasol pait na wari bilong mi i sut long strongim na lukautim sanap long kastom, Bogenvil i mas gat gavman bilong em yet na tu lukautim bus, graun na wara na ol ausait lain i noken bagarap ol kastom na graun bilong yumi.

Mi no egensim Katolik Sios tasol mi no bin wanbel long ol bikos olsem gavman, ol i bin kisim bikpela hap graun bilong ol asples pipel na wokim ol plantesen long ol.

"Insait long taim bilong hevi na taim PNG ami na gavman i kam bek long Bogenvil na ol toktok bilong stretim hevi long ailan i kamap, mi stap na glasim, skelim ol samting na lukluk i stap. Long dispela wik, mi bin lusim Panguna long kam long Mosbi bikos mi bilip olsem ol toktok long politikel futja bilong Bogenvil i wok long bihainim raitpela rot. Mi bin wokim kaikai long tokaut long bikpela tenis long polisi bikos mi pilim olsem dispela em i raitpela taim long kam na joinim ol arapela Bogenvil lida na pipel insait long ol toktok we i karamapim poli-irikel, sosel, ikonikom na ol arapela bikpela samting long Bogenvil. Mi amamas long lukim olsem ol yangpela lida long Bogenvil i wok long bihainim raitpela rot long ol negosiesen we nau i wok long karim kaikai.

Wanpela samting we mi sori long lukim em long sampela soldia na ol BRA husat i bin pait long Bogenvil i stap yet long kalabus.

Mi laikim bai Nesanel Gavman i givim amnesti o pogivim ol rausim ol dispela lain soldia na BRA long kalabus. Moa yet mi laikim ol dispela tripela soldia we i bin stap insait long Sandline hevi na ol i kalabusim ol long las yia long gavman i mas lusim ol i kam aut long kalabus. Presiden bilong Bogenvil Pipels Kongres Joseph Kabui na namba tu bilong em James Tanis i sapotim mi tu long dispela singaut. Long mun Epril tasol long dispela yia, Praisim Minista Sir Mekere Morauta i bin givim amnesti long ol soldia long Mari Bareks na em i opim rot pinis long dispela. Na nau em i raitpela taim long Nesanel Gavman i givim amnesti



• Damien Damen taim em i yangpela.

long Kepten Bola Renagi, Namah na ol arapela poroman bilong ol na ol BRA tu i stap long kalabus long Keravat na we hap moa, "Mista Damen long pinisim stori bilong em i tok.

Presiden Kabui i tok em i bin wanpela sumatin bilong Mista Damen husat i kandere tu bilong Francis Ona. Na em i tok Mista Damen em i namba wan na orijinel revoluseneri o man husat i bin kamapim namba wan tingting na pait long Bogenvil i mas gat gavman bilong em yet. Na em i namba wan man long salensim ol ausait grup long lukautim kalsa na bus na graun bilong Bogenvil. Em i tok Mista Damen i no egensim sios bikos em bin save kisim tingting bilong ol na sekim ol samting wantaim sampela long ol olsem Pater Dennis Mahoney, Pater Jim Moore na Pater Carlton Grainier em ol wait pater husat i bin save beis long Bogenvil long ol gut taim. Na Mista Kabui i tok Damen i wanpela biknem lida i gat pawa insait long Sentrel na Bogenvil Ailan yet

Deputi Vais Presiden James Tanis husa i bin stretim wokabaut bilong Mista Damen i tok em bin save long Mista Damen long 1994 tasol taim Francis Ona i bin putim em long haus areo o kalabus.

"Mi bin laik save gut long em (Damen) na mi amamas long wokim dispela muv.

"Bihain mi go long ples, bai mi wokim namba tu kaikai na tokim ol lain bilong mi long rot we ol Bogenvil toktok i go long en na wokabaut bilong mi long Mosbi.

Mi pilim gutpela na amamas na mi no pret. Mi amamas long ol bikman long gavman, ol diplomat bilong ol arapela kantri na ol Hai Komisijn lain i kam na sekan na tok-tok long mi.

Francis Ona i wok long hait i stap tasol em tu i wok long lukluk na glasim ol samting i stap. Em yet bai i kamaut long taim bilong em yet, mi no inap long tokaut wanem taim tru dispela bai kamap.

Sapos em i tingting olsem wanem em i ken kamaut, bihainim mi bikpela kandere bilong em," Mista Damen i tok.

Tupela Mista Kabui na Tanis i autim bikpela tok amamas long kam bilong em long Mosbi na tok kam bilong Mista Damen long stap insait long ol Bogenvil toktok long Mosbi i bikpela samting na i apim ol wok bilong painim gutpela sindaun long Bogenvil na tu long futja Bogenvil gavman.



STRONGPELA WOK PAWA WANTAIM TOYOTA

Delta trak ol i wokim strongpela long kondisen bilong PNG. Pawa wantaim Toyota disel ensin yu ken trastim Delta long wokim wanem kain wok yu laik wokim hariap tru. Kam lukim ol kain Delta trak, longpela kab, stended kab, dabul kab na tipper trak. Lukim Ela Motors long moa toksave.

Ela Motors
DAIHATSU

Em nau...
gutpela tru!

I tambu long saspenim ol sumatin husat i no peim skul fi

HELEN REI i raitim

NOGAT wanpela hetmasta, prinsipel o bod siaman bilong ol nesenel hai skul i gat rait long saspenim ol sumatin husat i no peim skul fi bilong ol.

Suprintenden bilong Sekenderi na Open Lening Mista Simon Aruai i tok sapos ol i saspenim ol sumatin bai ol i go egensim Nesenel Edukesen Bod (NEB) disisen.

Em i tok long edukesen polisi ol sumatin ol i makim na ol i go long skul olsem ol i mas stap long skul. Nogat wanpela i gat rait long rausim ol sumatin tasol Edukesen Sekretari Mista Pita Baki tasol i ken stopim ol sumatin long no ken go long skul. Ol hetman o bikman bilong skul i nogat rait long tok nogat long ol sumatin.

Mista Aruai i tok edukesen polisi i tokaut klia olsem taim wanpela pikinini i enrol em i gat rait long kisim save na nogat narapela man i ken stopim em. Ol papamama i gat wok long painim skul fi na dispela i no wok bilong ol pikinini.

Em i tok bihain long ol sumatin i kisim pinis mak bilong skul orait skul i ken holimpas sertifikat bilong ol na ol i ken pinis peim hap hap skul fi bilong ol.

Mista Aruai i tok ol papamama i save gat bikpela belhevi long wanem ol i no save kisim toksave hariap

olsem pikinini bilong ol bai i go long nesenel hai skul o nogat na long Jenuari taim pikinini i mas go long skul ol i save painim hat long bungim mani long skul fi. Na taim ol papamama i gat ol narapela pikinini tu long lukautim long sait bilong skul fi, dispela i save givim moa hat wok.


Ol sumatin long Pasam Nesenel Hai skul em skul i saspenim klas na ol i givim dei long ol i mas peim skul fi.

Mista Arua i tok dispela pasin em skul i ken mekim tasol i bai i no inap salim ol pikinini i go long haus long wanem em bai egensim NEB disisen.

Prinsipel bilong Pasam Mista Teri Riles i tok em bai hat tru long wanem ol sumatin ino ol asples. Ol i kam long olgeta hap bilong kantri na i bai hat long baim balus bilong ol i ken go bek long ples long painim skul fi mani. Aiyura na Kerevat nesenel hai skul i hat long kisim toksave long ol na Sogeri nesenel hai skul prinsipel i no laik toktok long dispela.

Port Mosbi nesenel hai skul em dei skul na i nogat planti hevi long skul fi. Prinsipel Mista James Urme i tok 87 pesen bilong ol sumatin i peim skul fi pinis na skul i holim 6-pela setifiket bilong ol sumatin i ken pinis peim ol fi.

Olgeta prinsipel i bin bung na kamap wantaim wanpela polisi na dispela bai Mista Baki bai i lukluk na mekim disisen long neks taim.



Ol skul pikinini long Laloki Praimeri skul i sindaun ausait long harim ol toktok bilong ol Ombudsmen Komisn. Klasrum bilong ol i bagarap olgeta na ol i giaman pasim wantaim ol lip kokonas.

ELC-PNG opim edpos long Madang

EVENJELIKAL Luthern Sios ov Papua Niugini (ELC-PNG), i opim wanpela nupela ed pos long Madang.

ELC-PNG i mekim dispela wok long sait bilong ol helt progrem em i save go pas long ol ples maunten na bus eria bilong Madang provins.

Dispela helt progrem i wok long kamap gut tru long Madang na sios i givim moa sevis long ol pipel long helt.

Long taim bilong opening bilong dispela ed pos long Tapen, Lutren Helt Sekretari Mista Donn Kudan i tokim moa long 200 manmeri husait i kam long opening olsem ELC i gat bikpela tingting long wok klostu wantaim ol manmeri long ples na karim aut ol wok progrem bilong helt.

Long dispela taim long ol narapela hap long kantri sampela hausik i laik pas long wanem i no gat mani long ranim ol hausik tasol ELC i luksave olsem i gat nid long man i mas kisim gutpela helt long kamap gut.

Madang Provinsal Helt Assistent Edvaise Mista Markus Kachau na OIC bilong Saidor Helt Centa em tupela bikman bilong helt dipatmen bilong Madang i bin go long witnesim dispela opening. olgeta kamap long dispela opening bilong ed pos.

Tupela man tu i amamas olsem Lutren Helt Sevis i opim ed pos na dispela i helpim provins long ol pipel bilong

Madang i ken kisim gut sevis long helt.

Na narapela bikpela samting LHS i mekim tu em long lonsim nupela bot bilong Helt nem bilong em MV-Lu Helt.

Dispela bot bai i raun long ol nambis ples olsem Raikos, Saidor na Bongu.

MV-Lu Helt i wok long karim aut wok long dispela mun Me na givim sevis long ol lain bilong nambis tu.

Narapela gutnius tu olsem LHS tu i opim nupela ed pos long Biliau long progreme bilong Praimeri Helt Program long wok bilong ol veneral sik olsem HIV-AIDS.

Mista Kachau i tok amamas long pipel na em i askim ol long luksave long ol wok bilong helt name long sios ELC-PNG na gavman.

Mista Kudan i tok wok bilong LHS sevis long Kambuku go het long wok progreme bilong em na ino inap stop inap helt sevis i go long olgeta lain long provins.

Boram haus sik sot long mani

HELEN REI i raitim

BORAM Hospital long Is Sipik provins i kamtim daun ol sevis bilong em long wanem i nogat fand i kam long Fainens Dipatmen long helpim long ronim hausik.

Hausik Bod Siapesen Laura Martin i tok hausik i no kisim mani mak long K60,000 we ol i save kisim long olgeta mun na ol i no kisim bilong mun Epril na nau em mun Me klostu pinis.

Misis Martin i tok hausik i nidim moa long K60,000 long oparet tasol ol lain bilong mani i tokim ol long wok insait long mak bilong K60,000.


Em i tok ol i pasim ol narapela seksen bilong hausik na opim tasol imegensi na wod bilong ol mama karim pikinini inap long kain taim we hausik i gat mani long givim kaikai long ol sikman. Em i tok ol sik manmeri i mas go long ol ed pos klostu long ol tasol em i no save sapos ol ed pos i gat marasin i stap. Nogat bai ol i mas go painim long narapela hap.

Misis Martin i tok ol i bai kisim ol man husait i sik nogut tru na klostu i laik dai na em i tok hausik i save kisim liklik fi long ol sik manmeri tasol dispela i no inap long helpim ol na tu sampela i no save peim fi na kisim marasin nating.

Em i tok ol i no kisim gutpela bekim na ol i wet yet long wanem taim bai ol i kisim mani. I gat 13-pela dokta i wok long hausik na planti senis i kamap long na ol wok lain i laik wok. Tu i gat sampela yangpela dokta husait i laik kisim trening long wok long hausik.

Ol i wet tu long ol lain bilong Odita General long sekim ol buk bilong ol long wanem i bin gat toktok olsem sef eksekutiv na bod bilong hausik i bin paulim mani bilong hausik.

Helt dipatmen i bin karim aut investigesen bilong em tasol ol i wet long Odita General tasol bipo long ol givim toksave tasol ol i wet longpela taim tru long wanem toktok i kamap long Jenuari na dispela em pinis bilong mun Me nau.



Skul bilong samap i kamap long C'Annosa Skul ov Laip ausait long Mosbi.

Ol tisa kisim skul long edukesen rifom long Nu Ailan

TONY SAPAN i raitim

SAMPELA gred siks tisa long ol wanwan praimari skul long Nu Ailan i pinisim wanpela insevis woksop long rifom kurikulum.

10-pela gred siks tisa bilong ol reform skul long provins long ol skul long Taskul na Namatanai distrik na 5-pela i bilong ol skul husait i bai tisisim gred siks reform skul long 2002 na 3-pela skul inspekta i bin kam long dispela woksop bilong ol tisa. 1-plea sinia inspekta na elementri

skul kodineta i go long woksop long luksave tasol long wanem kain woksop ol i mekim.

As tingting bilong dispela woksop em long ol elementri skul tisa i ken kisim skul long edisen wan reform kurikulum na luksave long ol kos material we ol i bai yusim long givim skul long ol rifom skuls.

Ananit long nupela rifom long ol skul long provins na kantri wantaim, ol tisa i nidim planti helpim long luksave gut long ol senis i kamap na ol woksop oganisa i tok dispela bung tasol ino inap givim gut skul long ol.

Tasol ol tisa i amamas tru long skul ol i kisim dispela i helpim ol long ol i ken tisisim ol nupela kos long ol wanwan skul bilong ol.

Dispela em wanpela tasol i gat 2-pela moa woksop bai i kamap long givim moa skul long ol tisa husait i save tisisim ol gred 6, 7 na 8 sumatin ananit long ol rifom.

Woksop em Nesenel Dipatmen ov Edukesen tru long Curriculum Developmen Divison i bin mekim wantaim ol boss bilong provinsal edukesen dipatmen.

Plen long sanapim viles kot long Sogeri eria

KENNEDY EDENE i raitim

SENTREL Provinsal Edministresin Provinsal Viles Kot Opis bai kamapim wanpela fisibiliti stadi bilong sanapim ol viles kot insait long Sogeri eria long dispela yia.

Dispela stadi bai ol Provinsal Kots Inspektas bai ol i visitim olgeta Koiari lokol levol gavman kaunsil wod erias insait long Sogeri Koiari eria.

Provinsal Inspekta Moses ilkui na tim bilong em bai ol go long ol wods na komyuniti na kisim infomesin long samting olsem lo na oda na long sait bilong sosel ripot long hau ol manmer ol i stap long ples bilong ol. "Bihain bai ol inspektas ba raitim wanpela infomesen pepa na dispela pepa bai tok aut long hamas viles kots na viles kot opisels bai ol i nidim na setim insait long Sogeri," Mista Elkui tok save.

Presiden bilong Koiari LLG, Mista James Selu tok, Maunt Koiari wods ol i gat viles kot sistem pinis tasol em Sogeri Koiari tasol, ol i nogat yet.

Dispela stadi bai kamapim 16 kaunsil wod erias na ol tim em stat pinis long las wik Me 21 long Osabewai na bai pinis long June 10 long Edevu wod.

Dispela 16 wods na deits bai ol tims go aut em olsem.

Det Kaunsil Wod	Wod Ples
21/5/2001	1
Osabewai	Goldie
22/5/2001	2
Mesime	14 Mile
23/5/2001	3
Madowate	"
24/5/2001	4
Furimuti	15 Mile
25/5/2001	5

Depo	Sogeri
28/5/2001	6
Vesulogo	"
29/5/2001	7
Befa	"
30/5/2001	8
Kailaki	"
31/5/2001	9
Doe	"
1/6/2001 10	"
Ogatana	"
4/6/2001 11	"
Kahaitana	"
6/6/2001 13	"
Waritanumu	"
7/6/2001 121	"
Sogeri Eben	"
8/6/2001 120	"
Goldie Eben	"
11/6/2001	19
Edevu	Brown River

Ol Kunua/Keriaka sief kwestenim helpim bilong AusAID na EU long Bogenvil

TEUA Kaunsil ol Eldas long Kunua/Keriaka distrik i putim strongpela singaut i go long Nesenel Gavman long givim helpim mani long stretim hap rot bilong Siara/Korepovi trunk rot. Dispela i kam aninit long nupela rot mentenes polisi we ol bai karimaut long olgeta hap bilong kantri olsem Nesenel Woks Minista i bin tokaut long en.

Siaman John Silveisi na ol sief long eria i salensim Not Bogenvil memba Michael Ogio husat i no go lukluk raun lukim ilektoret bilong em long longpela taim stat yet long taim em i bin winim sia long wokim samting nau.

Provinsal Gavman i basetim K360,000 bilong karimaut ol wok long Siara/Korepovi rot na siaman wantaim ol sief i wok long kwestenim sapos AusAID na Yuropien Yunien bai tromoim mani long stretim rot long olgeta hap bilong ailan o long sampela hap tasol we intres bilong ol i stap long en.

"ol dispela ogenaisesen i mas mekim ol kliapela polisi na watpo ol i stap long Bogenvil na ol i laik helpim husat tru," ol sief i tok.

Ol i tok ol i no lukim yet dispela K15 milien we Yuropien Yunien lain i bin toktok long en long las yia bilong stretim ol han rot long Bogenvil.

Tude em de bilong tok Nogat long Smok

DIPATMEN bilong Helt i mekim bikpela plen long kamapim sampela pilai na ol samting long makim Wol No Tobako De long Me 31, Fonde tumoro.

Darekta bilong Helt Promosen na Proteksen Mista Linsay Piliwas i tok planti samting bai kamap long Mosbi na ol bai salim infomesen i go long narapela provins na laik bilong ol long plenim ol aktiviti long makim de.

Planti aweanes program bai kamap long Mosbi neks wik namel long ol skuls long Nesenel Kapitel Distrik (NCD). Ol skul pikinini bai mekim ol drama na raitim ol liklik stori long nogut bilong smok.

Nesenel Kapitel Distrik Komisin tu bai raun long 3-pela skul na mekim aweanes bilong em long ol nogut bai kamap taim wanpela i laik smok.

Ol skul husat i bai go pas long ol dispela aweanes em Karitas Gels Teknikal Skul,

Pot Mosbi Nesenel Hai Skul na Gerehu na Tokarara Hai Skul. Ol tisa bilong ol dispela skul, ol sumatin na papamama bilong ol sumtain bai bung wantaim long makim dispela dei.

Em i tok ol nius lain i gat bikpela wok long karimaut toksave na helpim ol aweanes.

Narapela we long aweanes em long tokbek long redio we ol bikman bilong helt olsem Helt Sekretari Dokta Puka Temu, Profesa Isi Kevau bilong-Sir Buri Kidu Heart Foundation na Dokta Gilbert Hiawalya bilong DOE bai givim toktok.

Mista Piliwas i tok bikpela as tingting bilong ol aweanes em long helpim ol pipel long senisim pasin bilong ol long smok long katim daun ol problem bilong smok.

Em i tok ol i wok klostur wantaim NCCD long lukluk long ol lain i no ken smok insait long ol PMV bas long siti.

Kwinslen ges projek i stap yet

GES Projek namel long PNG na Kwinslen, Australia i stap yet, Praim Minista Sir Mekere Morauta i tok.

Em i wokim dispela toktok bihain long em i bung wantaim ol lain i makim ol kampani husat i developim projek ya na ol i tokim em olsem projek i stap yet.

Ol dispela toktok we i tok projek i stap yet i gutpela bikos ol ripot i bin kamaut wei tok meja patna long dispela projek em Kwinslen Stet gavman, i rausim sapot bilong em long projek.

Sir Mekere i tok bung wantaim ol developa bilong projek i bin toktok long ol samting we olgeta lain i wari long en.

Dispela i karamapim ol samting olsem maket arenjmen long Kwinslen, ol samting i sut long takis na koporet bodi we bai lukautim intres bilong stet long projek ya.


"Stet bai i gat intres long dispela ges projek long Kwinslen.

"Ol i wok long toktok long dispela samting nau," Praim Minista i bin tok.

Sir Mekere i bin tok save tu long tingting bilong gavman long kisim bek long wok foma menesing dairektabilong Minerels Risos Developmen kampani Charles Lepani olsem kodineta bilong ges projek.

"Mista Lepani i kisim i kam insait long sait bilong gavman bikpelas na gutpela ekspirians bilong em na luksave i kam long ol ausait kantri bikos em i wok long ol dispels eria, "Sir Mekere i tok.

Mista Lepani i bin holim klostu wankain wok long developim Kutubu oilfil, bai helpim Ministeriel Ges Komiti long nupela wok we ol i makim long en.



• Ol sumatin i wok long liklik wara projek long Le Teknikel kolis.

Nari Agricultural Research Institute of PNG (NARI) in conjunction with Australian Contribution to the National Agricultural Research System (ACNARS) Invitation for Bids for Tenders # 01/5/23/1 and 01/5/23/2

PROJECT TITLE: Australian Contribution to the National Agricultural Research System.

CONTRACT TITLE: Facilitation of workshops: "Women's Voices in the Food Chain" for Highlands and Southern Regions.

Tenders close: 25th June, 2001.

Bids are invited from experienced, creative and appropriately qualified facilitators, to assist in final planning and daily management of 2 workshops for women involved in the food chain.

Information about the tender can be obtained by writing to "Facilitator Tender" ACNARS project, NARI, P.O. Box 4415, Lae or directly fro NARI offices 2nd floor, Vele Rumana, Lae City. Telephone enquiries can only be accepted from tenders in possession of tender documents.

VERONICA HATUTASI i Raitim

KOPIRAIT ol lukautim ol save na ol samting we man, o wanpela kalsa grup o kantri yet i gat o i wokim long save na hatwok bilong ol em i bikpela samting.

PNG i kamapim Kopirait lo long las yia tasol em i no strongpela yet.

Dairekta bilong Nesenel Kaiserele Komisin Dokta Jacob Simet i no long taim bin stap insait long tupela semina o bung long ovasis we ol i bin paitim ol toktok long skruim ol lo bilong lukautim ol save na ol propeti samting.

Tupela semina i bin glasim situesen i wok long kamap long Esia na Pasifik rijen na tu long wol long skruim Inteleksuel na Propeti Raits Lo glasim wantaim intenesenel stendet.

Wol Inteleksuel Propeti Ogenaisesen (WIPO) i bin ogenaisim dispela semina we i bin kamap long Oklen Nu Silan long Me 8 inap long 10 na APEC i bin sponsaim narapela we i bin kamap pastaim

long Mas 7 inap long 9 long Japan.

Dokta Simet i bin tok tru nupela infomesen teknoloji olsem Intenet i kamapim ol gutpela samting tasol em i gat ol hevi na ol samting i no gutpela tumas tu long en.

Em i tok bikos planti samting i wok long kamap hariap tasol long Intenet, telivisen na ol arapela nupela kain teknoloji olsem, NCC i wari, moa yet long samting we i ken bagarapim tingting bilong ol pikinini.

Em i tok wantaim ol dispela nupela teknolji we i wok long kamap hariap tumas, moa yet long Intenet, em i hat long kontrolim ol samting we i wok long kam insait na pablik i wok long kisi, lukim na ritim long en.

Em bin tok ol semina ya i bin glasim wok long skruim kopirait long we i karamapim Agrimen long Tred na ol samting i kam aninit long Inteleksuel Propeti Raits (IPRS) long glasim ol rot bilong yusim na sekim Infomesen Teknoloji na IPRS long en.

Ol woksop ya i bin autim ripot olsem Amerika, Japan na Sainai wok long

bungim hevi long long skruim IPRS lo bikos bikpela wok paiesi o salim o wokim na salim ol kopiket samting i wok long kamap long kamap, moa yet long ol Esia kantri.

Olgeta hap bilong Esia, moa yet long Saina, HongKong, Tailen i wok long karimaut ol wok paiesi.

Tok piksa em long ol biknem wol tredmak kampani olsem Nike o Dunlop we i save kamapim ol kwaliti su. Tasol long dispela taim, ol wok paiesi i kamap we sampela kampani long Esia i save wokim ol kopiket long ol orijinel kampani na salim ol samting long sip prais. PNG i save kisim planti long ol dispela samting tasol i nogat strongpela rot yet long sekim ol dispela samting.

Dokta Simet i tok i long PNG i gutpela long ol lain olsem opis bilong Ateni Jenerel, Kastoms Dipatmen, Pliis na NCC long sindaun wantaim na toktok long ol samting we i karamapim kopirait na IPRS, Tredmak, Infomesen teknoloji na ol lowe ol dispela samting i ken kam aninit long em.

Kopirait lo em bikpela samting

Tude em Wol No Tobako De

• Tude (Fonde Me 31, 2001) em bikpela de insait long wol we ol i kolim Wol No Tobako de. Wol Helt Ogenaisesen (WHO) i makim dispela de tude long olgeta memba kantri long tingim olsem em i de bilong luksave na skelim hevi we smok i save mekim long laip bilong yumi ol manmeri bilong graun.

Helt Dipatmen na ol sapot grup bilong en i kamap wantaim ol progrem na ol sampela samting putim aut na karimaut olsem awenes egensim pasin bilong smok.

Smok em yumi olgeta i save long smok lus sigeret, spia na mutrus o brus. Dispela em WHO i makim de bilong egensim smok.

• Ol pipel bilong Westen hailans provins Banz i mekim wanbel na peim kompensesen igo long biknem kopi bisnisman long hap long las wiken. Ol pipel i peim K10,000 na mekim bikpela kaikai na sikan long Dick Hogan long pasin sampela asples lain i mekim long paitim em na go insait long banis na brukim ol samting na kilim ol dok bilong em long las mun.

Ol pipel i bin mekim dispela trabel long Mista Hogan bikos long tok pait na kros

bilong graun na Waghi Mek kopi plentesen long hap.

Long las wiken ol i bin stretim dispela bel hevi na peim kompensesen long Mista Hogan. Mista Hogan em longtaim man long Westen Hailans provins na i bin stap insait long kopi bisnis longpela taim tru i kam nau.

• Ol lida bilong Morobe provins long sait bilong nesanel na provinsal i sindaun long wanpela bung bilong ol long dispela wik long Bundun Konfrens Senta long glasim na sekim gen 5 Yia Plen bilong Morobe provins. Dispela 5 Yia Plen i kamap long 5-pela krismas bilong em long dispela yia olsem na ol i lida i sindaun glasim gen long lukim sapos i gat rum long putim kamap sampela moa senis o larim ol plen i stap olsem yet. Dispela plen em bilong Morobe Provinsal Gavman i sanap long en long mekim ol wok bilong em long lukautim provins long sait bilong sevis na developmen.

• Long las wik i kam, planti Minista i stat long go insait long ol nupela opis bilong ol bihain long Praim Minista i makim nupela

wok long ol. Sampela i senis go long nupela opis. Long las wik olgeta Minista husat i muv i go long nupela opis i mekim olgeta dispela wok long sikan wantaim olpela Minista bilong dispela opis na ol i go insait stretim opis na ples bilong ol long sindaun na wok. Wanpela Minista i painim olsem nupela opis bilong em i nogat sia, tebol na ol masin bilong mekim wok wantaim na em i no amamas tru. Dispela i soim olsem taim olpela Minista i bin go aut, em i karim olgeta samting bilong opis na go wantaim em.

• Plis long Mosbi i tok lukaut long ol bikhet lain husat i save go raun na pulim hanbek o kamapim trabel long ol gutpela manmeri olsem ol i mas tingting gut taim ol i mekim pasin bilong ol bikos nogut birua i tanim bek long ol.

Bos bilong Mosbi plis i bin mekim dispela toktok bihain long wanpela meri i sutim wanpela yangpela boi wantaim naip na kilim em. Narapela em wanpela yangpela man i laik stilim mani bilong PMV bas we em i yusim sotgan. Tasol ol pasindia long PMV bas ya i holim em na bagarapim em nogut

OL
HAP HAP
nius

tru. Kainkain man long strit i kisim sans long paitim em.

• Praim Minista Sir Mekere Morauta long las wiken i bin lusim PNG na go long Saina. Praim Minista i bin go wantaim sampela bikpela bisnis manmeri bilong kantri we ol i go bilong mekim pren na kamapim tingting bilong opim bisnis wok namel long ol yet hia long PNG na Saina. Long dispela wik Praim Minista i bungim Praim Minista bilong Saina we tupela i toktok long ol bikpela toktok bilong wok we i ken helpim PNG long developmen. Praim Minista i bin tokaut olsem PNG i gat planti risos long bus, graun na wara tasol i nogat inap saveman na ol masin bilong mekim ol wok wantaim ol dispela risos. Bai i gat sampela toktok wanbel na agrimen we bai i lukim Saina na PNG i sainim wantaim long mekim wok antap long en long bihain.

PNG soim stret Wan Pati Gavman

NAU yumi olgeta i lukim pinis olsem Pipels Demokretik Muvmen (PDM) em wanpela bikpela politikel pati insait long Gavman we Sir Mekere Morauta i go pas long en. PDM i bikpela bikos em i gat namba olsem 70 memba i stap insait long Gavman na insait long namba bilong ol wok Ministri, tripela Ministri em Chris Haiveta na Sir Pita Lus bilong Pangu Pati i kisim tupela na Moi Avei bilong Nesanel Alaiens i holim wanpela. Na olgeta 29 Ministri em ol DPM memba tasol i holim. Taim olgeta Minista i save sindaun gen long kabinet bung, yumi ken lukim olsem tripela man i no inap winim wanpela toktok o vot egensim 29 lain bilong PDM. Olsem na wanem kain plen o ol bikpela toktok PDM i laik kamapim bai NEC i oraitim tasol bikos ol i gat namba long votim.

Long sait bilong ronim Gavman tu em i no hat moa long PDM i ken ronim Gavman em yet bikos em i gat 70 memba pinis. Em i ken kamapim baset na mekim ol sampela bikpela senis insait long kantri bikos ol bai winim namba long vot insait long floa bilong palamen.

Olsem na dispela i soim klia olsem maski long ol arapela pati i stap long Gavman, namba bilong ol i no bikpela samting bikos PDM yet i ken ronim Gavman wantaim namba bilong em. Dispela i olsem Wan Pati Gavman.

Sapos i tru i gat Wan Pati Gavman, dispela i gat planti gutpela na nogut sait i stap long en. Long gutpela sait em, i isi long Gavman i ken mekim kamap olgeta plen na polisi bilong em long wanem kain luksave na tingting em i laik lukautim na ronim kantri. Em gutpela long stretim hevi bilong Bogenvil long dispela rot bikos taim bilong mekim na kamapim lo bilong sanapim Bogenvil Gavman, bai palamen i no inap abrus bikos PDM i gat 70 vot pinis na wantu tasol bai Bogenvil Gavman i kirap sanap na olgeta kros pait bilong bipo i kam nau bai pinis olgeta. Ol bikpela wok dispela Gavman i kamapim olsem praivetaisesen long salim olgeta bisnis bilong Gavman bai i go het gut tru bikos PDM i gat namba long muvim ol lo na wok bilong praivetaisesen. Na dispela em wanpela bikpela tingting bilong PDM long salim olgeta Gavman bisnis olsem na i nogat rot long stapim nau na ating dispela inap kamapim mani bilong bekim ol dinau Gavman i gat long bipo i kam. Dispela em



• PNG Leba Pati ... Nupela politikel pati ol i kolim Leba Pati long PNG. Lida John Paska i holim pepa bilong pati na olgeta yunion memba i sanap raunim.

toktok bilong Praim Minista Sir Mekere Morauta. Lo bilong Intagrity ov Politikel Pati na Kendidet i kamap pinis na PDM bai sanap bihain long lukim dispela lo i wok i go insait long 2002 nesanel ileksen long neks yia.

Sampela nogut bilong Wan Pati Gavman em, ol lida husat i stap insait long dispela pati i mas ol tru lida wantaim klinpela tingting na gutpela bel. Bikos planti bikpela lo na senis bai ol yet i go pas long pasim toktok na tingting long kamapim bikos ol i laikim bai kantri i ron bihainim dispela save na tingting bilong ol. Kain olsem wok bilong praivetaisesen we ol i kamapim pinis. Sapos dispela samting bai i ron stret long plen na tingting bilong sevim kantri bai i orait. Tasol sapos em i ron long sait we prais bilong olgeta samting bai igo antap moa na ol bisnis pren bilong ol yet bai gat interes insait long ol dispela Gavman bisnis em bai i no gutpela moa long kantri. Bikos PDM bai sanap olsem wanpela bikpela na strongpela pati yet na em bai i gat mani olgeta yia long lukautim ol memba na pati. Na olgeta taim ol bai go pas long Gavman bilong PNG. As bilong en bikos ol bai

sanapim strong bilong ol pinis wantaim ol bisnis na mani na yu husat memba i kam long palamen yu ken joinim pati isi tasol bikos yu sanap pinis long strongpela graun.

Wanpela hevi tu em olgeta taim bai ol PDM i lukautim olgeta wok Ministri long Gavman na arapela pati bai i nogat aninit long dispela Wan Pati Gavman. Na olgeta taim bai kantri i bihainim polisi bilong dispela pati tasol. Maski polisi bilong em i tromoi kantri i go daun na yumi laik senisim Gavman, tasol em bai hat bikos 70 memba bilong Palamen em ol bilong wanpela pati. 39 arapela memba bilong arapela pati em ol i nogat namba long kamapim vot i nogat bilip long senisim dispela Wan Pati Gavman bikos namba bilong ol i no nap long kamapim vot.

Narapela hevi tu long dispela em taim i gat Wan Pati Gavman, bai i nogat gutpela Oposisen we Lo i laikim. Sapos i nogat gutpela Oposisen, Gavman bai olgeta taim go het wantaim wanem kain laik na save bilong em bikos nogat man bai toktok egensim em. Bai i nogat gutpela Oposisen bikos arapela pati bai tingting long joinim Gavman. Maski ol i no kisim wanpela Ministri, tasol ol bai sindaun beksait long

sait bilong Gavman. Olsem na namba bilong Oposisen bai pundaun na bai i nogat Oposisen bilong salensim Gavman.

Sapos dispela em i tingting na plen bilong sampela saveman bilong PNG long kamapim Wan Pati Gavman, orait larim na yumi lukim sapos bai i wok. Tasol ol i mas kam aut ples klia na tokaut long wanem as na ol i laik kamapim dispela kain rot. Sampela taim planti toktok egens tumas i save pasim ol bikpela wok developmen na ol projek long kamap. Olsem na ating dispela tingting i kamap long pusim ol plen na polisi igo fowet long lukim ol wok tru i kamap long kirapim kantri. Tasol olgeta samting i save go insait long rot bilong traun na skelim pastaim. Olsem na sapos yu traun na wok i no ron gut na i pundaun, olgeta samting tu i pundaun. Sapos i wok, gutpela kaikai bilong wok bai kamap long kantri.

Pasin bilong Wan Pati Gavman i no bin kamap yet long wanpela kantri insait long Komon Wol. Olgeta kantri long Komon Wol i save gat Kolisen Gavman o tupela pati save marit long kamapim Gavman.

Ripot tok ol man Polinesia i save belhat na kros pait kwik

WANPELA ripot i tok Auckland i gat bikpela mak bilong paitim na mekim nabaut long narapela man long Westen wol o ples bilong ol waitman bikos long ol Polinesia populesen i stap long hap.

East na Bays Courier Niuspepa i autim dispela ripot.

Pepa ya i autim ripot bilong wanpela yuni-versiti leksera long Kriminolojis Gfeg Newbold husat i tok ol mak long ol Polinesia lain i kamapim pait na hevi i stap foapela taim antap long ol arapela grup.

Ol Polinesia pipel em ol asples Maori na ol pipel bilong ol Pasifik kantri olsem Samoa, Kuk Ailan, Tonga na ol arapela moa husat i save stap long Nu Silan.

"Auckland em kapitael bilong ol Polinesia pipel long wol na ol Polinesia i gat bikpela

mak long kamapim trabel na pait long ples na long streti," East na Bays Courier Niuspepa i tok.

"Sapos i gat moa Polinesia pipel, mak bilong ol hevi na pait bai go antap. Dokta Newbold i tok.

Bihainim dispela, em i tok i gutpela long kisim moa Paolinesia na Esia plis bikos ol bai save long kalsa bilong ol wantok bilong ol.

Em i tok ol Maori na Pasifik Ailan em ol i gutpela plisman bikos ol i wok long dil wantaim ol pipel bilong ol yet we ol i gat save long pasin na kalsa bilong ol.

Em i tok i no gutpela long ol wait plisman long stretim hevi namel we wanpela Polinesia grup o famili i gat bikos em i no inap long luksave gut long hevi bilong ol long wanem kalsa bilong ol i

narakain. Sosioloji Dokta wantaim Auckland Yunivesiti Tamasailau Suaali i tokim niuspepa olsem tru i gat nid long kisim moa Polinesia plisman tasol i moabeta long impruvim trening bilong ol staf o woklain long dil wantai ol hevi bilong kros kalsa situesen long en

"Bikpela samting em long strongim kros kalsa save bilong ol plis na ol i ken dil wantaim ol dispela kain hevi na situesen," Mis Suaali i tok.

Taim em i wanbel long toktok bilong Dokta Newbold olsem pait na hevi pasin long Auckland i antap moa bikos long ol Polinesia pipel, em i tok i gutpela long lukluk long ol samting olsem rot we ol Polinesia i save manesim kros pasin na sapos kalsa bilong ol i oraitim ol o egensim pasin bilong kros pait long en.

Strong bilong em na em winim awod

VINNY Lauwers (raithan) em i winim namba wan disebel wol spotman bilong yia.

Vinny na Kathy Freeman (aninit) em tupela spotlain bilong Australia husat i bin wokim gut tru long kamap olsem top spot pilaia long seksen bilong ol na winim ol arapela lain we i resis wantaim ol long kisim ol wol taitel long en.

Vinny i bin winim Disebel Spotsman awod taim em kamap olsem namba wan man wiisia atlit o spotman long winim resis bilong em wan yet i seil raunim wol.

Vinny i bin givim luksave long meri bilong em husat em i maritim i no long taim i go pinis taim em i kam bek long 7 na haf mun wol raun long liklik sip trip.

Ol arapela biknem pilaia i bin kisim ol arapela awod .



Saina i egensim Taiwan long bruk lus

SAINA i tok stap namel long ol na Taiwan i no gutpela tumas nau, stat yet long taim Chen Shui-bian i bin kamap olsem bos bilong Taiwan Gavman moa long wanpela krismas nau. Na Saina i tok i gat moa hait hevi i stap namel long tupela grup yet.

Xinhua Nius ejensi i no amamas long sampela toktok we deputi bilong Mista Chen em Annette Liu i wokim .

Nius ripot i we Mis Liu i autim i tok long ol yia we ol Taiwan lida i stap long pawa, itupela Taiwan na Saina i no wanbel long ol samting bna ol i no kamap wantaim ol agriemn long ol bikpela samting. Na hevi na ol hait samting we inap bagarapim tupela i go bikpela, " Mis Lu i tok.

Ol toktok insait long dispela nius ripot i tok kros long Taiwan Demokretik Progresai Pati em gavman bilong Mista Chen i go pas long en i no laik wanbel wantaim "Wanpela Saina Polisi" . Foma Kuomingtan gavman i bin givim luksave long dispela polisi na i bin wanbel olsem Taiwan Ailan i hap bilong Saina.

Mist Kuomingtan i bin aut long gavman bihain long 50 krismas. Na planti lain i pret nogut moa hevi bai

kamap sapos Taiwan i askim Saina long givim em gavman i gat moa pawa o taiwan i laik askim long bruk lus na kisim independens bilong em.. Tasol Saina i tok nogat tru long tupela samting ya na hevi i ken kamap sapos Taiwan i strongim sait bilong em.

Mista Chen i tok em i no inap askim long bruk lus long Saina tasol long wankain taim tu, em i hatim bel bilong Beijing taim em i no wanbel long "Wan Saina Polisi" we i as long tupela sait i toktok wantaim.

Stori i bin autim bel kros long Mis Lu olsem wanpela strongpela Taiwan indeoendens sapota.

Ripot i autim belkros tu long ol Taiwan lida i soim sapot long lida bilong Tibet, Dai Lama.

Tibet tu i narapela hap bilong Saina we i laik bruk lusim em.

Tasol Saina i strong long tupela provins i noken mas traime bikhet na strongim laik bilong ol bikos em i tok, bai bikpela trabel i kamap.

Stat yet long 1949 Taiwan i stap em yet long bikailan Saina bihain long ol nesenelis lida i ronawe lusim Saina na go stap long Taiwan Long dispela pait, ol komunis i bin win.

Kathy em i namba wan!

EM I putim Au\$150,000 (K306,122) daimon iaring na naispela klos we i kostim bikpela mani long en.

Biknem spot meri bilong Australia Kathy Freeman klostu i bin pundaun long ai bilong planti ol biknem muvi sta, ol biknem spot pilaia na ol arapela bik manmeri husat i bin stap long witesim dispela awod nait long Monte Carlo long kantri Monaco. Kathy i bin laik kisim namba faiv medal awod bihain long

Olimpik pilai i pinis.

Kathy i bin winim ol arapela biknem meri pilaia long wol olsem Marion Jones, Venus Williams, Karrie Webb na Inge de Bruijin long kisim dispela bikpela awod stret.


"I no bin gutpela tumas long klostu mi pundaun long ai bilong planti biknem na naispela pipel long wol tasol mi daunim mi yet na long wankain taim, mi amamas long ol i givim awod long mi.

"Nau yet mi no klia

tumas long tingting bilong ol manmeri taim ol i lukim mi . Mi laik plai i go long sampela hap.

"Mi no ting olseme bai mi stap sapos i nogat presa. Planti taim nau mi stap long stres o hevi na planti samting i stap long het bilong mi, tasol ol dispela samting i mekim mi strong na mi stap strong yet."

Kathy i save tingting planti taim em i putim ol kain stail klos na iaring we ejen bilong em i karim long Melbon i go long Monaco.



• Kathy em i sain, em i top! Biknem spotmeri bilong Australia i winim Wol Spotmeri bilong yia. Long dispela piksa, em i holim spotmeri bilong Yia Awod long Monaco. Piksa i kam long Weekend Australian Niuspepa.

Ileksen fiva long Inglan!

... Mama i strong yet long resis

ILEKSEN fiva long Inglan nau ya.

Foma Praim Minista long 1980's em Margaret Thatcher i sanap long Jun 7 nesanel ileksen long Inglan.

Mama ya i redi gut tru na wanpela samting

we em i mekim strong-pela poin long ol kempein toktok em long lukautim karensi o mani bilong Inglan we aninit long en, em i tok strong long noken troim paund mani long Inglan i joinim ol arapela kantri long Yurop na gat wanpela karensi

tasol em long "Euro Dola".

Ol ripot i tok 3,294 pipel i resis long nesanel ileksen bilong Inglan long neks mun. Na sampela long ol lain i resis i kam long ol kain grup olsem ol meri modol na ol resla. Wanpela long ol em

biknem modol Jordan em trupela nem bilong em em Katie Price husat i resis long Manchesta sia olsem wanpela indipenden. Jam Resling pati na Sios bilong Militen Elvis Pati i putim tupela man bilong ol long resis.



• Barones Thatcher, Mista Hague na meri bilong em Ffion long ileksen kempein bilong ol. Piksa i kam long *Weekened Australian Niuspepa*.

Lukaut long bikpela pusi baga nogut ya, nogut em i kaikaim yu! • (Lephan) Wanpela Buddis monk i pilai wantaim Esien Taiga long Wat Pa Luangtabua tempel long Sai Yok wes Tailen. Ol monk i tingting long banisim wanpela hap eria long haus lotu bilong putim eitpela tambu taiga we i nogat planti bilong ol i stap laip. Ol i wok long askim pablik long donesen bilong helpim bildim dispela haus banis. Piksa i kam long *Weekend Australian Niuspepa*.



Presiden Bush tokim Israel na Palestain long stapim pait

PALESTAIN lida Yassar Arafat na Israel Lida Ariel Sharon i tokim Presiden George Bush bilong Amerika olsem ol bai wok bung wantaim long go hetim ol samting i stap insait long Mitchell ripot

Mista Bush i bin askim tupela bikman long bihainim ol samting we dispela ripot i laikim long en na pinisim dispela pasin bilong pait na kilim dai man long en.

Tupela lida i tokim Presiden Bush olsem ol bai wok wantaim long kari-maut ol samting we i stap long Mitchell ripot

Mista Bush i strongim tupela lida long kisim dispela sans long pinisim hevi long Midel Is ya.

Mitchell ripot i singautim tupela sait long stapim ol pait pasin na bihainim pasin bilong toktok namel long ol long traime painim rot bilong stretim hevi ya na ol rot bilong kamapim dispela em long pinisim dispela hevi namel long tupela na long Palestain i sanap strong long stapim ol lain bilong em husat i wok long kamapim hevi long stapim dispela.

Presiden Bush i bin wokim dispela singaut long tupela lida bihainim tasol oda o singaut we Mista Sharon i mekim long kamapim sispai o stapim pait i go long ami bilong Israel.

Bihainim tasol oda ya, ol Israel ami i bin troimim ol motabom i go long Gaza Strip we faivpela pipel, tupela bilong ol em ol pikinini i bin kisim bagarap long en.

Taim Mista Sharon i sapotim Mitchell ripot long pinisim dispela pait namel long Israel na Palestain i stap nau long eitpela mun, em i no stapim ol steleim we ol Jews i wokim long eria bilong Palestain. Palestain i tok dispela samting bai bagarapim ol toktok long stretim hevi long en.

Difens Ministri bilong Israel i tok em i toksave long Israel ami long noken sut inap laip na situesen bilong ol i stap long hevi na ol mas lukautim ol yet, em ol i ken sut.

Mista Sharon i askim strong ol Palestain na ol Arab neiba bilong Israel olsem Siria na Lebanon long stapim ol pait pasin na ol bai kamap long tebol long toktok wantaim.

"Sapos ol Palestain lain i tok orait long agrimen bilong sispai o stap pait, bai mipela i wokim wankain kwiktam," Mista Sharon i tok.

Pait namel long ol Palestain na Israel ami i wok long go het na insait long las tupela wik, ol Israel ami i wokim 17-pela reid i go insait long ol eria bilong Palestain.

Israel ami i ripotim tu olsem long las wik, ol Palestain lain i bin paiarim foapela motabom i go long ol eria bilong Israel long Gaza Strip na tu long ol Israel setelmen.

Wanpela memba bilong Fos 17 grup gad i bin dai long pait namel long tupela grup na dispela i kisim mak bilong ol lain i dai long eitpela mun hevi namel long Israel na Palestain we i bin stat long las yia Septemba i go long 5,562. Planti long ol dispela i dai em ol Palestain lain.

Pait grup bilong Lebanon em Shi'ite i tok ol bai givim strongpela sapot i go long ol brata bilong ol long Palestain long dispela pait wantaim Israel.

• Nogat sapot long Netanyahu ... Wanpela man Jew bilong Amerika i joinim ol Palestain lain husat i wok long go egens long foma Israel Praim Minista Benjamin Netanyahu i edresim pablik long Chicago. Piksa i kam long *Weekend Australian Niuspepa*.





• I no meri nating. Meri i gat namba pinis. Endie Kepssy em wampela woda meri na i gat namba long paitim dram wantaim ben bilong woda.




• Wampela mama grup long Kerema long Galp provins i bin kamap long Mosbi long mekim sampela wok bilong pulim mani long wok misin bilong ol long Kerema. Ol i kam salim ol mat, basket, brum na ol arapela samting moa we ol yet i bin wokim long han.



• Mama ya i bungim ol skin bilong suga ken long karim i go long haus. Dispela skin suga bai em i yusim long floa we ol bai sindaun long em long haus.



• Eli wantaim Potape i salim banana long Godens maket long wampela kastoma. Planti manmeri i save kam baim kaikai long Godens maket bikos em i wampela bikpela maket long Mosbi. Sampela i baim long Godens maket na go brukim ol kaikai i go liklik na salim gen long ol liklik maket long apinun.



• Sori long lukim dispela skul. Ol banis na arere bilong klasrum i olpela na klostu pundaun long graun. Sapos olsem, bai ol sumatin i nogat klasrum long sindaun na skul gut. Dispela em hevi bilong komyniti na Gavman.

Belhat mekim na papa kisim sik AIDS

SAPE METTA i raitim

SIK nogut HIV/AIDS i wok long bagarapim na kilim dai planti manmeri naol pikinini tu.

Taim noken sot tru wanpela kain marasin i stap long oraitim na stapi. Na tingim, yu i ken amasim yu yet tasol dispela i ken mekim yu i go daun long matmat, em i wanpela taim tasol.

Em i tru a? Bihain long ol helt atoriti i bin glasim na painim aut long namba wan taim sik HIV/AIDS i bin kamap long wanpela man PNG long 1985, ol i bin wari tru long wanem ol i save olsem sapos dispela wanpela man i gat binatang bilong HIV, hamaspela meri em i bin slip wantaim ol pinis. na long wankain pasin, hamaspela man em ol meri ya i slip wantaim pinis.

Na sapos dispela wanpela man i kisim sik HIV/AIDS, hamaspela moa man na meri, husat i gat dispela sik, ol i hait i stap.

Bihain long las 12 o 15 krismas dispela sik nogut HIV/AIDS i bagarapim pinis planti lain manmeri na turangu ol pikinini tu.

Na sampela long ol dispela lain husat i stap laip yet i wok long raun na mekim nabaut nabaut na givim dispela sik i go i kam yet. Ol i no inap stap, long wanem dispela pasin i pas strong tru long blut blong ol na bai ol i raun i go i kam na givim dispela binatang bilong HIV i go i kam long ol arapela man, meri na turangu ol pikinini tu.

Na husat tru bai stapim dispela sik? Ol saveman na saientis bilong marasin i no painim yet marasin bilong oraitim na stapim dispela sik nogut. Na olsem wanem long ol glas man, bus dokta na ol kainkain bus marasin? Yu i ken traum ol dispela man na marasin, tasol yu mas save olsem sik nogut ya i no inap lusim yu inap em i givim bikpela bagarap long bodi bilong yu na kilim yu i dai.

I tru olsem i gat sampela grup insait long kantri husat i save wok hat tru long kamapim ol kainkain awenes edukesen kempen egen-sim dispela sik HIV/AIDS na bagarap em i save kamapim. Tasol planti lain manmeri husat krismas bilong ol stat long 14 na i go antap long 40 i no save tingting na skelim gut pastaim na slip nabaut i go i kam.

Nau yet i no long taim i go pinis (dispela em i trupela stori) wanpela yangpela man long Goroka, Isten Hailans husat i gat sik HIV/AIDS i bin kamaut na stori wantaim Wantok long pasin we em i bin painim na kisim dispela sik nogut. Na em i laik ol arapela lain manmeri i mas ritim na kisim save na traum long abrusim dispela sik.

Dispela yangpela man em i bilong wanpela liklik ples insait yet long Isten Hailans. Na em i laik kolim nem bilong em Negi. Em i no nem bilong en tru tru.

Taim Negi i liklik mangi yet na i save i go long wanpela komyuniti skul klostu long viles bilong en, em i save harim planti stori bilong



sik HIV/AIDS. Na long skul tu ol tisa i save skulim em na ol arapela sumatin long bagarapim dispela sik nogut i save kamapim.

Na insait long wanwan mun ol bia grup edukesen na ol drama grup tu i save kamap long skul bilong en na skulim ol sumatin na putim aut ol drama pilai we i sut stret long sik HIV/AIDS.

Dispela ol samting i mekim na Negi i save pret nogut tru. Em i no laik kisim dispela sik na i dai. Tasol dispela pret pasin i no stopim em long painim dispela sik nogut. Bihain long Negi i pinisim gret 10 na i dropaut long hai skul, em i kam long taun na i stap wantaim wanpela kandre bilong en. Em i bin i gat tingting long painim wok long taun.

Na em i bin laki long painim wanpela wok olsem sop asisten bihain long tripela wik taim em i bin kamap long taun. Taim i wok yet, em i prenim wanpela yangpela wanwok meri bilong en.

Bihain long prensip insait long wanpela yia, Negi i maritim em. Meri ya nem bilong em Abade, (i no nem tru) na em i save i stap wantaim papamama bilong em long taun.

Taim tupela i maritim, kampani bilong tupela i givim wanpela haus long tupela na Negi wantaim meri bilong en Abade i muv i go insait na i stap long dispela kampani haus.

Insait long pes 6-pela krismas, maritim bilong Negi na Abade i gutpela. Tupela i sindaun gut wantaim amamas na karim foapela pikinini.

Tasol bihain long 6-pela krismas na 4-pela pikinini i go bek na i stap wantaim papamama na famili bilong en.

Taim Wantok i askim Negi long wanem as na meri bilong em i mekim olsem. Na em i no haitim. Em i tokaut stret olsem taim em i laik slip wantaim meri bilong em, em i save les! "Ating long dispela as na Abade i save lusim mi wantaim tripela pikinini na karim bebi bilong mi tupela i go long haus bilong famili bilong em na i stap long hap," Negi i tok.

Em i tok Abade i mekim olsem long wanem em i ting nogut bai mi tupela i stap na slip wantaim na em bai karim yet ol pikinini.

"Tasol em i no rong long mi i slip wantaim meri bilong mi. As tru bilong ol man na meri i maritim em long slip wantaim na karim ol pikinini. Em i nogat wanpela rong o asua i stap long dispela," Negi i tok.

Dispela pasin bilong Abade long i go i kam i kamap planti taim.

Mekim olsem i go i go na wanpela wiken bihain long wok, Negi wantaim tupela poroman wanwok bilong em i go aut long pilai ol poka masin. Negi i no save pilai poka masin na dring bia. Dispela em i namba wantaim bilong em long traum dispela tupela samting, long wanem em i laik pinisim belhat bilong em long pasin Abade i mekim long em.

Insait long dispela poka masin haus i bin i gat planti man na ol meri tu i stap. Sampela ol i pilai poka masin na dring bia na ol arapela i raun nating. Long dispela taim tupela meri i stat long putim ai na kamapim aigris pasin long Negi na tupela poro bilong en. Mekim olsem i go i go na taim Negi na tupela poro bilong en i lusim ol poka masin na kamaut tupela meri ya i bihainim i kam aut na askim sapos em i orait long tupela i bihainim ol.

Tupela poro bilong Negi i tok orait na ol i kisim tupela meri ya i go long haus bilong tupela poro ya na Negi i slip wantaim wanpela long ol dispela meri. Tupela poroman wanwok bilong Negi em tupela yangpela singel man. Tupela i no maritim na i save slip long singel flets bilong kampani. Na taim Negi i statim dispela pasin, em i no stap.

Em i mekim olsem na i save yusim singel flets bilong ol wanwok bilong em long kisim ol meri i go na slip wantaim ol long hap. Mekim olsem i go i go na wanpela taim bihain long wok em i wokabout isi i go long haus na sindaun na salim tingting i go bek long ol awenes edukesen na ol drama pilai em ol pia grup eduke-

sen i save mekim long skul bilong em taim em i skul mangi yet.

Negi i tingting i go i go na dispela pasin bilong pret nogut tru i kamap long en. Na long tingting bilong em, em i save olsem em i paul pinis wantaim moa long 10-pela rot meri. na em ia skim em yet, olgeta long dispela meri ol i orait o sampela long ol i gat dispela sik nogut HIV/AIDS.

Taim pasin bilong pret i kisim em Negi i stat long lusim dispela pasin bilong paul wantaim ol rot mani. Tasol bihain long sampela mun em i stat long lukim sampela sain olsem em i lusim skin.

Dispela i mekim na em i go long haus sik na lukim dokta long hap na dokta i kisim blut bilong em long sekim na lukim wanem kain sik em Negi i kisim na em i wok long lus weit.

Bihain long wanpela wik Negi i go bek long haus sik long sekap long risal bilong blut bilong en.

Dokta i sekim pinis blut bilong Negi na i luksave olsem blut ya i gat binatang bilong HIV we i save kamapim dispela sik nogut AIDS. Tasol em i no bilipim olsem na em i kisim gen blut bilong Negi long glasim gut narapela taim moa na i luksave olsem binatang bilong HIV i stap.

Tasol dokta i no toksave long Negi. Em i kisim blut gen namba tri taim long Negi na taim em i go bek bihain long wanpela wik, dokta i kism em i go isnati long opis na tokaut long em olsem em i gat binatang bilong HIV.

Bihain long dokta i givim em sampela gutpela skul toktok, Negi i kam aut wantaim planti ai wara na i wokabout isi i go bek long haus.

Em i tingting bek long ol dispela pikinini bilong en na wari i kilim em wansait stret. Na em i askim em yet. "Asua bilong husat na em i kisim dispela sik nogut!"

Askim bilong em i sut i go stret long meri bilong en Abade. Sapos Abade i no pasim em yet long slip wantaim Negi, em i no inap long i go aut na paul nabaut na dispela sik nogut i no inap long kamap long em.

Nau yet Negi i wok long i go i kam long haus sik na i wok long kisim marasin. em i stap strong yet tasol em i lusim bikpela skin.

Taim dokta i tokaut long em olsem em i gat binatang bilong HIV, tupela wik bihain em i lusim wok.

Em i no moa tingim Abade na liklik bebi bilong tupela husat i stap yet wantaim famili bilong Abade.

Wanpela gutpela samting em Abade i no bin slip wantaim Negi taim em i save paul nabaut na i go bek long haus long dispela as Negi i no givim dispela sik nogut i go long Abade.

Abade na foapela pikinini bilong em i nogat dispela sik. Ol i bin i go long haus sik na kisim blut tes tripela taim na ol helt wokas i tokim olsem ol i nogat sik.

Em i samting bilong sori. Wanpela taim i no long taim long nau, Negi bai dai. Na Abade bai i nogat man na ol foapela pikinini bilong dispela bai i nogat papa. Mekim olsem na husat bai lukautim ol dispela meri na pikinini.

Wantaim planti ai wara Negi i surikim toktok i go moa na i tok, "man na meri i maritim long wanem tupela i laikim tupela yet na i mekim olsem. Na long slip wantaim, em i nogat rong. Tasol sapos meri i pasim em yet dispela bai kamapim planti belhat na kros tingting. Em nau long pinisim belhat, man bai i go aut na mekim nabaut na long wankain pasin tu meri bai mekim. Na long dispela pasin, em bai isi tru long man o meri i karim sik nogut ya i kam insait na bagarapim sindaun bilong famili."

Long las toktok bilong em, Negi i tok taim bilong em long dai bai i kam na em i tok strong long olgeta lain manmeri bilong PNG long plis noken mekim nabaut nabaut. Tingim laip bilong yupela wanwan na i stap isi na i stap laip longpela taim. Dispela sik nogut HIV/AIDS bai i ken katim laip bilong yupela sot olsem na i noken pilai pilai long en. Em i redi tasol long daunim yupela i go daun long matmat. Lukaut na stap isi.

Maski kros pait long gutpela pilai

PEKU PILIMBO i raitim

"PLANT manmeri save kisim bikpela skin pen tru long sapotim ol spot tim.

"Planti taim mi stap na save ting olsem ol dispela manmeri i no save gut long lo bilong pilai," John Bruce i tok.

Ating ol tumbuna bilong yumi i man bilong kaikaim man na kilim narapela long trabel pait bilong ol. Ating dispela blut nogut i stap long mi yet na yumi no save kisim ming-bilong spot gut," em i tok.

John i bin sotwin kranksi na kamap long mi wantaim sampela pren i sanap i stap. Em i stat long mekim ol dispela toktok. Mipela olgeta i bin go lukim wanpela bikpela ragbi gem namel long tupela tim. Olgeta manmeri i bin ronawe nabaut taim ol plisman i kam tromoi tiages. Mipela i bin sindaun long sait nogat win long en na win i bin karim olgeta ges i go long narapela sait. John i bin sindaun long dispela sait na ai bilong em wara na ret nogut tru taim em kamap long mipela.

Turangu, gutpela gem tru i bin kamap namel long tupela tim na mipela i wok long lukim i stap. Klostu long pinis bilong gem referi i mekim wanpela rong disisen liklik na olgeta manmeri i bin stat tromoi tok nogut na rabis i go insait long pilai graun.

Ol sekyuriti man i bin traim stapim tasol i hat. Planti bilong ol i bin abrusim ston, botol na wanem samting ol sapota i holim long han. Planti manmeri, pikinini husat i bin go sindaun gut tru long lukim dispela gem i painim rot long ronawe.

Sampela manmeri husat salim ol ais blok na loli, buai smok nabaut long sait bilong pilai graun i lusim ol samting nabaut na ronawe. Ol yangpela i ron i kam na krungutim ol dispela. Sampela bilong ol i kikim nabaut na tu putim sampela long poket. Ol botol sof dring nabaut i palai long olgeta hap.

Ol sapota i pait long sait na ol spak manmeri i pulap antap long plis ka, sampela bilong ol wantaim blek ai nabaut na lek han bruk.

Planti bilong ol dispela spak manmeri i bin kam insait long pilai graun wantaim spak pasin. Ol i save ting olsem sapos ol i spak bai ol i amamasim gem gut. Planti bilong ol i save mekim pekpek nabaut na plisman i save rausim ol na sampela taim paitim ol nogut tru.

Taim bilong pilai em i no taim bilong dring spak na go stap. Em taim bilong ol spot manmeri na yu husat i save spak longlong nabaut i no noken i go stap insait nating na kamapim trabel bilong ol gutpela manmeri husat i laik lukim gem.

Mi tanim na lukim John. Man, em luk pret nogut tru. Em i no save kam long siti bipo na dispela em nambawan taim bilong em long kamap long Pot Mosbi.

"Mi ting siti i gutpela bikos ol manmeri i gat sampela skul save na ol i klia long mining bilong spot tasol luk olsem nogat," John i go het na tok.

Em pret nogut tru bihain long em lukim kainkain man, ol yangpela na sampela papa bilong foa o faivpela pikinini i ron i go namel long pilai graun. Ol i bin traim paitim fereri na tupela lainsmen bilong em. Tasol gutpela tru na i bin gat ol sekyuriti man i stap na ol i banisim ol na kisim ol i go insait long opis.

Kainkain tok nogut John i no bin harim bipo em i harim long dispela

taim. John i no save long wanpela tim na em i kam lukim dispela ragbi gem bikos mi go. Em bin kam stap wantaim mi sotpela taim tasol na i no klia gut long raun olsem na mi bin kisim em i go lukim dispela ragbi gem.

John yet i bin pilai ragbi taim em yangpela yet. Nau em i marit na save tingting long ol pikinini na mekim wok gaden na stap long haus tasol.

Em i stap i go na em i no save raun tumas. Dispela em malolo liklik long wok gaden na kam stap. Em lukim kainkain bikhet pasin i kamap long pilai graun.

Ol spakman i ronim fil na singaut na tok nogutim ol manmeri husat lukim gem i stap. Planti i no mekim wanpela samting long stapim ol. Ol man husat kisim mani long get tu i no laik tok nogat long ol spak manmeri i kam insait. Sampela bilong ol i larim ol wantok spakman nabaut karim bia botol wantaim i go insait.

"Mi pret nogut tru tasol mi amamas long lukim yupela," John i tok. "Mi save ting ol manmeri bilong siti i gutpela. Ol i no save mekim wanpela trabel long sait bilong spot bikos ol i save long olgeta rul tasol nau mi senisim dispela tingting bilong mi," em i tokim mipela.

"Mi lukim olsem planti manmeri bilong narapela kantri tu i kam lukluk i stap, wanem kain tingting ol dispela lain i kisim taim ol i lukim dispela kain pasin bilong yumi?" John i askim.

"Mi sem olsem mi gat wankain kala olsem ol manmeri bilong dispela kantri.

"Ating mi noken soim pes bilong mi long pablik. Mi wankain olsem welman bilong bus wantaim nogat wanpela save.

"Mi gat wanpela redio long haus," John i stori. "I no long taim i go pinis mi harim olsem ol i paitim wanpela referi nogut tru.

"Mi lukim wanpela poto bilong em tu i stap long niuspepa na mi sori nogut tru long em. Ol nius ripot i tok olsem dispela man i kisim bagarap bihain long wanpela bikpela ragbi gem long hailans.

"Yupela traim tingim, referi em wanpela man na yumi olgeta man i save mekim asua.

"Husat bilong yupela bai tok yupela i no mekim wanpela ausa long laip bilong yu?" John i askim.

"Yumi olgeta man bilong dispela graun na wanem as yumi tok 'man i asua'."

"Mi no ting pasin bilong ron i go insait long ples bilong pilai o sampela taim tromoi ston na tok nogutim ol referi inap stretim wanpela samting," John i tok.

Mi yet i wanbel tru wantaim olgeta toktok John i mekim. Long olgeta gem i gat tupela tim. Tupela tim wantaim i tingting strong long winim narapela na kisim poin. Sapos tupela tim wantaim i gutpela, ating tupela inap dro na kisim wanwan poin tasol sapos wanpela i mekim sampela asua, ating i moa gutpela wanem sait wantaim liklik asua long sait bilong pilai i ken winim dispela gem.

Planti tingting bilong ol manmeri long Papua Niugini em long win tasol. Ol i no save malolo long singaut bikmaus na mekim i go bel bilong ol yet i save kaskas nating. I no rong long yu sapot na singaut olsem tasol mi save wari tru long lukim ol manmeri i traim bagarapim ples bilong pilai o ol opisal husat i go pas long pilai.

Mobeta ol pipel i mas luksave olsem wanpela tim bai na narapela

tim bai lus. I no tupela wantaim bai win. Yumi save kranksi na sutim toktok long ol rong man. Asua i stap wantaim ol pilai manmeri yumi wok long sapot.

Ol opisal bilong gem i stap tasol bilong lukim olsem ol manmeri i gat gutpela sans long lukim gutpela pilai na stap long wanpela gutpela hap na mekim dispela pasin. Tasol yumi pipel yet i save bagarapim wanem samting ol opisal bilong wanwan spot i putim hap. Ol sia bilong sindaun i save bruk, wanem gutpela samting ol man i putim na yumi inap lukautim i save bruk long han bilong yumi.

Mi yet bin harim tu dispela nius bilong ol manmeri i paitim referi. Planti taim ol referi i save pret long laip bilong ol. Ol i man, ol i gat meri pikinini na famili bilong ol long haus. Ol i taim mekim liklik wok mani tasol bilong wanem na ol pipel i save traim kamapim birua wantaim ol.

Ol pipel i mas luksave olsem yu wanpela i no fit long mekim referi. Planti ai bai pas long yu tasol. Yu bai stap aninit long presa olsem ol waitmen i save tok. Yu ting yu mekim wanpela gutpela disisen tasol abrus bai yu luksave olsem yu mekim asua pinis. Yumi olgeta man, olsem mi tok pinis. Yumi lukim na wanem samting i kamap, ating yumi amamas olsem dispela kain samting i kamap.

Yumi noken kirap sutim tok long wanpela man bikos tim yu sapotim i lus. Larim em lus. Bilong wanem yu kisim skin pen. Ol win o lus em wankain samting. Nogut yu abrusim mak bilong sapot na yu yet i go stap long haus sik o sampela taim inap stap long haus kalabus tu. Yumi olgeta laikim wanpela tim long win. Tasol wai bai yu traim brukim lek han bilong yu yet? Bilong wanem yu laik hangamap long waia na katim skin o brukim klos bilong yu? Nau yu sapot na amamas orait yu mekim dispela samting tasol tumoro bai yu hatwok long baim wanpela nupela trausis o westim liklik mani bilong yu long traim na go kisim marasin long haus sik.

Taim yu hatwok na raun olsem taim bai ol manmeri yu sapotim

long en bai sindaun kaikai gut na tu traim tingting long pilai long narapela gem gen. Yu, yu kisim skin pen nating. Lusim strongpela sapot bilong kisim bagarap na sapot stret.

Mi save sapot tu tasol mi laik sindaun na lukim husat i gutpela pilai man. I no bilong yu go na paitim referi ol sapota bilong narapela tim. I no long taim go pinis mi bin harim olsem ol sapota bilong Enga Mioks i bin kisim bagarap long han bilong ol ol sapota bilong Goroka Lahanis taim ol i pilai long Goroka.

Long taim bilong Kembris Kap Jon Sempionsip long hailans, wanpela referi i bin kisim bikpela bagarap. Dispela ol samting i kamap bikpela long nius na yumi harim tasol olsem wanem long ol liklik spot long distrik na viles level? Wankain samting olsem i mas kamap? Ating planti man o meri husat i traim long kontrolim na ronim gem i save kisim bagarap tu?

Wanem taim bai dispela kain pasin i stap? Yumi mekim olsem i go na wanem hap tru bai yumi i go? Ol narapela kantri manmeri i save lukim yumi olsem wanem? Bilong wanem na yumi save kisim ol dispela skin pen long sapot na bagarapim narapela man. Yumi no laik stap tasol na amamas long lukim gem na pinis stret yumi sanap na go tok amamas long tupela tim wantaim.

Ating pasin bilong tok 'yu bilong dispela ples na mi bilong dispela hap' o rijinelism i save mekim yumi tingting kranksi. Yumi laikim ol wantok bilong yumi i win. Yumi no save laik long lukim ol lus.

Spot em samting bilong amamas na soim wanem kain stail bilong pilai yu gat. I no bilong bagarapim narapela brata. Planti taim mi save sindaun na lukim ragbi, ol manmeri bai kaikaim tit wantaim singaut olsem "pinisim em! Pinisim em! o kilim em! kilim em!" Sapos wanpela pilaia i bihainim toktok bilong yu na bagarapim narapela brata, yu bai kisim wanem kain amamas?

Na tu yu mas save olsem man ya tu i gat strong olsem wantok yu sapotim. Narapela samting em yu mas luksave olsem man yu pilim



olsem birua bilong yu em wankain olsem brata bilong yu. Bilong wanem na yu laikim ol narapela pilaia i bagarapim em. Ating em i gat gutpela stail na yu mas mangal long em? Ating em kam long birua haus lain bilong yu na yu laik kilim em yu yet tu.

John i kisim bagarap long tiages bilong plis na ronawe i kam i mekim wankain toktok tasol. Ating sampela manmeri long kantri i luksave long mining bilong gem. Gem em i bilong amamas. Wanem man i fit long wanem spot i mas win long dispela gem. I no min olsem yu wantaim husat wantok bilong yu sapot long en tasol i mas win.

Ol manmeri i mas sem long pasin bilong sapot bikpela tru na bagarapim ol yet. Nogut yu sapot kranksi i go na nogat kaikai bilong en bihain. Bai moa gutpela sapos ol manmeri i kamapim tingting olsem wanpela bai win na narapela bai lus. I no tupela tim wantaim bai win.

Ol manmeri yumi sindaun sapot tasol noken tingting long bagarapim narapela bikos ol i wankain olsem yumi yet. Ating yumi no save long ol olsem na yumi belhat nating. Sapos yu save long ol gut, ating mipela bai amamas olsem ol i pilai gut.

Yumi no inap kisim wanpela samting aut. Yu sapot na amamas tasol long lukim gem na noken bikhet tumas. Yu mekim yu yet luk olsem enimal na yu no mekim wanpela gutpela pasin.

Pasin bilong kirapim pait i mas stap. Ol man olsem John i mas kam sindaun na lukim gem gut na amamas long dispela rot. Noken traim soim masol long pablik ples o spak kranksi na mekim yu yet luk olsem wanpela longlong.

Kisim olgeta pilaia olsem ol brata bilong yu na sapot. Ol opisal em yu mas luksave olsem ol i stap bilong ronim gem. Sapos nogat bai husat mekim? Yu rispektim wanwan man long wok na pilai sait. Sindaun na amamas long lukim gutpela pilai. Maski traim kirapim pait long laik bilong yu. Yu kros tru long husat na bilong wanem dispela kros i kamap? Sapot gut na noken tingting long bagarapim narapela.

Tingting bilong sampela yangpela i wok

MASTA WAI i raitim



LANTI yangpela manki i wok long yusim het na tingting nau long mekim sampela liklik wok we ol i ken painim mani bilong baim ol samting ol i laikim olsem bilas na kaikai bilong ol.

Long Mosbi dispela pasin i kamap long planti kona bilong strit na arere bilong ol bikpela stua na ol maket ples we planti manmeri i save kam bung olgeta taim.

Long Godens maket bai yu ken lukim planti yangpela manki i karim ol buai na lus smok raun long bas stop long salim na ol pasindia wantaim draiva na boskru i noken hat wok long kam daun na painim buai na lus smok. Ol i ken sindaun tasol na ol boi bai karim i kam na yu ken baim long ol.

Sampela i kukim ol kiau na karim rauñ long ol bikpela bas stop na salim long ol manmeri long baim. Sampela i salim ai wara na ol sof dring bikos Mosbi em ples hat na i isi long ol manmeri bai baim kol wara na sof dring.

Ol dispela yangpela i taitim bun long kamap wantaim sampela kain rot na plen we ol i ken mekim mani na ol i yusim dispela rot we ol i lukluk long wanem hap em gutpela long mekim maket bilong ol.

Bikpela samting long painim maket bilong salim ol dispela kain samting em yu mas skelim gut wanem hap ol manmeri i save bung long en. Ol gutpela ples em olsem long maket, pilai graun na bikpela ples bilong raun olsem long Boroko na Taun. Dispela em yu no inap abrus long ol manmeri bikos planti lain i raun na ol bai baim sampela samting yu redim na salim long pablik ples.

Sapos yu lukim tu long hap olsem Boroko, Taun, Waigani na Godens ples, bai yu ken lukim sampela yangpela manki i soim ol stail na save bilong ol long wanem kain samting ol i ken mekim long han bilong ol.

Long Boroko arere tasol long Paia Stesin, wanpela boi Simbu nem bilong em Simon Dege i save sindaun long hap olgeta de stat long Mande i go inap long Sarere. Em i save samapim ol su we i bruk pinis na em bai stailim gut tru. Yu ken karim wanem kain su bilong yu we i bruk long en na Simon bai sambai tasol long samapim su bilong yu wantaim string. Bihain long em i samapim pinis, em bai polisim gut tru na yu ken lukim su bilong yu i strong na sain gut long yu ken werim gut gen.

Simon i tok olsem em i save mekim dispela wok olgeta de na dispela em wanpela wok em i save gut long mekim wantaim han bilong em olsem na em i save samapim su bilong ol lain hariap tasol na ol i save kisim bek long sem de yet.

Simon i tok em i mekim dispela wok longpela taim i kam na planti kastomas i

save gut long em na ol i save go kam long em i stretim gut o samapim ol bruk su bilong ol. Sampela taim i sasim ol su long K10. na K20 bihainim wanem kain bagarap i kamap long su. Sapos wok bilong samapim wanpela su bai i bikpela wok bai Simon i sasim yu K20 na sapos i liklik, orait yu ken baim long K10. Sapos bagarap i bikpela tru na i abrusim mak bilong K20. Simon em gutpela man na em i ken tok pisin wantaim yu long dispela kain prais we i inap hevi long yu.

Simon i tok em i lainim sampela yangpela manki long dispela wok bilong samapim su na ol i save gut long samap nau. Olsem na sampela taim ol i save helpim em taim em i gat planti oda long tebol bilong em. Em i tok ol dispela manki em ol fit manki tu na ol i ken mekim naispela wok wantaim su o sendol bilong yu.

I no Simon tasol i save mekim dispela wok, i gat planti yangpela manki tu i

go hap we skin i les long sindaun nating na ai i slip tumas. Olsem na liklik mani ol papamama o famili i givim em ol i putim wantaim na ol i go baim buai na smok na kam bek salim lus long banis bilong ol yet long haus. Em nau ol haus lain yet wantaim ol lain insait long strit i save kam baim ol dispela buai na smok long moning, apinun na nait taim. Ol i mekim olsem na kamapim sampela gutpela liklik mani bilong ol yet we ol i gat sampela mani long poket long raun lukim pilai long wiken o baim ol bilas bilong ol yet wantaim.

Dispela kain pasin tu i save mekim bel na tingting bilong ol papamama i save amamas long ol manki bikos ol i no moa sindaun nating tasol ol i stat long mekim sampela kain wok we i pulim na kamapim liklik mani bilong ol. Olsem na ol papamama o ol famili i no inap hatwok moa long tingim olgeta potnait Fraide long ol bai givim liklik mani moa long ol long

long luksave long wanem kain save ol i gat na wanem kain samting ol i inap mekim gut long en long bihain taim. Orait ol tisa na ol husat wokman bilong Gavman we dispela em wok bilong em long soim dispela save i go long dispela pikinini i mas statim wok bilong em long wok klostu wantaim dispela pikinini na pulim em i go moa insait long dispela eria we save bilong em i gutpela long en. Olsem na dispela em wanpela bikpela eria we Gavman i mas sanap strong long en kamapim dispela kain level bilong edukesen we nogat studen bai pilim olsem em i feil long gret 10 bikos em i luksave long wanem samting em bai mekim na em bai go het yet long mekim na kamapim kaikai bilong en na salim long ol manmeri i baim o statim liklik wok bisnis bilong em yet wantaim save em i gat long han na tingting bilong em.

I tru olsem Papua Niugini i nogat wanpela samting ol yangpela bai sot long en tasol wanpela bikpela samting tasol i pulim ol yangpela longwe long as tru bilong strong ol i gat em long o naispela samting we i kamap na stap long taun na bikpela tingting bilong ol papamama we i laikim pikinini i mas winim skul na wok mani.

Long PNG, ol yangpela i no save wari na kilim ol yet i dai olsem ol arapela kantri bikos yumi i gat ol brata susa, kandre, kandre meri na wantok bilong yumi i stap. Olsem na taim ol yangpela i wari liklik, hariap ol i ron i go long haus bilong kandre man o kandre meri na stap wantaim tupela. Kandre man o kandre meri i mekim ol gutpela tok stia long ol na ol i bel isi na strong na i stap.

Bikpela hevi tasol em taim ol i lusim dispela haus ol i stap gut long en na go raun ausait nau, em bai ol i painim salens. Na dispela em wanpela hap we Gavman i mas glasim na skelim gut long wanem kain samting em bai mekim long stretim raun na sindaun bilong ol yangpela long dispela hap we ol i lusim haus na kam ausait long strit. Nogut ol i raun nating na bel i hat o bel i sikirap na aigris wantaim mangal i kisim ol. Olsem na sampela samting olsem pilai spot i mas kamap gut na strong long pulim ai na interes bilong ol yangpela. Musik na ol atis wok i mas op nau long ol yangpela i ken go insait. Sios wok long sait bilong yut tu i mas kam aut ples klia na ron klia long rot bai ol yangpela i lukim na ron i kam. I gat planti arapela samting bilong pulim ol yangpela i kam wantaim na stap gut bihainim laik na interes we i pulim ol i kam long en.

Husat ol yangpela we i bin luksave pinis long wanem samting ol i ken mekim na ol i mekim pinis na kamapim sampela kain gutpela tenis long laip na sindaun bilong ol tude, orait dispela em gutpela olsem na yupela i ken strongim na surukim dispela save bilong yu i go gen long ol liklik brata bilong yupela tu bai ol tu i ken traime na sindaun olsem yu.



• Ol yut i klinim pipia long strit bilong Mosbi.

save samapim ol su na polisim long ol wanwan kona bilong Boroko, Taun, Waigani na Godens. Ol tu i save mekim dispela wok olgeta de long painim liklik mani bilong baim kaikai na ol bilas samting bilong ol yet wantaim famili bilong ol. Sampela hap mani tu em ol i save yusim gen long baim ol string na ol skin leda bilong samap wantaim gen. Na tu ol i save skelim liklik hap mani tu long ol manki husat i save helpim ol long wanpela de.

Long Lae siti i gat dispela kain pasin ol yangpela i save mekim arere long ol stua na ol bikpela ples bung olsem Lae Top Taun na Eriku. Ol tu i save mekim dispela kain wok na wankain pasin ol i bihainim.

Sampela yangpela manki i no lain bilong raun tumas long rot o bilasim ol arere bilong strit long Mosbi, Lae, Goroka na ol arapela senta olsem. Ol i save sindaun wantaim papamama o husat famili bilong ol long haus olgeta de na skelim olsem laip i

putim long poket na raun. Ol yet i gat mani pinis olsem na ol papamama na ol famili i stat long sevim mani we ol i ken baim ol gutpela samting bilong haus olsem ol bilas na arapela samting bilong stretim haus i kamap gut o sevim gut mani bilong skul fi, lans mani bilong ol pikinini long skul na ol arapela kain kos we mani i mas stap gut long go long ol.

I tru olsem Gavman i save tokaut olgeta taim long kamapim ol plen na progrem we i ken kamapim ol kain kain projek we ol yangpela i ken go insait long lainim wok na kisim save long mekim sampela kain wok long bihainim taim. Planti taim gavman i tok ol i redim mani bilong ol yut i ken kisim na mekim wok wantaim tasol olgeta dispela wok i no save kamap gut na i no save kamap tru. Olsem na wanpela bikpela samting nau em taim ol pikinini i stap yet long skul olsem long gret 6, i go inap long gret 10, em i gutpela long ol tisa i mas stat

Mauten ol i kolim Lavai het wara Karavure




BIPO BIPO tru tupela man insait long ples Opaio eria stap. Nem bilong tupela ya em Lavai na Maiu, Lavai i save kukim kaikai long mambu na Maiu em i save kukim kaikai long sospen graun.

Lavai i tokim Poro bilong em Maiu olsem nau yumi tupela i wokim kanu na i go painim sospen graun na Maiu wokim kanu bilong em. Na Lavai tu i wokim kanu bilong em. Ol i wokim kanu bilong ol olsem Lakatoi.

Tupela i resis i go long Mosbi tasol kanu bilong Lavai em o i solwara i tanim. Em i go bek gen long Kerema. Kanu bilong Maiu i go kamap long Mosbi. Lavai i lukim olsem kanu bilong Maiu i go kamap pinis na em i sem nau i go sindaun long het wara.

Olsem na ol Kerema i save wokim Hiri Moale olsem as bilong dispela samting. Sapos yu go long Kerema, Lavai em i stap ples klia long het bilong wara. Na nau ol i kolim maunten Lavai het wara Karavure.

Roy L. Keroro
Kerema, GP.



Mi painimaut olsem meri bilong mi i gat bel long wanpela singel man

Dia Laiplain,

Mi bin marit long sios tasol wok bilong mi i kisim mi go longwe tumas long famili bilong mi.

Meri bilong mi save wok na mi trastim em i tasol mi painimaut olsem em i gat bel long wanpela singel man.

Em bai orait sapos mi divosim em o i gat narapela samting mi mas wokim? Mi save lotu long Katolik na lotu i no save tok orait long divos.



ol tok tru bilong dispela stori pastaim.

FAR APART

Dia Pren,

Tupela lain manmeri i save marit na soim laikim na lukautim narapela narapela na pikinini bilong tupela, tasol em bai i hat sapos tupela i stap longwe long tupela yet.

Sapos tupela i stap longwe longpela taim em bai moa hat na dispela i ken mekim marit i bruk.

I tru yu mas pilim nogut tru taim yu harim meri bilong yu i gat bel long narapela man. Yu save tru olsem dispela stori i tru o nogat? Sampela taim ol lain i jeles na i laik brukim marit bilong yutupela i ken mekim ol giaman stori.

Sapos yu pilim olsem stori i no tru orait i gutpela sapos yu kisim

statim nupela laip wantaim meri na pikinini bilong yutupela bai dispela marit bai i kamap strong moa na yutupela bai stap klostu tru yutupela i kisim planti pen na winim pinis.

Long sait bilong lo i gat we long kisim divos long marit we lo i luksave long en. Provinsal welfe opisa bai toksave long yu long dispela. Sios bilong yu bai larim yu long kisim divos long ol gutpela rison sapos dispela i no inap long problem yu gat nau bai yu ken kisim divos tasol sios bai i no wanpela long dispela.

Yu tok klia pinis olsem yu no laik divosim meri bilong yu long wanem sios i tok nogat long divos. I gat wanpela narapela gutpela as long noken tingim divos: ol pikinini bilong yu bai kisim taim sapos marit i bruk.

Ol pikinini husat i no kamap long gutpela famili bai ol yet tu i no inap kisim gutpela laip bihain taim ol i bikpela. Yu mas tingting gut long ol pasin bilong yu mas no ken bagarapim tingting bilong

ol pikinini bilong yu. Wanem kain we yu laik bihainim em bai i afektim ol pikinini. Na tu yu mas tingting gut long hau yu bai lukautim nupela pikinini bilong meri bilong yu.

Sapos yu no laik bai marit i bruk em i gutpela tru long toktok long ol problem bilong yutupela wantaim. Em bai i gutpela tu sapos yutupela kam wantaim wanpela pater husait i ken givim yutupela gutpela tingting long statim nupela laip gen. Inap yu mekim olsem hariap? Inap yu kisim haus bilong ol marit long ples yu wok i stap long en? Inap yu painim wanpela wok bilong meri bilong yu long ples yu wok long en?

Mipela i gat bilip olsem yu na meri bilong yu bai pinisim ol dispela problem na no ken kisim divos. Mipela i gat bilip olsem fogivnes i save opim we long gutpela tingting na laikim namel long tupela lain. Ol narapela tu i bin luksave long dispela we.

Laiplain

Sapos yu gat hevi we yu laik autim long mipela, rait i kam long dispela edres: Lifeline Counselling Service, P.O. Box 6047, Boroko, NCD. Yu ken kisim mipela long Telipon namba: 3260011 (Kaunselin) na 3261680 (Opis). Bai mipela i putim ol trupela hevi we yu autim long niuspepe tasol mipela i no inap autim tru nem bilong yu. Taim yu rait i kam, salim trupela nem na edres na bai mipela i salim bek bekim bilong yu. LAIPLAIN



Nem: Getrude Joseph
Krismas: 17 (meri)
Adres: St Marys Technical School, Mingende, P.O. Box 71, Kundiawa, Simbu Province.
Save laikim: Mi wanpela meri i husat save mekim wok bilong lotu na pilai spots.

Nem: Margaret Keakea
Krismas: 17 (meri)
Adres: St Marys Tech School, Mingende, P.O. Box 21, Kundiawa, Simbu Province.
Save laikim: Mi wanpela meri i husat save mekim wok bilong lotu na pilai spots.

Nem: Peter Rasta Blue
Krismas: 20 (man)
Adres: Kumin Catholic Missions, P.O. Box 69, Mendi, SHP, PNG.
Save laikim: Pilai basketbal, ragbi na laikim musik na mekim pen pren wantaim.

Nem: Grace Aparik na Christine Aparik
Krismas: 17 (meri)
Adres: Josephstaal Sub-district, Sub-District, C/o Josephstaal Parts, P.O. Box 75, Madang, Madang Province.
Save laikim: Raitim pas long ol pen pren.

Nem: Bobby Amoi
Krismas: 16 (man)
Adres: C/o Emil Moroni, Vanimo, Serra Product, P.O. Box 44, Vanimo Province.
Save laikim: Lukim vidio, pilai soka, volibal, basketbal, laik stori wantaim ol prens na harim musik planti.

Nem: Francis Aseides
Krismas: 18 (man)
Adres: Agona Surdu C/R, Ghana.
Save laikim: Raitim pas i go long ol meri.

Nem: Goiela Kaus
Krismas: 15 (meri)
Adres: C/o St Marys Primary School, P.O. Box 503, Wewak, ESP.
Save laikim: Lainim narapela tokples, mekim pren wantaim narapela sumatin, raitim pas, harim musik.

Nem: Aiyen
Krismas: 17 (man)
Adres: Aiyak Keng Gutsuk, Biabi Enterprice, P.O. Box 72, Karkar, Madang Province.
Save laikim: Go lotu skul, raitim pas, senisim poto na wokim gaden.

Nem: Benjamin Gyam
Krismas: 21 (man)
Adres: C/o Daniel Gyam, P.O. Box 1343, Accra Central Region, Ghana, WA.
Save laikim: Raitim pas long ol pen pren.

Nem: Joe Kane Pale
Krismas: 16 (man)
Adres: Kero Primary School, P.O. Box 33, Ialibu, SHP.
Save laikim: Tok pilai na go long skul na ritim buk na harim gospel musik.

Nem: Lenz Simon
Krismas: 17 (man)
Adres: P.O. Box 1543, Mt Hagen, WHP.
Save laikim: Pilai ragbi, harim PNG Top 20 hits.

Nem: Leonie Nopai
Krismas: 13 (meri)
Adres: Uluu Community School, P.O. Box 89, Aitape, Sandaun Province.
Save laikim: Go long lotu pilai volibal, harim gospel musik waswas long solowra wantaim ol prens.

Nem: Elvis Kiawa
Krismas: 14 (man)
Adres: Awima Trade Store, C/o Hanjua Village, P.O. Box 8, Menyama, Morobe Province.
Save laikim: Pilai soka, basketbal, volibal, harim musik, go lotu, wokim ol wok wasim vidio, i go raun lukim ples, mi promis long bekim olgeta pas yu rait i kam.

Nem: Emmanuel Davies Smith
Krismas: 18 (man)
Adres: Ananput Catholic Boyd, P.O. Box cc 188, Cape Coast - C/R Ghana West Africa.
Save laikim: Mekim pen pren long wol.

Nem: Sialon Fredick
Krismas: 17 (man)
Adres: Ogelberg Specialised Training Centre, P.O. Box 1157, Mt Hagen, Western Highlands Province.
Save laikim: Ritim buk, lukim TV harim 93 FM.

KANAGE



em mi laik kisim bas na go long Kong roots na go long Tamex viles. Meri ya kirap na tokim Kanage olsem em orait yu ken lusim mi long Kong roots na go. Kanage i no amamas long tok meri ya i mekim. I no long taim bas i kam stop tupela kalap wantaim na long rot Kanage tokim meri ya olsem plis inap yumi pren wan nait tasol na tumoro yu go? Na meri tokim Kanage mi pret long sik nogut olsem AIDS ya. Na Kanage kirap tokim em. Hey! you want me to explain you! AIDS em prais bilong wina na wina bai kisim kofin boks.

**Joel Ingal
Tabubil**

Kanage bilong Vanimo na poro bilong em bilong Grisa antap long bus bilong Vanimo. Tupela i save wok long wanpela faktori long Vanimo Fores Produs. Wanpela taim long Fraide bilong kampani wik, tupela fotnait so ol i kisim mani wantaim tupela bikpela pasol i pulap tru. Em i kisim bikpela filings stret na askim poro bilong em na tok, "Weyo inap mi tupela i go spak liklik? Na poro bilong em i tok yes long tupela bai go spak. Tupela i kalap long bas na go long Sandaun Beach Hotel. Kanage i go insait na askim ba man olsem, Oro Bororoko 2 gallons 6 pispek? Na ba man givim pinis na Kanage i no weit em i rausim 2 katen 6 peks tasol na spak nogut pinis na painim ples bilong slip. Em i slip long wesan arere long solwara na masol kram i kisim em na i ting solwara i kamautim wanpela lek bilong em na i singaut tok "Weyo, Weiyo, why na me.... wanpela lek for me where" na i krai na tok why na em i kam spak.

**Luke Amyal
Vanimo**

Kanage bilong Westen povins, liklik ples ol i kolim Tamex Umage. Wanpela gutpela apinun Kanage i go raun long Imikland maket. Em i go baim wanpela buai wantaim smok mutrus na laik tanim na go bek long bas stop ya nogat wanpela yangpela meri bilong Imikland i bihainim em kam na sindaun wantaim em. Man tingting na filings bilong Kanage i go antap olgeta na Kanage askim em. Yu laik go we? Na meri askim Kanage na yu laik go we?. Na Kanage tokim

Kanage i bilong Tente long Mendi taun stret. Na em saye wok long Moro Oil Fil long Kutubu. Wanpela taim kandre bilong Kanage dai na ol i salim tok long wok ples bilong em na tokim em ong kam long haus krai. Ol manmeri bung long haus krai na stap na ol harim wanpela man bikmaus wantaim na kam longwe yet. Ol save olsem em Kanage kandre bilong dai man. Ol i tok, yupela olgeta pasim maus na harim em yet krai long kandre bilong em. Kanage kam wantaim na tanim tanim long graun na krai kam long em. Arere long bodi, em i bomim bikpela kapupu stret. Olgeta manmeri lukluk strong long en, na em sem pipia stret na tok, "Sori oh" kandre sori long mi na, tok las gut-bai long em ya yupela harim ah. Ol save olsem em Kanage kapupu tasol ol lukim long tingting tasol na stap. Kanage em i sem tasol nogut ol tok em kapupu na kirap i go i go na em giaman na go krai gen.

**Pem Stemix
Mendi**

Kanage em bilong Kiunga Kuyu kem long Westen provins. Wanpela taim Kanage em i havestim pinat bilong em na em i laik karim i go salim long maket. Tasol poroman Kanage em i no save long hau ol i save sindaun long maket na salim ol samting. Dispela em i pes taim tru bilong papa Kanage. Kanage kirap na tokim ol wantok lain bilong em olsem. Sapos mi go long maket na salim pinat bag bilong mi ya na ol i askim mi hamas long pinat ya bai mi tok

wanem long ol? Ol wantok lain bilong Kanage i tokim em olsem. Yu mas kirap na tokim ol kastomas, em nau tudak nau nogat nem bilong yupela ya. Tarangu Kanage i sindaun na redim dispela tok. Taim em i lukim wanpela meri wokabaut i kam stret long em Kanage i amamas. Meri ya i kam stret na askim Kanage. "Pren hamas long dispela pinat?" Kanage i kirap na tokim meri ya olsem, "Em nau tudak nau nogat sem bilong yu ya." Meri ya i kirap na askim em gen tasol Kanage i tok gen dispela sem toktok long en. Sori, turangu meri ya i no tok pilai em na em i sem nogut tru long ai bilong pablik na em i no baim pinat bilong Kanage na em i tekov. Meri ya i wokabaut wantaim sem toktok i go long haus. Lapun Kanage em i sindaun na westim taim bilong em long maket long samting i go inap apinun na i nogat wanpela kastoma i kam na baim pinat bilong em olsem na em i sem no gut tru long sindaun. Kanage i kirap tasol karim traipela pinat bag i go bek long haus na i go olgeta long ples bilong em. Em i no save kam raun long Kiunga gen.

**Elias Torip Anda
Kiunga**

Kanage go raun long Mendi buai maket long wanpela Fraide. Em sanap i stap na lukim wanpela meri Murumbu stret, het bilong em paul pinis na em wokim eksen tasol long ai na saitim nek bilong em long meri ya. Meri ron i go na tokim man bilong em. Man bilong em i kam na karim em i go long Plis stesin. Long Plis stesin em wok long saitim nek bilong em yet. Plis tokim em wai na yu saitim nek long marit meri? Kanage tanim sait pes stret na tanim nek yet na tok, "Orait oh papa wokim yupela ol gutpela nek olsem na tupela tok baksait long mi ya." Taim em toktok, em saitim nek yet na ol ting em wanpela nek nogut na ol larim em i go. Kanage i go ausait long dua pinis na em stretim nek gen na em kisim filings stret long tok pisin bilong em na em i no wari long ol i givim blek ai long em.

**Pem Semix
Mendi**

Kanage em bilong Esskay arere long

Mendi taun yet. Em i lusim skul long gret 2 na em i save stap long ples. Wanpela taim wanpela man kam painim sampela wokman long wok long haiwe. Kanage save long hap Inglis so em kalap long frant na sindaun long apsait na putim han long dua na sindaun. Waitman spit stret na das kam insait long ka. Waitman tok long Inglis na tok, "Can you wind the glass? Kanage paul liklik long dispela Inglis so, em singaut i go aut na tok, "Ol boys ol klostu brake lus oh." Ol i go yet na planti das i kam insait na wantok namba tu taim na tok, "Hey! can you wind the glass please? Kanage paul gen na tok." Ol boys oh brake lus so, taim mi tok yupela kalap. "Waitman kukim stret na das bagarapim em stret. Em belhat wantaim na bikmaus na tok." Hey! Can you wind the damn glass. Kanage pes man em opim dua na kalap i go wantaim bikmaus na tok, "Boys kalap kalap, brake lus, brake lus. Ol boys ting tru na ol kalap nabaut. Ol brukim lek han na kisim taim stret. Kanage kukim long hap ai na lukim olsem ol kam bagarap so em pret olgeta.

**Pem Stemix
Mendi**

Kanage em bilong Kama kantri insait long Westen Hailans provins. Wanpela taim ee i bin go raun long Hagen taun em i bin lukim wanpela meri Saut Waghi. Kanage i go klostu long meri ya na em toktok wantaim em. Kanage em bin karim em gut tru na kisim em go long ples bilong em. Tupela stap long ples wok gaden na ol narapela wok stap i go sampela mun i go pinis. Wanpela taim meri bilong Kanage i gat bel na taim bilong em long karim pikinini. Long wanpela taim tarangu meri ya em i no slip inap moning taim tru. Tupela susa bilong Kanage kam kisim meri i go long haus sik. Long haus sik meri ya i karim pikinini boi. Wanpela nes i kamaut long haus sik na tokim Kanage. "Kanage meri ya karim wanpela boi." Kanage i tok, "top sot." Tasol nes i belhat long dispela tok, "Kanage i mekim na nes i askim em, Yu tok wanem? Kanage i tok, "Nogat, kantri mangi ol i stilim stret yu."

**Simon Angra
Mt Hagen**



Ol skul long Sauten Hailans i nogat inap tisa

Dia Edita,
Komplen bilong mi olsem planti ol Praimeri na top ap skul long Sauten Hailans provins i sot tru long ol tisa. Ol hevi bilong tisa long praimer skul sot bikos long ol Distrik Edukesen Opisa i:

- 1) No klia long wok bilong ol (planti save mekim wok bilong inspekta).
- 2) Wantok sistem na braiberi i

stap namel long ol tisa na DEOS.

3) Postings bilong PEB i no wankain wantaim DEO.

4) No mekim gutpela wok bilong skelim ol tisa. Sampela top ap skuls i gat 8 na10, nara-pela i gat 4-7 na wanpela i gat 1 na 3. Em i no gutpela.

Plis yupela ol DEO bilong Sauten Hailans Edukesen

Dipatmen mekim rait seleksen long ol diplomas. Planti ol tisa i save pulap long ol eben skul. Olsem wanem long ol ruel skul. Em bai gutpela sapos ol DEO ken klosim ol skul we nogat inap tisa bilong kisim gret 7 na 8.

Matt Dedeboh Holeyah Kagua, SHP.

Skul i save salim ol lapun kakaruk long ol kastoma

Dia Edita,
Mi laik bringim komplen bilong mi olsem wanpela koles i save bagarapim olgeta manmeri long Hailans rijen wantaim ol olupela o lapun kakaruk.

Gutpela trening koles tasol sait long bisnis yu no tingim laip na helt

bilong ol Hailans pipel husat save baim kakaruk bilong yu.

Wai na bisnis menesmen i save salim ol lapun Brita klas kakaruk na pei tu i antap long K15?

Plis sevim ol kastomas gut. Hailans i no ol dok o pik we yu save

tromoi ol lapun kakaruk.

Yupela yet olsem bisnis menesa, prinsipol na ol narapela olsem Edmin Komiti save baim ol kain kakaruk o nogat?

Yupela putim mani wansait tru inap long 20-30 yias.

Kakaruk yupela save salim i nogat senis. Plis salim taim ol yangpela yet.

Traim senis liklik, ol dispela kakaruk i lapun pinis na mit i strong.

Matthew Elings Mal Banz, EHP.

Bekim pas bilong stretim Nuku rot

Dia Edita,
Mi laik kisim maus bilong memba bilong Nuku. Hon. Andrew Kumbakor long bekim pas bilong Paul Kumbari we i bin kamapim long Wantok nius Me 10, 2001.

Mi no save husat em i Paul Kumbari, em trupela nem o giaman nem tasol i luk olsem brata, yu mas i gat sampela strongpela tingting nogut tru long memba bilong Nuku long raitim dispela kain pas.

Wankain askim i bin kamap long Pater Pris bilong yu yet long Nuku long National na memba i bin bekim gut tru long Wantok nius long 29 Mas.

Sapos yu no lukim dispela bekim pas bilong memba bipo, mi askm yu long go na painim dispela bekim pas bilong memba, na bai yu save long wanem wok memba i bin wokim long ol pipel bilong Nuku.

Sapos yu ritim na yu sekim Distrik Opis bilong Nuku bai yu save memba i mekim planti wok na planti mani i bin go.

Wok i no kamap ples klia bikos yumi pipel na opisa bilong Gavman yet i haitim.

Long bekim hevi bilong pas bilong yu, memba i brukim K100,000 na salim i go long mun Disemba 2000 long wok bilong rot.

Pisa Bidd Pamaraka na Ben Yowu makim memba long brukim wok na mani. Mi save planti man i bin wok, stat long Mai i go inap long Kafle, na ol i bin kaikai dispela mani.

Sapos rot i no gutpela tude, i no asua bilong memba. Memba i givim mani pinis.

Pipel olsem Paul Kumbari i mas kisim hevi bilong dispela pasin long giaman wok, les pasin wok, i no wokim gut wok we nau Paul i tok rot i bagarap tru.

Long taim bilong kiap bipo, pipel yet i save lukautim rot bilong ol. Nau ol pipel i ting olgeta samting em bilong mani tasol na wok em bilong memba tasol. Dispela tingting bilong Paul na ol narapela i mas stop.

Dispela tingting tasol i mekim

mipela i les na mipela i no lukim senis na wok kamap long distrik.

Yumi olgeta i mas kamapim wok wantaim long bringim developmen long ilektoret na provins.

Kantri i kisim taim nogut long mani, olsem na wanem mani memba i ken painim, yumi mas tok tenkyu na helpim memba long kamapim gutpela na bikpela wok na lus tingting long politiks olgeta taim. Gavman na memba i givim helpim mani, ol pipel olsem Paul Kumbari i mas wokim wok tru long inapim wanem helpim Gavman na memba i givim.

Sapos nogat, mi tokim yu, Paul Kumbari olsem, bai yumi i stap wankain yet.

Mi bilip na luksave olsem memba Kumbakor i bin mekim wok na hap wok bilong em pinis.

Wok nau i stap long yumi pipel long luksave na pilaim pat bilong yumi na mekim senis long ilektoret.

Long yu brata Paul Kumbari mi toksave long yu olsem yu mas

strong na kamap ples klia na kempen long 2002, nogut yu wanpela jeles man long raitim kain pas olsem.

Las tru mi laik tokim yu olsem, memba Kumbakor, mama bilong em i karim em long Yiriwondi Seim, em pikinini Nuku na ol Nuku bai kempen long em na votim em bihainim wanem wok na helpim em i givim long ol pipel bilong Nuku.

Em i no nidim ol Kerema long Waraston long kam na kempen long em olsem yu bin tok so brata Paul Kumbari, maski jeles tumas.

Sapos yu lukim dispela pas na i kukim bel na lewa bilong yu plis yu welkam long bekim o lukim yu long ples.

Tasol wanpela samting yu mas raitim nem bilong yu tru, bikos mipela ol Nuku i nogat dispela nem Kumbari, em i mas wanpela giaman nem, em tasol brata.

Rick Sims Wama Boroko, NCD.

Plisman i mas patrol raun

Dia Edita,
Dispela bel hevi bilong mi i go olsem watpo tru mi save lukim ol Plis Sekta bilong Kimbe ol i save was long dua bilong ol man.

Tasol ol i no save painim trabel lain. Lo bilong ol polis i no olsem na bai yu kam sindaun long haus kuk na sindaun na was long dua bilong ol man na wetim trabel long kamap.

Nogat yu mas sanap stret long dispela hap trabel i stap long em na tu yu mas sanap long bung ples na em

bai yu painim ol trabel man hariap na olgeta taim.

Mi save i go long haus bilong ol KGP Singel Kwatas na long nait mi save lukim ol plis i sindaun na was long dua bilong ol man. Mi ken tok olsem trabel i no i stap long haus kuk olsem na bai yu sindaun na was nogat yu mas i go sanap long trabel i stap long em na tu yu noken slip yu mas sanap i go i go na tulait.

Jimmy Demo Kimbe, WNBP.

Salim planti singapo long Kimbe maket

Dia Edita,
Watpo tru Kimbe maket prais bilong kaikai i go antap tru na bihainim ol stua nau.

Mi save lukim ol meri i save salim ol singapo ol i kaukau na singap ol i save salim 4-pela long K1.

Tasol singapo ol i no putim planti na 4-pela long K1 em i no stret.

Yupela i mas putim mak olsem 14 na 15 singapo long K1.

Yu mas salim ol singapo na kaukau olsem salim planti liklik em bai ol man i baim hariap hariap na sapos yupela salim liklik em bai ol man i no inap baim hariap.

Ol man bai lukluk tasol na apinun bai yupela karim bek i go long haus na yu yet yu kukim na kaikai gen ol kaikai bilong yu.

Sonny Taken Kimbe, WNBP.

Gavman noken kisim takis long pamuk bisnis

Dia Edita,
Mi wanpela manki Erave insait long Sauten hailans provins tasol nau mi save i stap long Mosbi siti na mi wok long Hebou sekuriti na planti taim mi save go kam long 6 mail rot na mi save lukim kain kain manmeri i save pulap nogut tru long wanpela bikpela haus. Na ol i save mekim pasin nogut nabaut long ai bilong ol pablik manmeri.

Na dispela kain pasin i no gutpela tumas long mipela ol kristen. Dispela kain pasin tasol i pulim ol kristen manmeri na ol i

save pundaun long sin na lusim bilip bilong ol. Na ol i save brukim marit na kilim dai narapela arapela na bagarapim famili laip bilong ol.

Dispela kain pasin i save kamap planti taim moa long kantri bilong yumi Papua Niugini.

Olsem na mi autim bel hevi bilong mi i go long Gavman o Praim Minista long wokim stronggela lo biong kukim o rausim dispela kain pamuk bisnis haus na ol yangpela bilong yumi i noken save long kain pasin olsem bihain taim. Olsem na mi laik

tokim Gavman olsem sapos yupela kisim takis mani long dispela kain bisnis haus na bihain yupela lain ronim kantri, tasol kantri bilong yumi bai i no inap strong bikos dispela mani i no kam long stretpela rot bilong Gavman takis.

Em tasol liklik wari bilong mi na yu husat kristen brata na susa i laik sapotim o egensim yu rait tasol i kam long Wantok niuspela na bai mi ken lukim.

Stanley Kewa Hohola, NCD

Askim i go long memba bilong Vanimo Grin

Dia Edita,
Ol pipel bilong Vanimo Grin nau i painim hat long rot long go kam long Vanimo. Mi laik save wanem taim bai Vanimo Grin rot bai i go.

Nau mi lukim na mi yet mi pesim long raun bilong mi long Vanimo na Grin Riva balus fe nau go antap long K146 long wanwe na wantaim kago mipela save tromoi moa long K600. Dispela nau i stap rot

bilong ol pipel bilong Grin Amanab long go kam long Vanimo long kisim samting olsem tred stua guds, bilas na sampela samting moa.

Mi laik save wanem taim tru bai Vanimo Grin memba bai helpim ol long daunim dispela hevi bilong ol.

Mi laik tok tu olsem bilong daunim dispela hevi mi laikim memba bilong Vanimo Grin i

mas lukluk strong long Vanimo Grin rot.

Mi bilip olsem dispela bai mekim isi long ol pipel bilong Grin Amanab.

Dispela bai mekim isi long ol ken go kam long tupela kain trenspot.

Na dispela nau i save stopim mipela

Naksie Ponis Vanimo, SP.

Usino Bundi memba i dai o i stap yet

Dia Edita,
Mi wanpela mangi Bekgesin. Mi no bin lukim pes bilong G. Wan.

Plis mi laik yupela sekim em long Pot Mosbi nogut em i dai.

Sapos em i stap yet plis inap em salim RIP mani bilong Usino Bundi i kam long Wallum distrik na bai mipela ol liklik manmeri long ples i ken kisim sampela helpim.

Yu bin mekim planti tok promis wantaim mipela Usino Bundi em i lus nating nau na tu yu no save i go visitim ol lain bilong maunten i kam inap nau 10-pela yia.

Olsem na nau mi i nogat bilip long em.

Pewa Aimai Bekgesin, MP.

Rausim politiks long wok

Dia Edita,
Mi wanpela manki long ples i stap long Telefomin distrik insait long Sandaun provins na mi laik autim liklik wari bilong mi i go long ol brata, kandre stap long Tabubil long Westen provins.

Brata Patrik Nokesengim yu bin kam raun long ples na yu bin wokim kempen bilong Michael Trintemnok na yu bin

tok sapos yu no givim vot long mi bai nogat man o meri Telefomin bai kam painim wok long Ok Tedi na wok.

Ok Tedi em mi stap long rot, yu bin toktok olsem na go ya, brata mi bai tokim yu stret olsem dispela kain tok pisin bilong yupela wok ya longlong na bai votim yupela.

Em bai hat ya, nau tasol yupela i noken sanap long

ileksen na tingting.

Na yu tok yu sanap long vot ya wanem vot yu sanap i stap? Brata yu no papa bilong kampani o rekrutmen opisa, yu pasim maus na noken putim politiks i go insait long wok bilong kampani.

Yupela kam long ples Telefomin na politiks em bai hat long yupela, ples nogat sans long yupela.

Toksava i go long ol manmeri husat i save salim pas kam long Wantok Niuspepa. Sapos yu no putim nem tru bilong yu long pas bai mipela i no inap prinim pas bilong yu.

WANTOK

Classifieds

FAX: 325 2579 - PH: 325 2500

EMAIL: word@global.com.pg

LINEAGE ADVERTISEMENTS

Lineage: Advertisements are charged at K4.40 per line of 23 letters incl. space. Photo K10.00 each and appear 3.5cms. All advertisements inclusive of VAT. See Rate Card for conditions.

Office Hours:

8.30 to 4.00 Monday to Friday
Classified Advertising Available in the following formats

Lineage: Available in single line, minimum two lines deep

Display: Available per single, double or four column wide, minimum size 3 cms deep.

Single Column Display Advertisement are charged K4.42 per single column centimetre. Costing is dependent on Logo and Artwork which may appear in the advertisement. Minimum charge is for 3cm x 1col.

Display Classifieds are charged at K4.78 per single column cm. They maybe double column, four column or full page with or without borders. Costing is dependent on space, logos and artwork which maybe requested. Minimum size is 3cm x 4 columns.

Wantok is published on Thursdays. Deadline for camera ready work is 12 noon Wednesday; prior all other 12 noon Tuesday.

Classified Index

AUTOMOTIVE

- Boating
- Motorcycles
- New & Used Cars
- Parts & Auto Spares
- Trucks & Tractors

NOTICES

- Electoral Notices
- Government Notices
- Law Notices
- Public Notices
- Tender

EMPLOYMENT

- Position Vacant
- Position Wanted

SEASONAL NOTICES

- Easter Greetings
- Father's Day Greetings
- Mother's Day Greetings
- Christmas Greetings
- Season's Greetings

GENERAL

- Amusement
- Auctions
- Business for Sale
- For Hire
- For Sale
- Going Finish
- Lost & Found
- Machinery for Sale
- Pets

- Wanted to Buy
- Wanted to Sell

PERSONAL

- Bereavement
- Birthday Greetings
- Births
- Condolence
- Deaths
- Engagements
- Funerals
- In Memoriam
- Wedding

PROPERTY/REAL

- ESTATE
- Factories

- Warehouses
- For Rent
- Share
- Accommodation
- Holiday Resorts
- Houses for Sale
- Houses to Let
- Industrial Properties
- Properties for Sale
- Investment
- Properties
- Leave House Rooms
- Board Vacant
- Wanted to Rent
- Overseas Investments

For your Classifieds adverts,

Call our Advertising Sales Team on

Telephone: 325 2500 or Fax: 325 2579

The Independent

P.O. Box 1982, Boroko, NCD, Ph: 325 2500 - Fax: 325 2579

Email: word@global.com.pg

Special Advertising Offer

Commencing 25th January, 2001.

**FREE Two line advert in
The Independent
any category.**

* CONDITIONS APPLY

Conditions:

Maximum of 46 characters including space allowable

Maximum number of insertions 4

FREE Two line advert in
The Independent any cat.

The Independent reserves the right to reject proffered advertisements



Chris Purkikil bilong Rabaul Guria i painim sapot pilaia bilong em insait long SP Kap resis egensim Mosbi Vipers las wiken. Guria win 20-14. Poto: JOE IVAHARIA.

Luksave gut long pilai manmeri

PEKU PILIMBO i raitim

PNG Spot Federesen i salim tupela bikman i go stap long Arafura Gems we nau i kamap long Darwin insait long Australia.

Wok bilong dispela tupela man em long luksave long husat manmeri i gat kik long stap insait long Saut Pasifik Gem we bai kamap long 2003 insait long kantri Fiji.

Presiden bilong PNG Spot Federesen (PNGSF) Henry Kila na Deputi Seketeri Jenerel bilong polisi na plening Justus Joseph i go long Darwin long stap wantaim ol ogenaising komiti na luksave long ol ki manmeri long wanem samting i wok long kamap.

Ol bai lukluk tu long wanem kain pilai manmeri kantri i gat na traim lukim wanem samting ol i ken mekim egensim ol narapela kantri long kompitisen.

Dispela i kamap bikos planti manmeri i save mekim gut tru na

winim gol medal tasol ol i no mekim dispela long taim bilong trening na dispela kain manmeri yumi ken lukluk na traim bungim ol bilong 2003 Saut Pasifik gem.

Samepal i save kisim ol gol medal tasol ol i no kjamapim gutpela rekot. Dispela i no bilong tok osem ol manmeri husat pilai i nogut, nogat, em bilong mekim gut long wanwan spot.

"Wanepal bikpela tingting bilong PNGSF em long redim wanpela tim we inap lukim PNG i stap insait long namba tri na i kam antap taim 2003 Saut Pasifik gem i kamap," Seketeri Jenerel bilong PNGSF sir John Dawanicura i tok.

Sir John i tok dispela lukluk bilong tupela man bai helpim long kamap PNG Nesanel Gems na ogenaising gut olgeta samting bilong redi.

"Olgeta rot mipela gat long lukim kainkain gem maski em Arafura, Mini-Saut pasifik, mipela i ting em gutpela long mipela lukim na

lainimna mekim PBNG kamap gut tru long kamap bihain," em i tok.

Sir John i tok amamas i go long ol husat i pilai gut long Arafura gem na karim samepal blu, bilak, na waitpela jesis, tok tenkyu i go long sponsa PNG Risakling Limited (PNGRLtd) long givim ol, tupela nupela set jesis we prais bilong ol i ovarim K5,000.

Dispela ol jesis we igat wankain kala osem dispela wanpela tim bilong Australia, em Kronula Sharks i save werim bai i antapim tru tim spirit bilong ol tim lida na ol pilaia.

Sponsa PNGRLtd i bin anaunsim sponsasip dil wantaim POMBRL taim em i givim aut ol jesis long Fonde las wik.

Pasifik Ailans Menesa bilong SIMSMETAL LTD (papa kampani bilong PNGRLtd) em save stap long Brisbane, Australia, David Burrows na PNGRLtd menesa Jason Drews i bin givim aut ol jesis long risakling senta.

Mr Burrows i tok osem kampani i ama-

Prisisen bilong Koiari lig i stat

KENNEDY EDENE i raitim

KOIARI Ragbi Lig bai statim prisisen kompitisen bilong ol long dispela wik Sande.

Sisen bilong lig bai op wantaim prisisen nokaut na dispela prisisen bai ron inap wanpela wik bipo long sisen propa i stat.

Wanpela miting bai kamap long 3 kilok dispela Sarere long tokaut wanem as ol i mekim wanem kain ol disisen bilong

statim dispela sisen.

Olgeta prisisen gem bai ol i pilaim long larowari Hai Skul Ovel long Sogeri.

Toksave i go long ol klab husat tringting long pilai olsem ol i mas redim tim na stretim medikel kliarens bilong ol pilaia bilong ol bipo long ol i kisim fil bilong pilaim dispela prisise gem.

Na tu olgeta tim mas redim K5 bilong mets fi long dispela wiken bikos dispela mani bai i go bilong karamapim fi bilong ol

referi na lainsmen long taim bilong pilai.

Husat nupela klab i laik stap insait long Koiari Ragbi Lig resis i welkam tasol long stap insait long dispela prisisen gem.

Ol nupela tim husat laik pilai i mas soim pes bilong ol long fil bipo long 12 kilok bai iol opisal i ken senisim dro na putim nupela tim i go insait tu.

Long nau yet i gat foapela tim tasol bai pilai insait long dispela prisisen resis na dro bilong ol i stap pinis wantaim ol opisal.

Straika Ben helpim ol Kalibobo Blus long autim PX Niugini

PAULUS TALI i raitim

OL Kalibobo Blus i soim stret kala bilong ol taim ol autim ol nambawan soka tim bilong Madang PX Air Niugini long wiken wantaim 4-2 points.

Fil bilong pilai i bin pulap tru wantaim ol sapotas kam sapotim tim bilog ol.

PX i wanpela stronpela tim tru we ol boi i save kamapim ol gutpela pilai tru, tasol las wik tasol ol boi Kalibobo i pilaigut stret na daunim namba

bilong ol.

Kalibobo tim menesa em Andrew Franks long gutpela lukaut bilong em i wokim na ol i win.

Pes hap skoa em winga bilong K/Blus, ron go stret trikim pulbek bilong PX na em i paraipim stret gol i go insait na skoa i sanap olsem, 1-1.

Seken hap pilaia bilong PX Saimon strong n tromoi narapela gen. Ol boi Kalibobo ino surik, straiika Ben Eddie, sekim na putim buletim tripela gol gen. Ful taim skoa nau sanap olsem 4-2 we Kalibobo i lid.

Long premier, Nabasa i autim Royals 1.

Pom Bratas bai luk olsem 'Saks' wantaim nupela jesi

ALISON ANIS i raitim

POT Mosbi Bratas Ragbi Lig clab bai luk olsem ol 'shaks' long fil dispela wiken wantaim blu, bilak, na waitpela jesis, tok tenkyu i go long sponsa PNG Risakling Limited (PNGRLtd) long givim ol, tupela nupela set jesis we prais bilong ol i ovarim K5,000.

Dispela ol jesis we igat wankain kala osem dispela wanpela tim bilong Australia, em Kronula Sharks i save werim bai i antapim tru tim spirit bilong ol tim lida na ol pilaia.

Sponsa PNGRLtd i bin anaunsim sponsasip dil wantaim POMBRL taim em i givim aut ol jesis long Fonde las wik.

Pasifik Ailans Menesa bilong SIMSMETAL LTD (papa kampani bilong PNGRLtd) em save stap long Brisbane, Australia, David Burrows na PNGRLtd menesa Jason Drews i bin givim aut ol jesis long risakling senta.

Mr Burrows i tok osem kampani i ama-

mas tru long sapotim spoting tims i bungim ol grasruts na yuts i nogat wok insait long siti.

Na Mr Drews i tok kampani i lukluk long kamapim wanpela gutpela rilesinsip wantaim klab na tok moa olsem dispela sponsa em i wanpela we long soim olsem ol i bel isi na putim bek samting igo long komyuniti.

Em i strongim tok tu long ol BRL klab long pilai gut long dispela yia na winim tropi ol mis aut long em las yia.

"Dispela sponsasip dil i soim PNG Risakling's longpela komitmen long kantri," Mr Drews i tok.

Klab Presiden Brown Sinamoi, Vais Presiden na Hed Koats Robert Akunai, wantaim Menesa John Tangila na ol sampela ol pilaia i i bin kam kamap long kisim ol jesis.

Mr Sinamoi i bin tokaut long amamas bilong em na i tenkim PNGRLtd long gutpela sponsasip bilong ol long 2001 sisen.

Ol dispela jesis ol i gatnem na logo bilong sponsa wantaim klab nem tu long fron na long

baksait i gat wanpela prin olsem, "Kipim PNG Klin" em ol i raitim long Inglis.

Mr Burrows i bin tok olsem, PNGRLtd husat i gat brenjis long Lea na Pot Mosbi na tu ol ejens i stap insait long kantri i komited stret long polisi bilong em long kipim PNG olsem klin na gutpela envairament long wok bisinis bilong em long kolektim na resaiklim ol skrep metals gutpela o nogut.

"Dispela sponsasip arensmen namel long PNGRLtd na BRL klab i bin makim gutpela we bilong konfidens em PNGRL i soim long ekonomi bilong kantri na gutpela lukluk igo long fuja long-tem bisinis interes na invesmen insait long PNG," Mr Sinamoi i tok.

BRL klab tu i soim amamas bilong ol long anaunsim dispela arensmen wantaim PNGRL we bai komplimentim performance bilong klab na tu antapim tim spirit bilong ol pilaia long pilai gut long dispela wiken long winim primiasip tropi ol lus long em las yia gren fainel, Mr Sinamoi i tok.

Ol boi Mungkas i wilwilim ol Sagalau

MADANG volibol i wok long kamapim ol stronpela pilai we ol sapotas ino isis long kamap long pil na sapotim tim bilong ol.

Las wiken long mein gem bilong ol men's volibol, ol boi Mungkas i bagarapim stret sidaun bilong ol Sagalau wantaim skoa 3 sets to 0.

Lukluk long gem bilong ol boi Mungkas ino isi. Ol i gat ol gutpela save pilaia olsem Jeffery Tukana em kepten, na Kristi Tsinu na Justin Komoro, we ol kombain gut tru na bagarapim ol boi Sagalau.

Ol dispela tripela boi, Tukana, Tsinu na Komoro em ol Mungkas bilong Madang, bai i pilai long Momase Queens Birthday tournament long mun July.

Ol boi Mungkas i kamamp gut tru ananit long lukaut bilong patron na klab menesa, Chris Bengko na traina Augustine Sena.

Ol sapotas i amamas tru na tok tenkyu long gutpela gem bilong ol.

Bos bilong Mungkas, Chris i bilip olsem ol inap mekim gut tru na go long Madang volibol fainols.

Kepten bilong Maroons bai no pilai

KEPTEN bilong Queensland Maroons na Seken rowa bilong Brisbane Broncos na tu Australian Kangaroo Gordon Tallis bai no pilai namba tu raun bilong Stet of Orijin gem bihain long em i kisim bagarap long nek bilong em.

"Mi laki tru long stap laip," Em bin tok olsem bihain long em kisim nius olsem em bai i no moa gem long dispela yia bihain long em kisim bagarap long wanpela hai takol i kam long Northern Eagles fowad Adam Muir.

Em i tok em i amamas olsem dispela samting i bin kamap taim em pilai ragbi na i no narapela samting olsem ka eksiden o pun-daun long wara.

Em i tok em bai lukluk long gutpela sait bilong dispela eksiden. I luk olsem em bai i no moa pilai insait long dispela yia.

Em i gat hevi wantaim beksait bon bilong em na ol dokta bai katim long traim stretim fdispela hevi na em bai stap long haus sik ianp sampela de na bihain em bai kam ausait. Ol dokta i tok em

bai liklik trening bihain long sikspela wik na inap mekim ful tren-ing bihain logn sikspela mun tasol dispela i min olsem Gordon Tallis husat i gat 27 krismas nau bai i no moa pilai ragbi insait long dispela sisen.



Em bai lus aut long tupela orijin gem na tu wanpeal Kanagroo raun i go long England long pinis bilong dispela yia.

Ol dokta i tok olsem dispela operesen long Tallis i no bikpela samting na ol bai tyraim stretim em.

John Monie bung wantaim ol biklain bilong ragbi lig

• PNGRFL Siaman John Numapo i givim wanpela bilum olsem presen i go long John Monie, wanpela biknem kosa bilong ragbi lig long Australia, Niu Silan na England. Em i bin kam raun long las wik.

Aninit: Bob Bennett, kosa bilong PNG Kumuls (Ilehan) wantaim Siaman bilong PNGRFL John Numapo long wanpela koporet lans bung we i bin kamap long Holide In las wiken, Dispela bung bilong i bilong helpim ol Kumul husat bai pilai wantaim French Roosters neks mun. John Monie, olupela kosa bilong Paramatta Eels, Auckland Warriors, London Broncos na Wigan Warriors i bin stap olsem wanpela gest long dispela bung. *Ol foto: JOE IVAHARIA.*



Stori bilong Pilaia

Nem: Esther Vai

Krismas: 26

Marit o nogat: Singel

Hevi: 56kilogram

Longpela: 167 cm

Ples: Baimuru, Gulf Provins

Spot em save pilai: Shaolin Kung Fu

Pilai spot ya inap: 5 krismas olgeta.

Ol bikpela tonamen we yu stap insait long en: I no stap insait yet long wanpela tonamen bikos grup aninit long spot bilong em i nogat inap mani bilong putim kamap ol tonamen tasol em bai stap insait long wanpela kikkboxing tonamen long mun Oktoba dispela yia.


Dispela tonamen em kikkboxing sempion Stan ley Nandex bai putim. Ol spot olsem Tai Kwang Do, Karate na kik bookings i save askim Shaolin Kung Fu sumatin long sta-p insait long tonamen bilon gol n a pait.

Lokel hiro bilong yu: Stanley Nandex.

Ovasis hiro: Bruce Lee na Jackie Chan.

Ol muvi yu laikim: Olgeta Matial Ats muvi

Kaikai yu save laikim:



rais, tin pis, kumu, kaukau na banana.

Wok: Nogat wok tasol save helpim trenim ol Junia.

Bilong wanem yu laikim dispela spot: Lukautim mi yet na tu stap insait long ol tonamen.

Musik yu save laikim: regei musik.

Narapela spot yu save pilai: Nogat narapela spot.

Yu no save laikim: Ol manmeri husat save smok.

Save laikim: Ol manmeri husat gat rispek long narapela arapela.

Driman bilong yu: Mi laik kamap wanpela gutpela paita lon olgeta tonamen na tu makim kantri long sampela ovasis tonamen.

PEKU PILIMBO i raitim

Brothers bai traim hat yet

PEKU PILIMBO i raitim

BROTHERS ragbi lig tim inap win wantaim planti poin sapos ol i no slek hariap na takol strong tasol ol i no mekim olsem na klostu ol i lus tasol ol i winim Waliya wantaim 24-20.

Long wanpela strongpela gem las wik Sande, Waliya i pait bek strong tru na klostu ol i win bikos nambawan hap i lukikm Waliya i go pas wantaim 12-4.

Tasol namba tu hap i ol Brothers i kisim strongpela tok long kosa bilong ol Robert Akunai na ol i pilai strong liklik we i lukim skoa bilong ol i surik i go antap.

Nambawan trai bilong gem i kam long fulbek bilong Brothers Robert Epe bihain long faiv minit bihain long gem i stat tasol dispela em wanpela trai tasol bilong nambawan hap na ol Waliya i bekim wantaim tupela trai.

Kik bilong dispela tupela trai tu i gutpela na ol Waliya i go pas wantaim 12 poin taim wisil bilong nambawan hap i kra.

Hapbek bilong Waliya Ricky Au Sibya i pilai na kik gut tru na sampela hap namel long gem i luk olsem ol Waliya bai win tasol i no kamap olsem long pinis bilong gem.

Ol pilaia bilong Waliya i gat ol yangpela manki tasol i pilai wantaim sampela olupela pilaia long kisim liklik ekspeiriens tasol ol yangpela i kamapim wanpela gutpela gem tru long traim win tasol nogat.

Klab Presiden bilong Waliya Ali Dabema i tok ol manki olsem Leo

Segera, Tony Wauya, Duks Dabema na Simon Goe i kam antap dispela yia long pilai insait long a gred olsem tingting bilong klab long kamapim ol yangpela pilaia.

Ol man husat i pilai long Brothers em long Robert Epep, Michael Kawale, Paul Kamang, Stanley Phil Junior, Nelson Nagle, Stanley Buckley, Kwara Arava, Moses Kuman, Gideon Wagan, Gideon Nano, Tony Mote, Catship Agesamo na Milton Maiyo na ol risev Lemech Eka, John Yama, Thomas Kua na David Mapa.

Ol kain man olsem Tony Mote, Stanley Pil Junior, Stanley Buckley i pilai gut tru long sait bilong ol Brothers.

Long sait bilong Waliya ol man olsem Rick Au Sibya i pilaim wanpeal gutpela gem tru na setim hap ol manki bilong em olsem Assie Amono, Jimmy Debege, Leo Segera gut tru long ol i go putim trai.

Dispela gem i no tait olsem gem namel long Difence na Post Puma we i lukim Post Puma i win na go pas long kompitisen lada wantaim 12 -6 long wankain gem tu.

Ol difens na hevi na longpela tasol ol i no yusim gutpela bilt bilong ol long traim skoarim ol trai. Ol Post Puma i bun nating tasol na ol i isi tasol ron abrusim banis bilong Difence na winim ol.

Kone Tigers rausim Royals 25-24 Souths winim Tarangau.44-14 bihain long dispela raun nau Post Puma i go pas.

Nau yet Post Puma i go pas long poin lada bilong kompitisen.

Wok redi bilong Saut Pasifik Gem go het gut

PEKU PILIMBO i raitim

NOGAT wanpela Sekyuriti hevi bai kamap long taim bilong pilaim Saut Pasifik Gem long kantri Fiji long 2003.

Siaman bilong 2003 Saut Pasifik Gems Ogenaising Komiti Dokta Robin Mitchell i bin mekim dispela tok taim em i kam raun long tokaut long wanem samting i wok long kamap insait long kantri bilong em long wok redi bilong kamapim 2003 Saut Pasifik gem.

Planti manmeri i askim long sait bilong sefti bilong ol spot manmeri bihain long Fiji i gat hevi long sait bilong politiks las yia na nogut ol birua painim ol.

Dokta Mitchell i tok politikel hevi bilong las yia i no inap kamapim sampela hevi long 2003 Saut Pasifik Gem.

Em i tok long sait bilong raskal pasin, Fiji i nogat dispela sem hevi we i stap wantaim PNG we dispela pasin nogut i bikpela. Em i tok pikinini meri i ken raun long danis ples na wokabaut i kam long haus wan yet long nait tasol nogat wanpela pasin nogut bai kamap long em.

Olgeta samting bilong pilai olsem pilai graun na wanem narapela sam-

ting i redi tasol sampela i bagarap liklik na ol i wok long traim stretim ol dispela samting na mekim ol redi bai ol spot manmeri i ken kam i stap.

Em i tok sampela gem olsem soka i nogat wanpela pilai graun na ating bai ol i lusim bikpela pilai graun na go pilaim long narapela senta.

Dokta Mitchell i tok ol manmeri husat kam long pilai bai stap long Yunivesiti bilong Saut Pasifik (UOSP) long Suva long taim bilong pilai.

Em i tok long wanpela gem long kamap, i mas gat olsem 6-pela kantri i tok orait long stap insait long wanwan spot na ol i ken pilai. Sapos wanpela o tupela kantri tasol i laik stap insait bai nogat displea gem i kamap.

Mani bilong stretim ol dispela samting inap winim 30 milien Fijian dola na inap go moa sapos i gat planti arapela samting bilong mekim.

Em i tok wok bilong redim ol samting i wok long go het yet na ol i tingting olsem 2000 spot manmeri bilong ol Saut Pasifik kantri bai kam long dispela bung.

Em i mekim planti arapela toktok long wanem samting pilai i stap redi na wanem narapela samting Saut Pasifik Gems komiti long kantri bilokng em i wok long mekim nau i stap bilong stretim rot bilong gem i ken kamap.

Yangpela Koime go long Cananda

WANPELA yangpela sprinta meri bilong Papua Niugini i laki tru na em i winim wanpela raun i go long kantri Cananda.

Em bai go long mun Ogas dispela yia long lukim Wol Atletiks Sempionsip.

Mae Koime em wanpela bilong 12-pela husat i laki long winim dispela raun i go long Cananda insait long wol.

Olgeta mani bilong baim balus, hotel rum, kaikai, raun na wanem

narapela samting bai i kam long Intenesenel Amatsa Atletiks Federesen (IAAF) na Koime bai raun aninit long lukaut bilong ol.

Nem bilong yangpela Koime i bin go insait wantaim ol planti arapela nem na ol i bin pikim nem bilong em olsem wanpela wina long wanpela dro ol i kamapim las Fraide long Edmonton insait long Cananda.


Presiden bilong PNG Atletiks Federesen

Tony Green i bin givim nem bilong Koime i go insait long dispela dro bihain long Koime wantaim ol narapela atlet bilong kantri i winim kompitisen bilong ol long Wol Atletiks De long Me 5 na 12.

Koime bai kamap 18 krismas namel long Disemba olsem na em bai no inap go long narapela bikpela bung bilong ol Junia Atlets we bai kamap long kantri Hungary olsem nau em sans bilong em long go lukim Cananda.


Koime bin winim gol medel long Melanesia Sempionsip long Fiji i no long taim i go pinis bai joinim Jacoro Sucu bilong Fiji long go long dispela bung long Cananda na 10-pela arapela bilong ol narapela kantri bai joinim tupela tu.

Ol dispela lain bai i gat sans long lukim na bung wantaim ol nambawan atlet bilong wol i resis na tu stap wantaim ol. Ol bai joinim tu ol 12-pela wina bilong las yia.



PAINIM BAL RESIS NAMBA 4

WINIM K100



RUL BILONG PILAI:

1. Makim X long boks long poto yu ting bal i stap
2. Makim X long pen tasol
3. Katim poto long sisos na salim long: **PAINIM BAL RESIS NAMBA 4**, Wantok Niuspepa, P.O. Box 1982, Boroko, NCD.
4. Nambawan entri i makim stretpela hap bal i stap, em bai win.
5. Las de bilong kisim ol entri em Fonde Me 31, 2001. Nem bilong wina long mun Epril i stap long pes 31.
6. Long Wantok bilong Jun 7 bai gat nupela K100 prais mani resis. Bai gat resis bilong olgeta mun i go inap mun Desemba, 2001.
7. Disisen bilong komiti i makim wanpela wina em i fainel.
8. Wina bai kisim sek mani, na i no long kes.

9. Raitim nem na adres bilong yu: **Nem**.....**Address**.....

.....**Krismas**.....

10. Yu ken salim moa long wanpela entri, tasol no ken yusim poto kopi.

11. Ol famili o pikinini bilong ol wokman meri bilong Wantok i no inap stap insait long dispela resis.

Lukaut, nogut yu kisim bagarap!

• Dispela em ol sumatin bilong Shaoling Kung Fu. I gat 21 sumatin olgeta i trening. 6-pela meri na ol narapela i man. Instrakta Stephen Ngandang (sanap lukiuk long beksait) i tok olsem ol i nogat inap mani bilong kamapim tonamen bilong ol yet olsem na ol i save stap insait long ol tonamen bilong ol lain olsem Kikboksing, Tai Kwang Do na Karate. Em i tok ol sumatin bilong em i save lus olgeta taim long ol dispela kain tonamen bikos ol i save yusim narapela teknik long pait na i no wankain olsem ol narapela matial ats. Mista Ngandang i tok ol i gat tripela ples bilong Shaoling Kung Fu insait long kantri. Wanpela long Lae na narapela long Umi Bris, em tu insait long Morobe provins na hetkota bilong ol i stap long Pot Mosbi.

Opisal bilong sofbal i no wok gut

VOT i nogat bilip i mas kamap bilong senisim opisal bilong PNG Sofbal Federesen bikos ol i no mekim wok bilong ol gut.

Dispela singaut i kam long Pot Mosbi Mens Sofbal Asoisiesen presiden O'Paniel Uralia na narapela opisal bilong em Francise Dakenny bihain long ol opisal i tok bai nogat 26 Nesenel Sempionsip bikos i nogat nominesen na tu mani i sot.

Tupela man ya i tok sofbal i no inap stap long dispela kain hevi sapos ol opisal i mekim wok bilong ol gut.

Tupela man i sutim tok olsem ol opisal bilong PNG Sofbal Federesen i giaman bikos tupela wik i go pinis ol i bin promis olsem tonamen bai kamap tasol nau ol opisal i kirap na tok nogat.

Tuepal i autim wari olsem i nogat wanpela afiliisen bilong sofbal

long PNG Spot Federesen na tu ol narapela senta insait long kantri i no afiliet i kam insait long Nesenel Sofbal Federesen na dispela Septemba Klub Sempionsip bai i no inap kamap gut.

I gat Pot Mosbi man na meri sofbal asosiesen tasol i afiliet long sofbal na ol narapela senta i no givim yet afiliisen fi bilong ol.

Tupela i tok ol opisal mas risain bikos ol i no save long mekim wok bilong ol na sapos ol i les bai ol i kamapim vot i noigat bilip long rausim ol na putim ol man husat inap mekim wok gutt.

"Mipela i wari tru long lukim dispela olsem ol i no mekim wok gut.

"Long dispela as mipela laik sutim toktok long presiden na ol opisal olsem ol i no save long mekim wok bilong ol na i no hapim spot o mekim wanpela samting bilong

kamapim spot long kantri,"tupela i tok.

"Wanpela miting i mas kamap hariap nau na ol narapela samting i mas kam bihain.

"Long dispela miting we mas kamap nems mun (Jun) long Lae, ol toktok bilong afiliisen i mas pinis na yumi mas redi long kamapim dispela klub sempionsip long Septemba," tupela mani i tok.

Tupela man ya i komplem tu olsem sofbal em wanpela memba bilogn PNG Spot Federesen tasol ol i no afiliet na dispela i min olsem ol i no inap kisim heplim mani samting i kam.

Sapos dispela samting i no kamap bai sofbal i no inap gat nem na tu ol i no inap go pilaim intenesenel gem.

Tupela i askim Nesenel bodi long traim stretim hevi bilong ol pastaim na bihain traim go aut na ogenaisim ol gem nabaut.

WANTOK SPOTS

Solomon Ailan tingting strong long winim PNG

PEKU PILIMBO i raitim

SOLOMON Ailans ragbi yunien tim i kamap aste apinun long pilai egensim PNG Pukpuks long dispela wik Sarere long Pot Mosbi.

Dispela gem i wok long kamap namel long ol kantri bilong Saut Pasifik long lukim husat bai stap insait long Wol Kap resis we bai kamap long 2003.

Ol Solomon Ailans man i no save pilai ragbi long bikpela level tasol ol i promis olsem ol bai pilai wanpela hatpela gem egensim ol Pukpuks.

Kosa bilong Solomon Ailans Ragbi tim, Norman Hatigeva i tokim ol niusman taim ol i kamap long Jacksons ples balus olsem sait bilong em i nupela tumas long sait bilong pilai ol bikpela ragbi gem tasol ol bai traime bes long winim dispela gem.

Em i tok ol pilaia bilong em i kisim strong olsem ol lain long Solomon Ailans i ting olsem ol bai winim dispela gem bihain long Solomon Ailans i bin daunim ol Pukpuks 11-7 long 1991 Saut Pasifik gem hia long PNG.

Mista Hatigeva i tok i gat wanpela pilaia tasol i stap long dispela tim we winim Pukpuk bipo na dispela em kepten bilong ol William Tahu husat bai go pas long stretim ol manki long taim bilong pilai.

I bin gat 22 pilaia olgeta wantaim opisal bilong ol i kamap aste apinun na hai komisina bilong ol wantaim ol opisal bilong PNG Ragbi yunien i bin go bungim ol long ples balus na kisim ol i go long ples bilong slip.

Nau yet ol i wok long redi long pilaim dispela gem egensim Pukpuk long Sarere.

Papua Niugini, Solomon Ailan na Vanuatu i stap insait long wanpela grup, Fiji, Tonga na Samoa i stap long narapela grup, Tahiti, Niue wantaim Cook Ailans i stap long narapela grup. Ol bai pilaim ol yet i go i kam inap long wina bilong olgeta kantri i go pilai insait long 2003 Ragbi Wol Kap.

PNG Ragbi Futbal Yunien Vais Presiden John Susuve i tok ol Pukpuk i luk gut bihain long hatpela trening bilong ol.

Ol Pukpuk i bin stap insait long wanpela trening kemp long Taurama Ami Bareks stat long las wik Fraide na ol i redi tasol long bungim ol Solomon Ailan tim.

"Mipela i ting mipela i bai mekim gut long

pul (grup) bilong mipela bikos mipela i stap aninit long wanpela gutpela menesmen tim long lukaut bilong kosa Farrel Temata na Peter Osborne husat i bilong Niu Silan.

Tripela pilaia bilong Pukpuk bai i no inap pilai bihain long ol i kisim bagarap na dispela ol pilaia em long Willie Petalie, June Makeu na Billy Rapilla na long kisim ples

bilong ol em Aaron Miai na Andy Vele i go kisim ples bilong ol.

Dispela em nem bilong ol Pukpuk sait: Peter Senat, Kevin Rooney, Carl Hoot, Richard Pangkatana, Anthony Pangkatana, Max Kep, Ian Liveras (skipa), Willie Rikis, Arjay Sabumei, Gabriel Tika, Ian Leklek, Andy Vele, Aaron Miai, John

larry, Julius Taonao, Nathan Jang, Joseph Asi Vele, Keith Puarai, Raymond Romulus, Warren Teno, Billy Rapilla, Leroy Muriki, Kevin Vitolo, Joe Asimda, Jesse Mono na Joe Katu.

Husat win insait long dispela olgeta gem wantaim narapela Saut Pasifik kantri bai stap insait long Wol Kap resis long 2003.

Gurias redi long winim Bombers

GABRIEL PAITA i raitim

RABAUL Gurias i lukluk long winim namba foa gem bilong ol taim ol i pilai wantaim ol Lae Bombers. Ol Gurias i stap long namba tri ples wantaim 6 poin na ol Bombers i stap long namba tri ples wantaim 5 poin.

Rabaul Guria i wok long pilai gut i kam na wok long winim olgate gem ol i pilai long em. Tasol long stat bilong gem, ol i wok long lus tumas. Ol Lae Bombers i narakain liklik. Ol i wok long win taim SP Kap resis i kik ol tasol bihain ol i wok long lus.

Kosa bilong Rabaul Gurias Jeffrey Wade i tok olsem tim bilong em i no inap isi long ol Bombers long ol Bombers i wanpela strongpela tim. Em i tok olsem em bai wok long stretim ol pilaia bilong em long lukaut long holim bal na tu long stapim ol trai long kamap.

"Mipela i stapim Mendi Muruks long putim planti trai las wik. Ol i bin putim wanpela trai tasol mi lukim olsem mipela i mas wok long kamapim gut stail bilong mipela long stapim trai," kosa Wade i tok.

Em i tok tu olsem sapos referi bilong dispela gem i strongim dispela 10 mita rul, bai ol manmeri long Kimbe i lukim wanpela gutpela pilai namel long tupela tim. Kosa ya i tok olsem i gat liklik wari long tim long wanem sampela pilaia i kisim bagarap tasol i luk olsem ol bai inap long pilai

long dispela gem. Wanpela nupela pes nau em bai Kom Rumints husat bai pilai olsem wanpela fowat.

Lae Bombers i gat bikpela wok long wokim long wanem ol i mas winim dispela gem o nogat bai ol i pundaun i go daun long resis. Kosa bilong Lae Bombers, Joe Katsir i tok olsem ol i bai senisim olgeta stail bilong ol long pilai. Em tok bikpela wari bilong em i stap long stretim ol pilaia long stapim ol trai. Em i tok olsem long stat bilong gem, ol i save pilai gut na winim olgeta gem tasol nau ol wok long lus.

"Mipela mas wok hat tru long

stretim gem plan bilong mipela," Katsir i tok.

Bombers i kisim tupela nupela pilaia em Peter Wagu na Paul Nelson. Tupela bai pilai namba six na seven.

Long ol narapela gem, ol lain lid long SP Kap resis, Goroka Lahanis bai pilai wantaim Pot Mosbi Vipers long Mosbi. Luk olsem ol Lahanis bai win long wanem ol Vipers i bin lus long ol las lain long resis, Simbu Warriors las wik.

Na long Kundiawa, ol Mendi Muruks bai pilai wantaim Simbu Warriors. Tupela tim wantaim i stap las long resis na bai tupela brukim bun stret

long traime na kam antap liklik.

Bihain long raun faiv, ol tim i stap olsem; Lahanis pes wantaim 10 poin, Enga Mioks 8, Guria 6, Bombers 5, Muruks 3, Tumbes 2 na Warriors 2.

Na long narapela stori bilong ol Kumul, tok i kam long Papua Niugini Ragbi Futbal Lig i tok olsem ol bai tokaut long dispela Kumul tim we i bai pilai wantaim ol French Roosters long neks wik Mande. Tasol i luk olsem planti bilong ol dispela pilaia bai ol kisim long Kumul tim bilong las yia we bin i go long Yurop long pilai long Wol Kap.



• Gavana bilong Isten Hailens Peti Lafanama i bihainim Peter Ipatas bilong Enga long givim sapat i go long SP Kap tim bilong em, Goroka Lahanis taim em i givim ol K20,000 na K10,000 i go long Goroka Ragbi Lig asosiesen. Foto: JOHN SUPA.

Enjoy Coca-Cola at the right price

The Coca-Cola company want you to purchase your Coca-Cola at the RIGHT PRICE.

You can pick up an icy cold Coca-Cola 355ml can for just K1.10 or 500ml bottle for K1.30.

And you can also grab a 1litre Coca-Cola for K2.00.

Enjoy Coca-Cola and pay no more than the recommended retail price.

Prices apply to other refreshing flavours including Schweppes, Sprite, Fanta, & Diet Coke.



Coca-Cola Amatil (PNG) Ltd.

COCA-COLA, DIET COKE, FANTA, SPRITE, SCHWEPPES AND ENJOY AND THE CONTOUR BOTTLE DESIGN ARE REGISTERED TRADE MARKS OF THE COCA-COLA COMPANY.



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.